

# বিষ্ণুপ্ৰিয়া মণিপুৰীৰ দিকপাল

—লেখক—

ডঃ শ্ৰীকালী প্ৰসাদ সিংহ,

এম্. এ., পি. এইচ্. ডি., ডি. লিট্., গীতাচাৰ্য্য

আচাৰ্য্য, সংস্কৃত বিভাগ

অসাম বিশ্ববিদ্যালয়


শিলচৰ

দ্বিবাশ্ৰম সংস্কৃতি কেন্দ্ৰ

কচুধৰম : চেংকুড়ি : শিলচৰ = ৭৮৮০০৭

১৯৯৮ ইংৰাজী







विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते

विद्यया ऽमृतमश्नुते





# বিসুপ্ৰিয়া যণিপুৰীৰ দিকপাল

—লেখক—

ডঃ শ্ৰীকালী প্রসাদ সিংহ,

এম্. এ., পি. এইচ্. ডি., ডি. লিট্., গীতাচাৰ্য্য

আচাৰ্য্য, সংস্কৃত বিভাগ

আসাম বিশ্ববিদ্যালয়

শিলচৰ

দিব্যাত্ম সংস্কৃতি কেন্দ্ৰ

কচুধৰম : চেংকুড়ি : শিলচৰ = ৭৮৮০০৭

১৯৯৮ ইংৰাজী



Bishnupriya Manipurir Dikpal

[ A Collection of Lives ]

By : Prof. K. P. Sinha

পইয়া সংস্করণ : শ্রীপঞ্চমী

২৫ জানুৱাৰী, ১৯৯৬ইং

১০ মাঘ, ১৪০২ সন

প্ৰকাশনাত : কুমাৰী দেবযানী সিন্‌হা,

দিব্যাশ্ৰম সংস্কৃতি কেন্দ্ৰ

কচুধৰম : চেংকুড়ি : শিলচৰ = ৭৮৮০০৭

ছাপানিত : ষ্টাৰ প্ৰেছ

বিবেকানন্দ ৰোড, ধৰ্মনগৰ = ৭৯৯২৫০

মূল্য : ৰূপা ৩০.০০ হান



## ‘ভূমিকা’

সময়ে সময়ে বিষ্ণুপ্রিয়া মণিপুরীর ভিতরে নানান গুণী  
এবং প্রতিভাসম্পন্ন মানুষ জন্ম অ’য়া গেছিগা। কিন্তু গুণীর প্রতি  
সমাদর করানি নাজানি বারো প্রসারিত দৃষ্টিবিহীন জাত এহানে  
ঐ গিরক বা গিথানকগাছির স্মৃতি উতা ধরিয়া থনার কোনো  
প্রচেষ্টা নাকরেছি। ঐ কারণে এসাদে গুণী গিরিগিথানীর  
জীবনকাহিনী উতা আজিকার মানুৰাঙ একরকম অজ্ঞাত অ’য়া  
আছে। সমাজৰ স্মৃতিত মাঙয়া যানার পথে আছি ঐ মহজ্জন  
উতার জীবনী কতোহামর সংগ্রহ করিয়া গ্রন্থ এহান করলাঙ।  
এ গ্রন্থৰ জীবন-চরিত এতাই আমার সমাজৰ যুবক নিঙোলরে  
সুন্দর জীবন আকেইহান গঠন করানিত উদ্বুদ্ধ করে পারলে  
আমার পরিশ্রম সার্থক অ’ইতই। ইতি—

কালীপ্রসাদ







## সূচিপত্র

পৃষ্ঠা

১। অজা দেবসিং ( ডাকুলা ) — — —	১
২। মায়ে বাসকী ( বাসকুলী ) — — —	৬
৩। অজা ধনসেনা ( বামায়াণ কীর্তনী ) — —	১৬
৪। অজা মরোত্তম ( বাসধারী ) — — —	২৩
৫। অজা পেড়াক ( ইসালপা ) — — —	৩২
৬। গুরু সেনারিক রাজকুমার ( নৃত্যগুরু ) — —	৩৭
৭। পাঞ্চালপা গোলাপ গিরি — — —	৪৫
৮। পাঞ্চালপা শহীদ গিরীন্দ্র — — —	৫৩
৯। বিপ্লবী বৈকুণ্ঠ শর্মা বাবো	
বিপ্লবিনী লীলাবতী শর্মা — — —	৬৬

## কৃতজ্ঞতা স্বীকার

জীবনী এতা সংগ্রহ করতে যে যে গিরিগীথানীরাঙতো  
উপাদান পাছিলাঙ, তানুর নাঙ উতা আমি তলে দিলাং :—  
জীবনীর নাং— উপাদান দেছি গিরিগিথানীর  
নাঙ

- ১। অজা দেবসিঙ— অজা বাবাইসেনা ( কচুধরম ),  
অজা নীলো ( বিহারা ) ইত্যাদি ।
- ২। মায়েো বাসকী— মণীন্দ্র সিংহ ( রাজনগর ),  
কাপোক দেবী ( সিঙ্গারী ) ইত্যাদি ।
- ৩। অজা ধনসেনা— রাজকুমার সিংহ,  
কৃষ্ণকুমার সিংহ ( গুরামাজি ) ইত্যাদি ।
- ৪। অজা নরোত্তম— সরোজিনী দেবী ( মোহনপুর ,  
কমলপুর ) ব্রজধন চাটাজি  
( হালহালি ) ইত্যাদি ।
- ৫। অজা পেঙারু— মাধবী দেবী ( গোলধারপুর ),  
ব্রজলাল সিংহ ( শঙ্করবস্তি,  
শিলচর ) ইত্যাদি ।
- ৬। গুরু সেনারিক— অনিল রাজকুমার, গোপীসেনা  
রাজকুমার ( কালিঙ্গর, শিলচর ) ইত্যাদি ।
- ৭। গোলাপ গিরি— অজা বাবাইসেনা ( কচুধরম )  
সমরজিৎ সিংহ ( শনিছড়া ) ইত্যাদি ।
- ৮। শহীদ গিরীন্দ্র— বিমল সিংহ ( কমলপুর )  
দেবকুমার সিংহ ( আগরতলা ) ইত্যাদি ।
- ৯। বিপ্লবী বৈকুণ্ঠ শর্মা,—নবদ্বীপ সিংহ ( আগরতলা ),  
বিপ্লবিনী লীলাবতী শর্মা সাবিত্রী চাটাজি ( সিঙ্গারী,  
পাথারকান্দি),  
বুজিত সিংহ ( বাংলাদেশ ) ইত্যাদি ।

গিরিগিথানী এতা হাবির প্রতি আমি কৃতজ্ঞতা জানেয়ার ।

— কালীপ্রসাদ —



# অজ্ঞা দেবসিঙ ( ডা'কুলা )

অজ্ঞা দেবসিঙ এগো মূলতঃ ডাকুলা আগো । এ গিরক এগোর সাদে প্রতিভাবান আৰাক ডাকুলা আগো এ জাতে জৰম না'ছি এবং ভবিষ্যতেউ জৰম অ'ইতাই কিনা সন্দেহ । কিন্তু গিরক এগো ডাকুলা অজ্ঞাগো বুলিয়া বিখ্যাত অ'ইলেউ তা হুদা ডাকুলাগো নাগই; তা আধ্যাত্মিক এবং দিব্য-শক্তি সম্পন্ন পুরুষ আগো । গিরক এগো জৰম অহিলতা কাছাড় জিলার অন্তৰ্গত শিলচর শহর পাচ-ছয় মাইল পশ্চিমে অবস্থিত বাগবান্দর নাঙর গাও উহানাত । এ শতাব্দীর দ্বিতীয়-তৃতীয় দশকে গিরক এগো দেহত্যাগ করেছেগো ।

দেবসিঙ গিরকরতা কনাকতো পুরি ডা'ক তামকরানির প্রতি প্রচণ্ড অভিলাস আহান আছিল । যৌবনে তার অভিলাস উহান পুরানিরকা তা মণিপুরে গেলগা এবং গুরু আগোর ঘরে থায়া ডা'ক তামকরানি অ'করলো । কিন্তু দেবসিঙ গিরক এগো মিয়াম অ'ক না'নিয়ৈ গুরু উগোই তারে অনেক গালেয়া ঘরে ফিরিয়া যানারকা মাওলো । অথচ দেবসিঙর সংকল্পহান—তা বিজাহান না ফিকিয়া ঘরে না ফিরতই । উহানে ইমে তা গুরুর তজক কিতা লাগেয়া লেইছি ফিরিয়া থাইল । তার এসাদে গুরু সেবার ফলে গুরু উগোয়াও তারতা মিয়াম দিন ডা'ক তামকরানি না লাগিল; অল্পদিনেই তার সেবাত সন্তুষ্ট গুরুর ঘরে তা অজ্ঞার লগে উন্নীত অ'য়া দেশে ফিরিল । গুরুবে তারে বর দিয়াভিলতা নিশেষ ঘটনা আহানাত । ঘটনাহান ঘটে ছিলতা এসাদে :

দেবসিঙ গিরকর গুরু উগো সময় আহানাত পেটর অশুখ আহানলো পড়িল হানতে স্বাতি তা পায়খানা করবোতা বুলিয়া

শিষ্য উঠাই ফাম আহান কোদাললো ছুটিয়া ঠিক করিয়া থদিলা । রাতি অজা উগোই ফাম উহানাত পাষখানা করেব । এবেদে দেবসিঙ গিরকে দিনকার রাতি ফুরানির আগে নিজর আ'তলো নিকিয়া ফাম উহান গোবরলো লেপিয়া ঙকখি-ডারাল করিয়া থর । কারও কারও মতে, অজা উগোরতা ম'ঙ'নির নুরারা লাগেছিলতা নাগই; ইমে তা মলত্যাগ করলো ফাম উহান দিনকার ঙকখি করলোতা উনি । যেতাউ অ'ক, এ কাম এহান কুঙগোই করতারাহান হার নাপেয়া অজা উগোই শিষ্য উতা হাবিরে আ'ঙকরের, কিন্তু কুনো আগোরাঙতো উত্তর নাপার । বাককা কতোদিন যানার পিছে রাতি আহান অজা উগোই থিয়াল করিয়া থায়া দেবসিঙ গিরকে কাম এহান করেব উহান দেখলো । পিছেকার দিনে বিয়ানে শিষ্য হাবির মুঙে দেবসিঙ গিরকরে ডাহিয়া অজা উগোই মাতেব, “দেবসিঙ, কাম এহ নতে তি করবহান অ'হে ।” দেবসিঙ গিরকে নিরুত্তর অ'য়া মূরগো খাজবেয়া থাইল । অজাই বা-রো মাতেব, “তিতে এ কাম এহানতে কিয়া করবতা ?” দেবসিঙ গিরকে মূরগো নঙেয়া মাতেব, “উহানতে অজাই জানিনাই !” অজাই গন্তীর অ'য়া মাতেব, “এং, মি জানু বুলবতা ! উহান অ'ইলেতে এবেদে আইতা ।” দেবসিঙ গিরক অজার কাদাত গেলগা আরো অজা উগোই তার বা'তর বারার আ'তহানলো দেবসিঙ গিরকর, বা'তর আ'তহান এবং বাঙুরি বারার আ'তহানলো বাঙুরি আতহান ধরিয়া মাতেব “এরে আজিত পুরি মোর বিজা এহান হাবিহান তোরাঙ দিলু । তোরতা আর ডাক ভাম-করানির দরকার নেই ; তি দেশে ফিরিয়া যাগা ।” গিরক আগোরাঙতো ছনলাঙতা, উদিন অজা উগো কীর্তন আহানাত ডাক বারানিত সাল'য়া ভাত খানার সময়ত দেবসিঙ গিরকরে ডাহিয়া কাদাত বহেয়া ভাত খৌরাছে, বারো তার নিজর কৈয়ৎ, ফেইচম, কাকালির আচালা—হাবিতা দিয়া তারে



ডাকগোলো কাদাত বহিয়া, উতার পিছে তার আতহানিত ধরিয়া তারে বর দেছেতা উনি । যেতাউ অ'ক, এসাদে বর পানার পিছে গুরুর আদেশে দেবসিঙ গিরকে অজারে হমাদিয়া, ডাকগো পিঠিমানাত লামকরিয়া ঘরেদে সাল'ইল । সাল'নির সময়ত অজাই মাতলো, “মণিপুরর টেঙারাগো লালনিষে তোর খ্যাতি চারিয়ো বারাদে সিলইতই ।” দেবসিঙ গিরকে জিরি বামর উবেদে আ'য়া কাছাড়ে নিকুলতেই মেইতেইর কীর্তন আহানাত তার বার্তন পড়িল । উদির তার ডাক বারানি দেহিয়া দর্শক হাবি বিমুক্ত : যেবেদে গিরকে মেইংহান বুলার. উবেদে গুটগুট দর্শকে আ'য়া তারে প্রেমবস্ত্র দিতারা'হা । আক দিনে দেবসিঙ গিরক ‘দেবসিঙ অজা’ বুলিয়া পরিচিত অ'ইল : চারিয়ো বারাদে তার খ্যাতি সিলয়া পড়িল ।

কীর্তন উতানর পিছে আ'বাক ঘটনা আহান ঘটিল । কীর্তন অ'ইল গাঙ উহানাত শৌজিপুত নাপাছি স্বামীশ্রী আহানে দেবসিঙ গিরকর গুণে মুগ্ধ অ'য়া তানুর ঘরে নিয়া তারে ধূপ-থমেইলো পূজা করিয়া তারাতো শৌ আগো ভিক্ষা করলা । দেবসিঙ গিরকে তানুর অনুরোধহান থইলো এবং যথাকালে গিধানক উগোর গর্ভত মুনিশৌ আগো জরম অ'ইল । ঐ মুনিশৌ উগোর নাঙ লালঙ দেবসিঙ বুলিয়া থদিলো এবং উগো পিছেদে অজা দেবসিঙর সাদে নাঙ করা ডাকু'লা আগো অ'ইল ।

অজা দেবসিঙে সারা জীবন ব্যাপিয়া গুরুকৃপা পেয়া গেলগা । অনেকদিন গুরুরে তারে স্বপ্নযোগে নানা ভাল শিক্ষা দিয়া গেলগা । গুরুরে উসাদে শিক্ষা দিয়া গেলগা লগে লগে অজা দেবসিঙে রাতি মেরাকে যুমেত্ত উঠিয়া তার শিষ্যরে ডাকলোকো পুরি ‘এরে অজাই একাকা বাগা দিয়া গেলগা ভালহানি হিকিয়া থবেলেইতা; নাইলে পাণ্ডরে পড়ি-মগা’ বুলিয়া হিকাদিলো ।

দেবসিঙ গিরকে বায়েইলো ডাক উগোরে তা জীবন্ত দৌগোর সাদে পূজা করলো । ডাক উগোরে তা পুঙুদ বা মুড়ালো জবর করে না বায়েইলো বা বারানি নাদলো—‘ডা’ক গোই হুহেইবো’ বুলিয়া । জাবর পরে তা ডা’ক উগোরে পুন্ডি উরাদিয়া থইলো এবং ডাক উগোর বিষয়ে তা হাবি সময়ত পবিত্রতা রক্ষা করিয়া চললো । ফলে ডা’ক উগো জীবন্ত অ’য়া উঠেছিল । পবিত্রতা রক্ষাত ক্রটি অ’ইলে ডাক’ উগো আপ্রানে ‘চড়’ করিয়া ফাড়িল । ডা’ক উগোরাও অজা দেবসিঙে ক্ষীর বারো ফলমূল কাতকালো এবং উপাদে সেবাত কুনোগোর ক্রটি অ’ইলে উগোই ডাকগোরে হমাদেনার সময়ত মুরগো তুলে নুরারিয়া থাইল ।

অজা দেবসিঙর জীবনে নামান উব্রেক্ষোগ্য ঘটনা ঘটে গেছেগা । কুনো কীত’ন আহানাত তা ডা’ক বারানিত গেছিলগা, কিন্তু খৌপুৰে কুনো কারণে তারে কীত’নে হমানি নাদলো । কীত’নহান অ’করানির সময় উহানাত তা কীত’নর মাণ্ডপগোর কাদার ঘর আগোত ঊবা’য়া রাগোহান বারানি অ’করলো উপেই মাণ্ডপগোর মানু উতা হাবি মাণ্ডপগো বেলেয়া তার উপেই গেলাগা । আরাক কীত’ন আহানাত গিরকে রাগোহান বায়েইতে ভুল আহান অ’পড়েছিলগা । রাগোহান লমকরিয়া বৈষ্ণব হমাদিতেগা বৈষ্ণব আগোই অ’ঙকরলো, “অজা, আজি রাগোহানাত এসাদে অ’ইল এহান কিতায়া ? ” দেবসিঙ গিরকে মাতলো, “হায়, খৌপুগোর দোষ আহানি আছেতানা ! ” উপেই পিঠিয়েদেত্ত কুনো গিরক আগোই টিপ্পনী করলো, “অজা এগোই তা ভুল করে বেলেয়া খৌপুয়েহে দোষ দেয় ! ” উহান হুনিয়া দেবসিঙ গিরকে মাতলো, “উহানর প্রমাণহানতে কালি বারো-বাজিত আপ্রানেউ দেখতাই । ” পিছেকার দিনে বারোবাজিত হঠাৎ করে কোণ আগোদেত্ত জি লাগিয়া মাণ্ডপ উগো হাবিগো পুড়িল ।



দেবসিঙ গিরক এগেংরে হুদা ড'কুলা অজাগে। বুললে তুল  
অ'ইতই। বস্তুতঃ তা দিব্যশক্তিসম্পন্ন পুরুষ আগো। এসাদে ছনি-  
য়ার যে, গাড়ী নেয়োছিল ও যুগে তা আগেকার স্বাতি শিলচরে  
ডা'ক বায়েয়া পিছেকার দিনে ধর্মনগরে গিয়া ডা'ক বায়াছেগা উমি।  
গিরকে বন জঙ্গলর পথেদে আ'টিয়া যিতেগা পথে বাঘ-ভালুক  
থাইলে উতাই তারে দেহানিয়ে বারাদে থেরয়া গেলাগা বুলি-  
য়াউ ছনিয়ার। আকখুরুম বাহিবেত্ত ঘরে ফিরিয়া আহিতে  
তানুর ঘর পানার আগে লাল'নি লাগের ঘাঘরার খেরা  
উহানাত রাতিনঙেই অ'পড়িলগা। উপেই তা খেরানী  
উগেংরে ডাকতে কুরাওকার অপরিচিত নৌউলি আগোই তারে  
লালকরে দিলো ; ঘাট হান লাল'য়া ফিরিয়া চেইতে তা  
দেহেয় যে, নৌউলি উগো নেই, নৌ উগো নেই।

এসাদে করিয়া অজ্ঞা দেবসিঙর জীবন এহান নানা দিব্য  
ঘটনালো পরিপূর্ণ আছিল। কিন্তু আগেকার গিরিগিথানিয়ে  
ও ঘটনা উতা লিপিবদ্ধ করিয়া নাথানিয়ে, এবং উতার পিছেউ  
যথা সময়ে ও কাহিনী উতা কুনোগোই সংগ্রহ নাকরানিয়ে  
বর্তমানে তার দিব্য জীবনর পরিপূর্ণ রূপ আহান পানা নুরা-  
দিয়ার। যথ'যথ ভাবে অনুসন্ধান করলে হয়তো এবাকাউ ও  
গিরকর অনেক কাহিনী কুনোগোই আরতাউ বিস্তৃত করে  
আমার মুণ্ডে ধরে পারতাই।







# মায়ে বাসকী ( বাসকুলী )

মণিপুরী সমাজে সৃষ্টি কৃতি বারো ভগবৎপ্রেমে পরিপূর্ণ যে যে কৃষ্টি আছে, উতার ভিতরে প্রথম স্তরে আছেতা বাস বারো বাসক । ভারতর স্বাধীনতার পূর্বযুগে, বিশেষ করিয়া এ বিংশ শতকর পইলাত্ত চতুর্থ দশক পেয়া—এ সময় এহানাত বিষ্ণুপ্রিয়া মণিপুরী সমাজর কৃষ্টিত বাসকর স্থানহান হাবির গজে আছিল । ঐ সময়ত বিষ্ণুপ্রিয়া সমাজর প্রত্যেক অঞ্চলে অনেক বাসকুলী নিকুলেছিল। এবং সময়ে সময়ে ঐ বাসকুলীর ভিতরে সিংমা দিবেয়া সমাজর গিরিগিথানীয়ে আনন্দ উপভোগ করলা । তৎকালীন নাটকরা বাসকুলীর ভিতরে আছিলাতা বিক্রমপুর-মোহনপুরর কামিনী দেবী, ডেইখোঙর দিনপতি দেবী, গড়বন্দর মায়ে বাসকী বারো চন্দ্রিকা, দামছড়ার ত্রিবেণী টিপেরা, প্রতাপগড়র ডা'কুলী, শিংলার রূপার রূপবতী শর্মা বারো পশ্চিম কৃষ্ণনগরর কলা, ফেতিপাতঃ মুখী, রাতাছড়ার মালতী ইত্যাদি । ঐ সময়তেই ভানুগাছর নাটকরা বাসকুলীগো আছিলীতা, কাপকনু দেবী । পরবর্তী কালর বাসকুলীর ভিতরে উল্লেখযোগ্য অ'ইলতাই ভানুগাছর মুক্তারেই বারো প্রতাপগড়র পঞ্চমী টিপেরা ।

বাসকুলী এতা হাবির ভিতরে সর্বাধিক খ্যাতিসম্পন্ন বাসকুলীগো অ'ইলীতাই গড়বন্দর মায়ে বাসকী । তৎকালে এ গিথানকর নাটহান নাহনেছি কুনো জন আগো বিষ্ণুপ্রিয়া সমাজে নেয়োছিল। গিথানকর মধুর বারো উচ্চ কণ্ঠ এবং এলা পরিবেশনর ভঙ্গিমা উহানে শ্রোতা-ভাবক-বৈষ্ণবর স্বভাবতই আকর্ষণ করলো । উতার গজে তেইর খ্যাতির আশ্রাক ডাঙর কারণ আহান অ'ইলতাই এহান যে, বস্তুতঃ

তেই বিশেষ এ'লা আকতা বারো বিশেষ সুর আকতার প্রবর্তন  
করিয়া গেছেগাগো । বৰ্ত্তমানেউ বাসকর এ'লা অ'করলেই  
বৃজন গিরিগিথানীয়ে 'এতাতে মায়ে বাসকীর এ'লানা', 'এতাতে  
মায়ে বাসকীর সুরনা' বুলিয়া শ্রদ্ধা সহকারে গিথানকরে  
স্মরণ করতারা । গিথানকর বাসকর ধারা উহান পরবর্ত্তীকালে  
গিথানকর অসংখ্য পড়ুয়াই রক্ষা করিয়া থছিল । গিথানকর  
পড়ুয়া উতার ভিতরে হাবিত্ত উল্লেখযোগ্য অ'ইলাতাই—  
ফাকুরার মালা ( টিপেরা ), প্রতাপগড়র ডা'কুলী, ফেতিপাতর  
মুহী বারো রাতাহড়ার মালতী ।

এ সৰ্বজনবিদিত বারো সৰ্বজনবন্দিত মায়ে বাসকী  
গিথানক এগোর পুণ্য জীবন চরিতহান ইকরানিরকা মি ইদানীং  
কালে বাছাড় হাইলাকান্দি-করিমগঞ্জর অনেক স্থানর অনেক  
গিরিগিথানীর লগে উমা অ'ইলু । কিন্তু মোর প্রচেষ্টাহান  
খানি ডিলো পড়িলগা ; উহানে গিথানকর জীবনর বিস্তৃত  
বিবরণ সংগ্রহ করে হুবারলু । যেহানি সংগ্রহ করলু উহানি  
আজি পাঠকর মুণ্ডে তুলিয়া ধররি । এতার ভিতরেউ  
বৰ্ত্তমান অবস্থাত ধারাবাহিকতা রক্ষা করানি সম্ভব না'নিয়ে  
অধিকাংশ ঘটনাই ইমে বিক্লিপ্ত ভাবে বর্ণনা করানিত বাধ্য  
অ'ইলাঙ ।

মায়ে গিথানক জরম অ'ছিলীতা শিলচরর কাদার  
কালিঞ্জর গাঙে—আনুমানিক ১৮৭৫-১৮৮০ খ্রীষ্টাব্দর ভিতরে ।  
কালিঞ্জরে তেইর পিতৃদেবর ভিটাগো আছিল বুলিয়া এবাকাউ  
কালিঞ্জর বারো শিংলার মানুরাঙতো হুনিয়ার । গিথানকর  
মাতৃদেবী আছিলীতা শিংলার ( খুব সম্ভবতঃ বাসকালটিলার )  
নিঙোলগো । ছঃখর বিষয়হান—অনেক চেষ্টা করিয়াউ  
গিথানকর পিতৃদেব বারো মাতৃদেবীর নাঙ নিকালো হুবারলাঙ ।  
মায়ে গিথানক জরম অ'নার তিন-চারি বছর পরে তেইর  
পিতৃগিবকর মৃত্যু অ'নাই তেইর বিধবা মালকে মায়ে



গিথানকরেলো গিয়া শিংলার পিতৃগৃহে থাইলীগা । উতার  
 দ্বয়দিন পিছে তেই গড়রবন্দ বা চৌধুরী কোণার দিনমণি  
 গিরকরে দ্বিতীয় স্বামী হিসাবে গ্রহণ করিয়া উপেই থাইলীগা;  
 লগে জিলক মায়ে গিথানকরেউ নিয়া গেলীগা । গতিকে  
 দিনমণি গিরক এগো মায়ে গিথানকর আনোগো বাপকগো ।  
 দিনমণি গিরকর আরাক পুতোক আগো আছিল; তার নাঙ  
 জলু । গতিকে জলু এগো মায়ে গিথানকর আনোগো বেয়কগো  
 ( মালক আগো, বাপক হুগো ) ।

মায়ে গিথানকে কনাকতো পুরি বাসক তামবরুছে বারো  
 তেইর অজা উতার লগে বিভিন্ন ফামে গিয়া বাসক দেছেগা ।  
 এসাদে করে তেই বাসক দিতেগা শিলচরর কাদার স্বাজনগর  
 গাঙর ঠিকক-নাঙর গিরক আনোই তেইরে বানা পেয়া জিল-  
 কগো করে গ্রহণ করেছিল । মায়ে গিথানকেউ ঠিকক গির-  
 করে নিজর পিতৃদেব বুলিয়া গ্রহণ করেছিলী এবং অধিকাংশ  
 সময়ত উরাঙ গিয়া থাইলীগা ।

মায়ে গিথানকর বয়ঃক্রম অ'ইলে ইমে তামুর গাঙর  
 বীরমণি নাঙর গিরক আগোর লগে তেই সংসার-বন্ধন স্থাপন  
 করলো । উবাকা ঠিকক গিরকে তেইরে কিয়ম-পুতিলো থিল  
 করে দেছিলগা । বীরমণি গিরকর ঔরসে মায়ে গিথানকে  
 ধনো ( বেকুরি ) -নাঙর মুনিশো আগো পেইলো, কিন্তু শো  
 উগো জরম অ'নার অল্প কতো বছর পিছেই বীরমণি গিরক  
 দেহত্যাগ করলো । উতার পিছে মায়ে গিথানকে গাঙর  
 আরাক গিরক আগোরে দ্বিতীয় স্বামী হিসাবে গ্রহণ করানি  
 মনাছিলী ; কিন্তু গিরক উগোই মায়ে গিথানকর পুতোক  
 ধনোরে গ্রহণ করানি না'করানিয়ে তেই বা-রো সংসার  
 পাতানির আশা চিরতরে বাদ দিয়া বাসকলো জীবনহান  
 অতিপাত করানির সংকল্প নিলোগা । বাসক দেনাত যিতেগা  
 পুতোক ধনোরে মায়ে গিথানকে তেইর বেয়ক-হৌরক অর্থাৎ  
 ধনোর জেরতাক আগোর ঘরে থয়া গেলীগা ।

সংসারে পুতোক ধনোই একমাত্র সম্বলগো অ'নাই মায়ে। গিথানকে তারে সমস্ত মনপ্রাণ ঢালিয়া বানা পেইলো এবং তার সুখ স্বাচ্ছন্দ্যরকা তেই সৌখীন পুষাক-পরিচ্ছদেত্ত অ'করিয়া হাবি ধরণর উপকরণর সুবন্দোবস্ত করে দিলো । সময় উহান ইংরেজ আমলহান, এবং আমার ভারতীয়ই সাহেবর অনু-করণে জীবন যাপন করানির চেষ্টা করলা কালহান । মায়ে গিথানকেউ ধনোরে সাহেবর অনুকরণে ধনোরে পুষাক-পরিচ্ছদ পিধিয়া বারো ঘোড়াত চড়িয়া খেলানির বন্দোবস্ত করেদেছিলী ।

ঐ ধনো গিরকরতা যথাকালে বিবাহ অ'নার পিছে তার ঔরসে ব্রজবিলাস বারো সুখময় নাঙর মূনি জিপুত ছুগো জরম অ'ইলা ; উতা বর্ত'মানেউ জীবিত অ'য়া গড়রবন্দে আছি ।

দীর্ঘদিন বাসক-সঙ্গীতর বিদ্যালো জীবনহান কাটেয়া মায়ে গিথানক ১৯৪৮-৪৯ ইংরাজীত আনুমানিক ৭৩-৭৪ বছর বয়সে রাজনগরে গিয়া দেহত্যাগ করলোগা, যদিও তেইর শ্রাদ্ধকর্ম গড়রবন্দে নিয়া করানি অ'ছিল ।

মায়ে গিথানকে অনেক গিরিগিথানীরাঙতো বাসক শিক্ষা করেছিলী যদিও, তেই যথারীতি বিদ্যা এহান লাছিলীতা শিংলার রূপা নাঙর রূপবতী নাঙর বামুনী বাসকুলী গিথানক আগোরাঙতো । ঐ রূপবতী গিথানক উগো ডেইখোঙর দিনপতি বাসকীর পড়ুৱাগো । ইসালপা কতগোরাঙতো মায়ে গিথানকে বাসকর এলা হিকেছিলী । ঐ ইসালপা উতার ভিতরে উল্লেখ-যোগ্য অ'ইলাতাই— শিংলার বাবুচান অজা, বাবুধন অজা, ব্রজ বল্লভ অজা, বারো প্রতাপগড়র দঙ্গ অজা । বাসকর বাহিরে রাস বারো ইসালপার এলাউ গিথানকে যথারীতি শিক্ষা করেছিলী এবং এ'লার লগে মৃদঙ্গবিদ্যাহানো আয়ত্ত করেছিলী । গিথানকে বাসক এবং রাস — এ দ্বিবিদ্যাউ শিক্ষা দিলো এবং বাসক বারো রাসর অনুষ্ঠানর দিনে ডাকুলার লগে সম্পূর্ণরূপে জুরি দিয়া ডা'ক বারেইলো ।



মায়ে গিথানকর গারিগো দীঘল, বারো মেইথঙহানো থানি দীঘালা-দীঘালা আছিল; গারিগোর বঙহান পুলেইকচ্। গিথানকে সাজসজ্জা খুপ কিতাউ নাকরলো। পইলাদে গিথানকে পলেই পিদিয়া বাসক দিলো বুলিয়া কুনো কুনোগোই মাতলা; পরবতি জীবনে চাকচাবী বার ঘাগরা পিদিয়াই গিথানকে বাসক দিলো। এ'লা দেনার সময়ত গিথানকর আখি আগো পরিমাণে ডাঙর অ'ইল। গিথানকর নিরলঙ্কার গারিগোত বারো মেইথঙে পবিত্র মাধুর্য আহান আছিল, যার ফলে গিথানকে এ'লা দিলে হুদা তেইর গারিগো বারো নির্মল মেইথঙ উহান দেহিয়াই মানুরে পরম তৃপ্তি পেইলা —যেবেদে তেই মেইথঙহান বুলেয়া এ'লাদিলো, উবেদে হাবি ভাবক ভাবে-আনন্দে বিগলিত অ'ইলা। মায়ে গিথানকে সন্তাত এলা দেনাত হমেইলে বরসর তুলনাত অনেক কনাকগো পায়া অ'ইলী। উতার গজে গিথানকর কণ্ঠস্বরগো যেসাদে উচ, উসাদে অমৃতর সাদে মধুময় আছিল। এসাদে করে সঙ্গীত পরিবেশনর উপ-যোগী বিবিধ গুণে বিভূষিত অ'নার ফলে মায়ে গিথানক সমগ্র বিষ্ণুপ্রিয়া মণিপুরী সমাজে বাসক - বিদ্যাত শীর্ষস্থান অধিকার করিয়া প্রচুর খ্যাতি লাভ করেছিল এবং হাবির শ্রদ্ধার পাত্রগো অ'ছিলী। হুদা আসাম-ত্রিপুরা নাগই, মণিপুরেউ গিথানকর জুরি বাসকুলী মেয়'ছিল। গিথানকে বিষ্ণুপ্রিয়া সমাজর প্রায় প্রত্যেক গাঙে এবং মেইতেই বারো টিপেরার বহু গাঙে বা অকলে বাসক দিয়া বুললো, মণিপুরে গিয়াউ বহু ফামে গিথানকে এ'লা দিলোগা।

মায়ে গিথানকে যেপেই এ'লা দিলেগাউ শীর্ষস্থানর সম্মান উহান বরাবর তেইরকা থাইল। আকথুরুম বারোমুনির ডাটীর আমে মণিপুরর বাসকুলী দুগোই বাসক দিতাই বুলিয়া লেপ'-ছিল। ও সময়ত দৈবাৎ মায়ে গিথানকো বারমুনিত গিয়াছি-লীগা হানতে তেইরেউ বাসকুলী উতার লগে ফাংনাত হমানিরকা

নিমন্ত্ৰণ করানি অ'ইল। ফাংনাত পইলা মনিপুরর বাসকুলী  
 দ্বিয়োগোই অ'করলা এবং এ'লাউ যথার্থভাবে হবা করে দিলা।  
 কিন্তু উতার পিছে মায়ে গিথানকে উঠিয়া হেক তুলে তুলে  
 এ'লা আহান দিলোতাই মনিপুরর বাসকুলী উতা তেইর লগে  
 জুরি দেনা লাজপেয়া আর এ'লা দেনা না'করলা; বাসকহান  
 হারি ইমে মায়ে গিথানকে দিয়া গেলীগা। গিথানকে মনিপুরে  
 গিয়াউ প্রচুর খ্যাতি বারো অকা পা'ছিলী। গিথানকর বাসক  
 ভনিয়া পরম তৃপ্তি লাভ করিয়া তৎকালীন মনিপুরর রাজাই  
 তেইরে উচ্চ প্রশংসা করিয়া মানপত্র আহান পিতলর চুঙ  
 আগোত ব'ইয়া দিরাছিল।

মায়ে গিথানকে ইসালপার এ'লাউ ছদ্দা হিকেছিলীহান  
 নাগই, তেই উতা ঠিক ইসালপার সাদে দক্ষতালো পরিবেশন  
 করে পারলো। আকখুরম বারোমুন্নি তৎকালীন বিখ্যাত  
 অজা কালিদাস গিরকে এ'লা দেনাত হমাছিল। হাদিত তা  
 আকখুরম থানি বিক্রাম করিয়া বয়া আছিল উবীকা ভাবকে  
 ফালুত বহেছিলী মায়ে গিথানকরে অনুরোধ করিয়া এ'লা  
 দেনারকা উঠা দিলা। উদিন মায়ে গিথানকর এলাত  
 কালিদাস অজাই পরাজিত অ'ছে বুলিয়া প্রত্যক্ষদর্শীর মুখে  
 ছনলাঙ।

গড়রবন্দর স্থানীয় জমিদার কুমার বাহাহুর গিরকে  
 মায়ে গিথানকর এ'লালো পরম তৃপ্তি পেয়া হাদি হাদিত  
 গিথানকরে তার বাসভবনে নিমন্ত্ৰণ করিয়া এলা দিবেইলো  
 বারো তেইরে প্রচুর সম্মান দিলো। উতার গজে কুমার  
 বাহাহুর গিরকে মায়ে গিথানকর প্রতিভার স্বীকৃতি স্বরূপ তেইরে  
 যথেষ্ট পরিমাণে ক্ষেতির জমি দান করেছিল, বারো জমি উতার  
 খ'জানাতো তেইরে বেহাই দিরাছিল।

টিপেরা বারো কুকি সমাজেউ মায়ে গিথানকে যথেষ্ট  
 সম্মান বারো খ্যাতি পা'ছিলী। দামছড়া বারো ফাকুরার



টিপেৰা বাৰো কুকি সমাজে গিথানকে কিসাদে উচ্চ সমাদৰ পা'ছিলী উহান আমি প্ৰত্যক্ষদৰ্শী মানুৰাঙতো এবাকাউ হুনিয়াৰ।

ত্ৰিপুৰাৰ ৰাজপৰিবাৰৰতা মণিপুৰী কৃষ্টিৰ প্ৰতি স্ৰাভাৰিক প্ৰীতি আহান আছে। উহানে মণিপুৰী নৃত্য-বাদ্য বাৰো মণিপুৰী সঙ্গীত বৰাবৰেই ত্ৰিপুৰা ৰাজমহলে উচ্চ সমাদৰ পেয়া আহেছে। মণিপুৰী সংস্কৃতিৰ এমন কোনো উচ্চস্তৰৰ শিল্পী আগো নেই, যেনো ত্ৰিপুৰা ৰাজমহলে সমাদৰ নাপাছে। উচ্চস্তৰৰ শিল্পী আগো নিকুললেই ত্ৰিপুৰাৰ ৰাজকল্লতে তালুৰ নিমন্ত্ৰণ পড়িল। মায়েো বাসকীৰ খ্যাতি চাৰিবেদে সিল'নিৰ লগে লগে তেইবতাউ নিমন্ত্ৰণ পড়িল ত্ৰিপুৰাৰ ৰাজাৰ অন্তৰে। গিথানকৰ এ'লালো পৰম আনন্দ পা'নাই ৰাজা-ৰাণীয়ে তেইৰে ঘৰে বানানাদিয়া বহুদিন আটকেয়া থইলা। কল্লতে এ'লা দিয়া বাৰো অনাবেউ এ'লা লিফা দিয়া মায়েো গিথানকে একাদিক্ৰমে ছয় মাহাৰ চুৰা থায়া ঘৰে ফিৰলী। উতাৰ পিছেউ গিথানকে অনেকবার ত্ৰিপুৰা ৰাজভবনে গিয়া এ'লা দিয়া থাইলীগা। মায়েো গিথানকৰ প্ৰতিষ্ঠাৰ স্বীকৃতি হিনাবে ত্ৰিপুৰাৰ মহাৰাজকুমাৰ মহেন্দ্ৰ চন্দ্ৰ দেববৰ্মা গিৰকে ১৩২৩ ত্ৰিপুৰাকত ( ১৯১৩ ইংৰাজীত ) ব্ৰজ-পদক আহানাত নিজৰ নাঙ বাৰো মায়েো গিথানকৰ নাঙ মুদ্ৰিত কৰিয়া গিথানকৰে উপহাৰ দিয়াছিল।

মায়েো গিথানকে অনেকবার ত্ৰিপুৰাৰ ৰাজভবনে গিয়া এ'লা দিলোণা। তেইৰ এ'লা হুনিয়া মিয়াম সন্তুষ্ট অ'য়া আকথুকুম মহাৰাণীয়ে তেইৰে হুনাব বা'লা আকথম উপহাৰ দেনাৰ প্ৰস্তাব দিলো, কিন্তু মায়েো গিথানকে 'মি বিধবাণো, মি এবাকা বা'লা পিধলে মানুৰে নিন্দা কৰতাই' বুলিয়া মা'কবলো। উপেই 'না, মি মহাৰাণীৰ মোহৰণো মাৰিয়া দিতো, উণো দেখলে মানুৰে কিতাউ মাতে চুৰাতাই' বুলিয়া মহাৰাণীয়ে নিজৰ মোহৰণো দিয়া মায়েো গিথানকৰে বালা আকজুড় উপহাৰ দিলো। মায়েো গিথানকে বালা জুড়

উহান বাসক দেনার সময়ত পিধলো। কিন্তু ছুঃখর বিষয়হান—  
 বা'লা উ-থম মাঙ'পড়ানিয়ে বা মানুরে চরকরেদেনাই মায়ে  
 গিথানকে উ-থম মিয়াম দিন পিধে নুরারেছে। বা'লা উ-থম  
 কুস্পেই কিসাদে মাঙ'ইল উহান সঠিক করে মাতে নুরারিয়ার।  
 কুনো কুনো'গাই মাতলাতা, মায়ে গিথানকে বা'লা উ-থম ঠিকক  
 গিরকর ঘরে থয়া গেছিলীগা সময়ত ঠিকক গিরকর কনাক  
 জিপুত উতাই অজ্ঞতাবশত : উ-থম গলা বেলাছিল। আরাক  
 আকতারাতো হনলাঙতাই, বালা উ-থম ইমে গড়বন্দর  
 তেইর ঘরেতই মানুরে চরকরেছি। যেতাউ অ'ক, বা'লা  
 উ-থম মাঙ'নিয় আগরতলার বানীরাঙ গেলেগা উ-থম সম্পর্কে  
 বিশ্বাসযোগ্য কুনো জবাব দেনা নুরারতই ছুঃখে মায়ে গিথানকে  
 বুঝে ঝুঝে আহির পানি বেলাছে, এবং বস্তুত : উতার পিছে  
 তেই আর আগরতলার রাজকনুঙে নাগেছেগা।

মায়ে গিথানকর দিব্য জীবনর য়ারি আহান গিথানকর  
 পুতোক ধনো গিরকে একাধিক মানুরাঙ দিয়া গেছেগা। য়ারি-  
 হান এহান : ধনো গিরকে দেহেরতা— মায়ে গিথানক  
 এগো প্রায়ই নাহিনেয়া থাইরী। উহানে তা মালবরে 'না  
 হিনাকুরী' বলিয়া প্রায়ই উক্তি করলো। আকদিনতে  
 ধনো গিরকে উসাদে মাততে মায়ে গিথানকে 'এঃ, মি নাহি-  
 নাউরিতা, তি হারপাছততা! মোর গারিগোদে চাতা'  
 বলিয়া মাতেছে। উবাকা তেইর গারিগোদে চেইতে ধনো  
 গিরকে দেহেরতা—মায়ে গিথানকর মুরগোত্ত অ'করিয়া গারিগো  
 হারিগো পানিলো ভাহিয়া য়ারগা।

য়ারি এহান অনেকে হয়তো বিশ্বাস নাকরতাই, কিন্তু  
 ভগবানর কৃপা পাছি গিরিগিথানীর দিব্য জীবনে এসাদে অনেক  
 অলৌকিক ঘটনা ঘটে। অবশ্যই, মায়ে গিথানকে কতিহান  
 ভগবানর কৃপা পাছিলী, উহান আমি নিশ্চয় করিয়া মাতে  
 নুরারিয়ার ; কারণ গিথানকর জীবনর বিস্তৃত বিবরণ আমি




মাপাছি। তবে গিথানকর দেহত্যাগর বিবরণ উহানাত মনে  
অ'রতা গিথানকে ভগবানর যথেষ্ট কৃপা পা'ছিলী। গিথানকর  
দেহত্যাগর বিবরণ হান এহান :

আকথুরুম মায়ে গিথানকে পুতোক ধনোষে মাতলো,  
“ বাবা, মিতে বুড়া অ'যাউরিগানায়; যানার দিনো বাদা  
অ'ইল। হানতে; তো'র মনর কুনো ইচ্ছা থা' থাইলে মাত।”  
পুতাকে মাতলো, “ না ইমা, মোরতা অ'নু কুনো ইচ্ছা নেই।  
তবে ইমাতে হুদা বিদেশ বুলিয়া থাউরী হানতে, ইমে মি  
মাগোরিহান— ইমাই শেষকালে ঘরে আয়া মো'র মুণ্ডে দেহত্যাগ  
করানি।” উপেই মায়ে গিথানকে মাতলো, “ না বাবা,  
ঐ আশা উহানতে মি পুরানি হুরারতৌ; কারণ তি মুণ্ডহানাত  
থাইলে মো'র ঠাইগো নিকুলিয়া যানাহান হিনপেইতই। মিতে  
ইমে ছড়ার পারে ( রাজনগরে ) গিয়া মরতৌগাগোনা। ”

উতার পিছে রাজনগরর ঠিকক গিরকর বহক ইমাসেনা  
গিথানকরে হুরারগো করিয়া জুতেছি রাস-আহান বাগাদেনারকা  
মায়ে গিথানকে নিমন্ত্রণ পেইলো। রাস উহান বা'গাদেনাত  
যানার আগে গিথানকে গড়রবন্দর হাবি প্রিয়জনর লগে উনা'য়া  
গেলীগা, বারো যিতেগা তেই'র মরণর পুতি উতাউ হাবি নিয়া  
গেলীগা। রাজনগরে গিয়া গিথানকে যথারীতি রাস উহান  
বা'গাদিলো।

রাসহান অ'ইল দিন উহানর ঘটনাতান : দিন উহান  
মায়ে গিথানকরতা গারিগো খানি জুত না'ছে বুলিয়া তেই  
তেই'র পড়ুরা ডা'কুলী'রে রাসধারীগোর ফামে বহাদিয়া, নিজে  
বাদাত ফাম আহানাত ওয়া ওয়া রাসহান পরিচালনা করাত  
লাগেছে। অ'নু রাসে মায়ে গিথানকে প্রায়ই ডা'ক বারেইলো।  
কিন্তু উদিন তেই হুরারানিয়ে তেই'র পড়ুরা ডা'কুলী'র গজে ডা'ক  
বারানির ভারহানো পড়িল। রাসহান ভজিহানাত পড়িলগা  
সময় উহানাত মায়ে গিথানক ধীরে ধীরে অচেতন অ'ইলী।

ঐ অবস্থাত রাসহান চলাকালে শ্রীকৃষ্ণর অন্তর্ধানর সময়ত মায়ে গিথানকে দেহত্যাগ করলো। উতার পিছে রাসহান সামকরে লমকরিয়া গিথানকর সংকারর জুত করানি অ'ইল। রাসে হমাছিলা গোপী উতাই ইমে গোপীর পুষাক উতালো মায়ে গিথানকর মৃতদেহগো তুলিয়া বইরাকর পারে নিয়া সংকার করলাগা। সংকার করানির সময়ত মেইকেই করলোতা অর্থাৎ মুখাগ্নি দিলোতা উদিনকার রাসে শ্রীকৃষ্ণগর ভূমিকাত আছিল গোবিন্দবল্লভ-নাডর শো উগোই। রাসর গোপী বারো কৃষ্ণ হাবিয়ে মায়ে গিথানকর সংকারর পিছে ঘরে ফিরিয়া আয়া তান্নর পুষাক খুললা। উতার পিছে কুম বরণ আহান আয়া মায়ে গিথানকর সংকারর ফাম উহান ধয়া মুছিয়া নিলোগা। উদিন গোপী বারো রাসর দর্শক হাবিয়ে কিসাদে কাদে কাদে মায়ে গিথানকরে তেইর রাসধারীর পুষাক উহানলো সংকারে নিলাগা বারো ফিরিয়া আয়া হাবিয়ে বুরে বুরে কাদলা, ঐ করুণ দৃশ্য উহান এবাকাউ রাজনগরর বয়স্ক মান্নর মুখেত ভনিয়ার। মায়ে গিথানকর দেহত্যাগর এ বিবরণ এহানাত্ত আমি দৃঢ়ভাবে অনুমান করে পারিয়ার যে, মায়ে গিথানকর জীবনে অবগ্ৰই ভগবানর কৃপা খানি পড়েছিল।





# অজ্ঞা ধনসেনা (ৰামায়ণ-কীৰ্তনী)

ভাৰতৰ প্ৰায় হাবি সমাজে এবং দক্ষিণ পূৰ্ব এশিয়াৰ প্ৰায় হাবি দেশেই ৰামলীলা কীৰ্তনৰ প্ৰথা আছে। বিষ্ণুপ্ৰিয়া মণিপুরী সমাজে প্ৰাচীন যুগেই অ'কৰিয়া ৰামলীলা ঘৰে ঘৰে গল্পৰ আকাৰে এবং ছোট ছোট গীতিকাৰ আকাৰে প্ৰচলিত আছিল। উহানৰ প্ৰমাণস্বৰূপ আমি মাতে পাৰিয়াৰ যে, আমাৰ ভাষাৰ প্ৰাচীনতম নিদৰ্শন-স্বৰূপ যে বৰণ ডাহানিৰ এসাহান (আনুমানিক খ্ৰীষ্টীয় ১৫শ শতক) পেয়াৰ, উহানাত ৰাম, লসমন, ৰাবল, বীৰবাউ এসাদে ৰামায়ণৰ প্ৰধান চৰিত্ৰ উহানিৰ উল্লেখ আছে : যথা—

“হৰিয়ো ৰামো লেইমেলতে কুঙগোই পিত্ত করে।

ৰাবলৰ পুতো বীৰবাউ, বীৰবাউৰে যুবৰ ধিয়ান কইলো।  
যুগৰ ধিয়ান কৰেৰে নাই লসমনে ফুলৰ লেইবাউ দিলো।”  
কিন্তু বিস্তৃত গীতিকা বা কীৰ্তনৰ আকাৰে আমি আমাৰ কৃষ্টিত ৰামায়ণ-কথা পাছিতা এ শতাব্দীৰ তৃতীয় দশকৰ মাঝামাঝিত অৰ্থাৎ ১৯২৪-২৫ খৃষ্টাব্দৰ সময়ত। এ ৰামায়ণ-গীতিকা প্ৰবৰ্তন কৰেছেতা শিংলাৰ গুৰামাজি গাঙৰ নবসিং অজ্ঞা গিৰকে। কিন্তু গিৰকে ৰামায়ণ কীৰ্তনৰ পৰিপূৰ্ণ ৰূপ উহান দেনা নুৰাৰেছে এবং উতাৰ যথাযথ বা বিশদভাবে প্ৰচাৰো কৰে নুৰাৰেছে। বিষ্ণুপ্ৰিয়া সমাজে ৰামায়ণ কীৰ্তনৰে পৰিপূৰ্ণ ৰূপ দিয়া উতাৰ প্ৰচাৰ বাৰো প্ৰসাৰ কৰানিৰ শ্ৰেষ্ঠ কৃতিত্বহান য়াৰগাতা নবসিং অজ্ঞাৰ খুলা বৈয়ক বলদেব সিংহ গিৰকৰ পুতোক অজ্ঞা ধনসেনা গিৰকৰাঙ। এ গিৰক এগোই তাৰ চিত্তকৰ্ষক সুরৰ বন্ধাৰ বাৰো নয়নমুগ্ধকৰ অভিন্নস্বৰ মাধ্যমে ৰামায়ণ গীতিকাৰে এ সমাজে জনপ্ৰিয় কৰিয়া তুলেছে। এ গিৰকৰ অনেক পড়ুৱাই গিৰকৰ বিজ্ঞা এহান শিক্ষা

কৰিয়া ৰামায়ণ গান গেইলা এবং গেইতাৰা, কিন্তু ধনসেনা গিৰক ৰামায়ণ গান হুনিয়া বাৰো দেহিয়া যে তৃপ্তিহান গেইলাও, উহানৰ তুলনা নেই। প্ৰত্যক্ষদৰ্শী হাবি গিৰিগিথানীৰ চিত্তপটে এৰাকাউ গিৰক উগোৰ ৰামায়ণ-গান বাৰো অভিনয়ৰ ভঙ্গি উতা জাগ্ৰত অ'য়া আছে; বাৰো গিৰিগিথানী উতা হাবিয়েউ গিৰকৰে শ্ৰদ্ধা সহকাৰে স্মরণ কৰতাৰা। উহানে আজি বিষ্ণুপ্ৰিয়া মণিপুৰী সমাজে ৰামায়ণ-গান প্ৰচাৰৰ শ্ৰেষ্ঠ কৃতিত্ব বহন করেছে এ-অজা ধনসেনা গিৰকৰ জীবনীহান খানি আলোচনা কৰিয়া তাৰ প্ৰতি আমাৰ কৃতজ্ঞতা বা শ্ৰদ্ধা খানি নিবেদন কৰিক।

অজা ধনসেনা গিৰক জন্ম অ'ছিলতা শিংলাৰ তুলভ-ছড়ায় কাদাৰ গুৰামাজি গাঙে ১৩১০ সনৰ ভাদ্ৰমাহাত ( ১৯০৩ ইংৰাজীৰ সেপ্টেম্বৰে )। গিৰকৰ পিতৃদেবৰ নাম শ্ৰীবলদেব সিংহ, কিন্তু গিৰকৰ মাতৃদেবীৰ নাম অ'মি অনেক চেষ্টা কৰিয়াউ হাবিলা 'নুৰাবলাও। ধনসেনা গিৰকৰ গোকুলচান নামে খুলা বেয়ক আগৌ আছিল। ধনসেনা গিৰকৰ পিতৃদেব শ্ৰীবলদেব গিৰক কুকৰ মন্ত্ৰিৰি হিসাবে নামে কৰেছিল; ধনসেনা গিৰকৰ খুলা বেয়ক গোকুলচানেউ বাপকৰ মন্ত্ৰিৰি বিছা উহান হিকেছিল।

ধনসেনা গিৰকে গৃহিণী হুগো গ্ৰহণ কৰেছিল, কিন্তু দ্বিয়োগিৰ কুনোগোৰেউ তা সামাজিক নিয়মমতে বিবাহ নাকৰেছে। গিৰকে ৰামায়ণ কীৰ্তন গেইতেগা তাৰ অভিনয়ে-গানে মুগ্ধ অ'য়া গিথানক দিয়োগিয়ে গিৰকৰে পতিত্বে বরণ কৰেছিলা। পইলা গিৰকৰে পতিত্বে বরণ কৰাণিৰ বাশাক কৰলোতা প্ৰতাপগড়ৰ কেছৰ গাঙৰ কমলা বুলিয়া ৰূপৰতী নিঙোল আগৌ। ধনসেনা গিৰকে গিথানকৰ বাশাক উহান খদিলো, কিন্তু অল্প বয়সে গৃহিণী উগো দেহত্যাগ কৰলো এবং তেইৰ উৰে জন্ম অ'ছিলী তুলসী নামে নিঙোলশো উগৌ



যৌনময় আগেই মৃত্যুবরণ করলো। উত্তার কতো বছর পিছে একেইভাবে গিরকর অভিনয়ে-গানে আকৃষ্ট অ'য়া প্রতাপগড়েরই কাটাবারী গাওর বিনোদিনী বুলিয়া নিঙোল আগেই গিরকের শক্তিতে বরণ করানি মনেইলো আরো ধনসেনা গিরকে গিথানকর আশাহান পুরাদিলো। বিনোদিনী গিথানকর গর্তত ধনসেনা গিরকর নিঙোল ছুগো বারো মুনিজিপুত ছুগো জরম অ'ইলা; মুনি জিপুত দিয়োগি অ'ইলাতাই শ্রীঅজয় কুমার সিংহ বারো শ্রীকৃষ্ণকুমার সিংহ। মুনিশো উগি পূর্ণ যুবক অ'নার আগেই বিনোদিনী গিথানক দেহভাগ করলো। উত্তার পিছে ধনসেনা গিরকে তার খুলা বেয়ক গোকুলচানরাঙ শোঁগির বক্ষণাবেক্ষণর দায়িত্বহান একরকম সম্পূর্ণভাবে এরাদিয়া বাহিরে বাহিরে রামায়ণ গান গেয়া থাইল।

ধনসেনা গিরকে পড়াশুনা একরকম নাকরছে বুললেউ চলের— প্রথম ভাগ কি দ্বিতীয় ভাগ পর্যন্ত তামকরছে; অর্থাৎ তারতা বর্ণ-পরিচয় মাত্র অ'ছে। কনাকতো পুঁঠি তারতা এ'লা-নাছাদে প্রচণ্ড আগ্রহ দেহা দেছিল। পাঁচ বছর বয়সেত তা রাসে কুঞ্চগো অ'য়া নাছানি অ'করেছিল, এবং নাছাত পারদর্শিতা থানাই তা কুঞ্চগো অ'য়া অনেকবার নাছেছিল।

ধনসেনা গিরকর জেরতাক নব সিং অজা দল ভুড়ার কাদার দরগারবন্দে ঘরবাড়ী করিয়া আছিল। গিরক উগেই সমগ্র রামায়ণ এহান বাংলালো নাটকাবারে ইকরিয়া বারো যাদাদলর অনুকরণে নাটকর দল আহান হঙকরিয়া ও দল উতানলো রামায়ণ অভিনয় করে করে বুললো। নৃত্যকলা বারো অভিনয়েদে ধনসেনা গিরকর পারদর্শিতা দেহিয়া নব সিং গিরকে তারে দরগারবন্দে মিয়া আকুবালা থয়া রামায়ণ-অভিনয় শিক্ষা দেনা অ'করলো। ধনসেনা গিরকেউ রীতিমতো অজা বরিয়া জেরতাকরাঙ রামায়ণ-গান তামকরানি অ'করলো। যেকা সময় আহানি আঁতে পার, উবাকাই তা লাজলজ্জা বেলেয়া

আকখুলাগোই মনে মনে অজাগোরে ভক্তি করিয়া নাটকর অভিনয় বারো অঙ্গভঙ্গি অভ্যাস করিয়া থাইল। তার নমুনা উহান দেহিয়া গাওর মানুষে তারে পাগল অ'ইল সাত বুলিয়াউ নিঙকরলা ; কিন্তু তার জেরতাক বা অজা গিরকে তার নিষ্ঠা উহান দেহিয়া তারেলো ডাওর ভরসা আহান করেছিল। অল্প দিনেই ধনসেনা গিরক অভিনয় শিক্ষা করিয়া নাটকর বিভিন্ন ভূমিকাত লামানি অ'করলো। কনাককালে পইলা গিরকে লবকুশর ভূমিকাত লামিল ; উতার পিছে খানি ডাওর অ'ইল আরো তা রামর ভূমিকাত লামিল ; পিছেদে হনুমানর ভূমিকাতো লামেছিল। ধনসেনা গিরক অভিনয়ত নাটক দল উহানাত শ্রেষ্ঠ অভিনেতাগো রূপে গণ্য অ'ইল। যে কুনো ভূমিকাত তা লামে পারলো, এবং যে ভূমিকাত লামিল উহানরে তা যথাযথভাবে পরিস্ফুট করে পারলো।

কুনো নাটকর দল আহান সাধারণত : দীর্ঘ দিন জিংতা অ'য়া নাথার। নবসিং অজার দলহানো দীর্ঘদিন জিংতা অ'য়া থানা ছুরারলো। কতো বছর পিছে দলহান বা'গিল উবাকা নবসিং গিরকে রামায়ণ নাটকর চরিত্রর কথা উতারে নিজর ভাষালো নুৱা করে সাজেরা পদকীর্তনর চণ্ডে রামায়ণ-গান দেনা অ'করলো। নবসিং অজা গিরকে রামায়ণ নাটকরে রামায়ণ-গানেদে বলেইলোতা তার প্রায় ৫৫-৬০ বছর বয়সে। ঐ সময়ত ধনসেনা গিরকর বয়স ১৫-২০ বছর আছিল। ঐ বয়সেই নবসিং অজাই রামায়ণ-গান দেনার সময়ত হাদি হাদিত ধনসেনা গিরকে অংশ গ্রহণ করলো। নবসিং অজার বৃদ্ধবয়সে ধনসেনা গিরকে ঐ রামায়ণ গীতিকারে আরতাউ সুন্দর বারো পরিপূর্ণভাবে রচেয়া এবং নিজে কীর্তনর দল আহান হওকরিয়া রামায়ণ-গান করানি অ'করলো। রামায়ণ-গীতিকারে নুৱা করে হাজেইতে গিয়া ধনসেনা গিরকে তার অজা এবং জেরতাক নবসিং অজার ইকরা গীতিকার ভাষা উতারতাউ বহুলাংশে



পরিবর্তন করলো। নব অজা মন্মানির পিছে বিষ্ণুপুর  
( বনরগাঙ ) গাঙর ঠাঙর সিং বুলিয়া আত্মীয় আগোর উত্তোগে  
মনসেনা গিরক বনর গাঙে ঘর করিয়া থাইলগা। উতার  
পিছেই তা বীতিমতো রামায়ণ-গান দিয়া বুলানি অ'ক'রলো  
এং অল্প দিনেই চারিয়ো বারাদে তার খ্যাতি ছড়েয়া পড়িল।  
কাঙাড, ত্রিপুরা অঞ্চলর বিষ্ণুপ্রিয়া বারো স্থানীয় বাঙালী  
সমাজর হাবি কোণাকুলেদেত্ত নিমন্ত্ৰণ পেয়া পেয়া গিরকে  
রামায়ণ গান দিয়া বুলে বুলে থাইল। তা য়েবেদে গেলগা  
উবেদে তার খ্যাতি। তার গান বারো অভিনয়ে মুগ্ধ অ'য়া  
স্থানে স্থানে অসংখ্য গিরি গিথানীয়ে তারে রূপার মেডেল  
উপহার দিয়াছিল। এসাদে করে গিরকে মেডেল পাছিলতা  
প্রায় দুইশো আড়াইশোহান। আকস্মিক ত্রিপুরা রাজার  
অন্দরমহলে গিরকে রামায়ণ দিয়াছিলগা উপেই মহারানীয়ে  
হারৌরে আ'ক'য়া সাতহান মেডেললো মালাডাল বানেয়া নিজর  
আ'তে গিরকরে উপহার দিয়াছিলী; উতার গজে পশমীর  
চাবর আহারৌ দিয়াছিলী। শিলঙে তৎকালীন আসামর  
গভর্নরর বাসভবনে রামায়ণ দিয়াউ গিরকে ভূয়সী প্রশংসা বারো  
আর্থিক উপহার পাছিল। তার খ্যাতি কলিকাতা পেয়া গিয়া  
যৌ অ'ইলগা; উপেইতো গিরকরাঙ রামায়ণ-গানর নিমন্ত্ৰণ  
আছিল। ও নিমন্ত্ৰণ পানাই গিরকে তার দলহান আরতাউ  
সুগঠিত করিয়া গেলগা এং কলিকাতাত তার রামায়ণ-গানলো  
বহু উচ্চস্তরর গিরিগিথানীয়ে মুগ্ধ করিয়া আছিল।

অজালোকর সাফল্য কেবল মাত্র তানুর স্বকীয় উপস্থা-  
পনা বা পরিবেশনলো প্রমাণিত না'র; তানুর সাফল্য প্রমাণিত  
অ'হতা তানুর শিষ্য-প্রশিষ্যর ধারালো। এ দিকেউ অজা  
মনসেনার সাফল্য আমারতা একবাক্যে স্বীকার করানি লাগতই।  
গিরকে বিষ্ণুপ্রিয়া মণিপুরীর প্রায় প্রত্যেক অঞ্চলে তার শিষ্য  
করিয়া থয়া গেছেগা। গিরকরতা সর্বমোট চৌদ্দগো শিষ্য

আছিল। বুলিয়া তার পুতোক কৃষ্ণকুমার গিরকে দাবী করলো।  
উতার মাজে এ ছয়োগো শিষ্যর নাঙ বিশেষভাবে উল্লেখযোগ্য :

১) শ্রীমণি সিংহ ( নরসিংপুর ), ২) শ্রীবুলন সিংহ  
( বাগরাঙ্গন ) ৩) শ্রীনীলমণি সিংহ ( প্রতাপগড় ),  
৪) শ্রীকালিদাস সিংহ ( প্রতাপগড় ), ৫) শ্রীরতনমণি সিংহ  
( অ'করা ) বারো ৬) শ্রীকৃষ্ণকুমার সিংহ ( গুরামাজি-ধনসেনা  
গিরকর পুতোক ) ।

লম'ইতেগা অজা ধনসেনা সম্পর্কে কথা আহানি মাতানির  
প্রয়োজন মনে করিয়ার। কথাহান এহান : কেবলমাত্র বর্ণপরি-  
চয়প্রাপ্ত গিরক আগোর পক্ষে জীবনে এসাদে সাফল্য লাভ  
করানি সম্ভব অ'ইলতা কিতা'য়া? আমি দেহিয়ারতা গিরকর  
সাফল্য এহানর পশ্চাতে তিনহান কারণ : ১) তার জন্মলব্ধ  
প্রতিভা , (২) তার নিষ্ঠা বারো প্রচেষ্টা এবং , বিশেষ করিয়া ,  
৩) তার গুরুভক্তি । গিরকর পরিবারর সদস্যরাঙতো ধনসেনা  
গিরকর প্রচণ্ড গুরুভক্তির কথা ছনলাঙ। অজা বরানির  
পিছেত্ত পুরি তা মনপ্রাণদিয়া অত্যন্ত নিষ্ঠার সঙ্গে তার অজার  
সেবাসেবি করলো , যার ফলে তার অজায়ো তারে মনপ্রাণ দিয়া  
স্নেহ করলো । দেহত্যাগর আগে অজা গিরকে ধনসেনা গিরকরে  
কাদাত ডাহিয়া চুমা আহান দিয়া তারে প্রাণ ভরিয়া বর দিয়া  
গেছিলগা-এ রামায়ণ-গানে তা দিগ্বিজয়ীগো অ'ক বুলিয়া ।  
গিরকর অজার শুদ্ধস্নেহসঙ্গাত বর উহান নিশ্চয়ই পিছেদে সফল  
অ'ছে বুলিয়া আমি উচ্চকণ্ঠে মাতে পারিয়ার। যেতাউ অ'ক ,  
দীর্ঘদিন রামায়ণ-গান প্রচার করিয়া এবং ফামে ফামে তার  
শিষ্যরাঙ বিদ্বাহান দিয়া ১৩৭৪ সনর কার্তিক মাসে ( ১৯৬৭  
ইংরাজীর নবেম্বর মাসে ) ৬৪ বছর বয়সে বহুমূত্র রোগে দশ-  
বারো দিন ভুগিয়া অজা ধনসেনা দেহত্যাগ করলো । গিরকর  
শ্রাদ্ধর দিনে গিরকর পড়ুরা-জিপুত হাবিয়ে তিল'য়া রামায়ণ  
গানলো উপস্থিত মানু হাবিরে আহির পানির ধারালো বাছরা-  
ছিল।



অজা ধনসেনার দেহত্যাগর পিছে গিরকর জিপুতে  
 আত্মকার গুৰামাঞ্জি গাঙে ভিটা লয়া ঘর করিয়া থাইলাগা । অজা  
 ধনসেনা গিরকর জিপুত দ্বিয়োগো এবাকাউ গুৰামাঞ্জি গাঙে  
 আছি । দ্বিয়োগির ভিতরে খুলা পুতোক বৃক্ষকুমার গিরকে  
 যদিও অজা ধনসেনাৰাঙতো বীতিমতো রামায়ণ-গান না  
 কিকেচে , তথাপি পিতৃদেবর গান বাৰো অভিনয় উতা হাবি  
 গিরকে দেহে দেহে আয়ত্ত করেছে । অজা ধনসেনার দেহত্যাগর  
 পিছে পিতৃদেবর বিদ্যাহান রক্ষা করানিবকা বুলিয়া গিরক  
 উগোই পিতৃদেবর সাদে রামায়ণ-গানর বৃত্তি উহান অনুসরণ  
 করিয়া আছে ।







# অজা নরোত্তম (রাসধারী)

বিষ্ণুপ্রিয়া মণিপুরীর সাংস্কৃতিক জগতে অজা নরোত্তম গিরক গিরক নাঙহান বহুজন বিদিত। যদিও মণিপুরী সংস্কৃতির বিভিন্ন দিকে গিরকর আধিপত্য আছিল, তথাপি রাসধারী হিসাবেই তা সমধিক খ্যাত। বিষ্ণুপ্রিয়া মণিপুরীর ভিতরে আজি পেয়া যতোগো রাসধারীর আবির্ভাব আছে ওতার ভিতরে এ গিরক এগোর সাদে বাৎপতিসম্পন্ন এবং খ্যাতিমান ধর্মীয় গিরক বা গিথানক আগো না নিকুলেছি। সামকরে মাতিক বুললে, ভামুগাছ, ত্রিপুরা বারো আনামে এ গিরকর জুড়ি রাসধারী আগেউ নেয়'ছিলো, বর্তমানেউ নেই। গিরক এগোর শিষ্য-প্রশিষ্য এবাকাউ ভামুগাছ, ত্রিপুরা বারো কাছাড়-করিমগঞ্জে জীবিত থায়া গিরকর রাসর দ্বারা উহান জীবিত করিয়া থুরাছি। গিরকর এ শিষ্য-প্রশিষ্যর ভিতরে হাবিত্ত উল্লেখযোগ্য অ'ছেতাই এ গিরকর গুণবতী জিলক শ্রীমতী সরোজিনী দেবী। গিথানক উগো বর্তমানে কমলপুরস্থ উত্তর মোহনপুর গাঙে (টিলগাঁওত) বাস করিয়া আছে। অজা নরোত্তম গিরকর জীবনী সম্পর্কে আমি যেতা যেতা উপাদান পাছি, এতার অধিকাংশই আমি সংগ্রহ করেছি। এ সরোজিনী গিথানকরাঙতো। এ সরোজিনী গিথানক এগো নরোত্তম গিরকর ছেষ্ঠী নিভোলগো। তেই নিয়মমায়িক স্কুলর শিক্ষা মাপেইলেউ মুখে মুখে পিতৃদেবর রাসলীলা উতা হাবি অতি সহজে হিকে পারলো বারো রাসপ্রশিক্ষণো যথাযথভাবে দেনা পারলো বুলিয়া নরোত্তম গিরকে তেইরে মনেপ্রাণে স্নেহ করলো। অজা নরোত্তম জরম অ'ছিলতা বর্তমান বাংলাদেশর জিপুর গাঙে ১৯০১ খ্রীষ্টাব্দত। গিরকর পিতৃদেবর নাঙহান

আছিলতা শ্রীভোবান্ধো সিংহ, কিন্তু গিরকর মাতৃদেবীর নাঙ  
আমারাঙ এবাকাউ অজ্ঞাত। নরোত্তম গিরকরতা কনাককা-  
লেভই নৃত্যগীতর বারাদে ডাঙর আকর্ষণ আহান আছিল এবং  
কনাকেভই তা বিভিন্ন সাংস্কৃতিক অনুষ্ঠানে অংশগ্রহণ করলো।  
ঐ সময়ত বিষ্ণুপ্রিয়া সমাজে আধুনিক শিক্ষার প্রচলন মিয়াম  
না'ছিল যদিও, এ গিরকরতা আধুনিক শিক্ষার বারাদেউ দৃষ্টি  
আছিল। কিন্তু পারিবারিক বিভিন্ন কারণে, বারো তার নিজর-  
তাউ নৃত্যগীতর বারাদে অধিক মনোযোগ থানাই গিরকে  
আধুনিক শিক্ষার ক্ষেত্রেত মিয়াম অগ্রসর অ'না নুবারলো; অষ্টম-  
মান শ্রেণী পর্য্যন্ত ইংরাজী শিক্ষা পানার পিছে তা শিক্ষার এ  
দিক এহান বাদ দিয়া নৃত্যগীতলো! জীবনহান কাটানির সংকল্প  
নিলোগা।

নরোত্তম গিরকর সাংস্কৃতিক জীবনে অনেকবার পটপরি-  
বর্তন ঘটেছে। কনাকে পইলা গিরকে যাত্রাদলর নর্তকীর  
ভূমিকাত অংশগ্রহণ করলো। উতার পিছে তা যাত্রাদলেই  
হাস্যরস পরিবেশনে বারো অগ্ৰাণ্য চরিত্র— বিশেষ করিয়া  
নারীচরিত্রর ভূমিকাত লামিল। যুবাকাল পর্য্যন্ত গিরকে মুটা-  
মুটি এ পেশা এহানলো কাটেইলো। তবে ঐ সময়েই গিরক-  
রতা বাংলা পদকীত'ন, মণিপুরী কীত'ন, মৃদঙ্গবাদন, রাস  
ইত্যাদি বিভিন্ন দিকে দৃষ্টি আকৃষ্ট অ'ছিল।

যুবাকালর পরিণত অবস্থাত নরোত্তম গিরক বালিগাঁওর  
কাদার ছাতক-গাঙে অ'ঙ'য়া গেলগা। উপেই যানার 'পিছে  
শ্রীপুরর তারাকতা নাঙর নিঙোল আগোর লগে তার বিবাহ  
অ'ইল। পরবর্তীকালে সেনাতম্র নাঙর আশ্বাক গিথানক  
আগোরেউ গিরকে বিবাহ করেছিল। বিবাহিত জীবনর  
প্রারম্ভেই নরোত্তম গিরকর সংস্কৃতিসেবার ধারাগো বদলিয়া  
প্রাধিকার ভক্তিগীতর বারাদে দৃষ্টিহান গেলগা। এ পর্য্যয়ে  
গিরকে পইলা সাধনা অ'করলোতা বাংলা পদকীত'নলো।



সংস্কৃতি-সাধনার এ পর্যায়ত তা নৌকাবিলাস, মানভঞ্জন, নিমাই-  
সন্তান ইত্যাদি বিভিন্ন পালা-কীর্তন গেয়া মণিপুরী এবং বাঙালী  
-এ ঘিয়ো সমাজেউ খ্যাতি অর্জন করলো। গিরকর ছিলক  
সবোজিনী গিথানক খানি ডাঙর অ'য়া ৮-৯ বছর বয়স অ'ইলী  
উবাকা নরোত্তম গিরকে পদকীর্তন দিতে তেইয়ো খলপাঙে  
বয়া তারে এলা পাঙকরলো।

এসাদে কতো বছর পদকীর্তন চর্চা করানির গিছে  
নরোত্তম গিরকরতা মণিপুরী কীর্তনর বারাদে দৃষ্টি পড়িল।  
সংস্কৃতির এ দিক এহানাত গিরকে পইল। ইসালপার ভূমিকালো  
লামিল। ইসালপা হিসাবেউ গিরকর ব্যাপ্তি কম না'ছিল,  
এবং কমলপুর পর্যন্ত আহিয়া তা কীর্তনে এলা দিয়া বিশেষ  
কৃতিত্ব দেহেয়া গেছিলগা বলিয়া জনলাঙ। গিরকে ইসালপার  
ভূমিকাত লামেছিল সময়ত আকখুরুম মণিপুৰেত ভানুগাচে  
এলাদেনাত আহেছে ইসালপা আগোর লগে কাঙনাত নরোত্তম  
গিরকে জয়লাঙ করেছিল।

ইসালপার ভূমিকালো কিন্তু নরোত্তম গিরক দীর্ঘদিন  
নাখাইল। কতো বছর গিছে তা ডা'কর বিজাত লামিল এবং  
কীর্তনাদিত মৃদঙ্গবাদকর ভূমিকা নিলোগা। এ মৃদঙ্গবাদনর  
বিজা এহানলো নরোত্তম গিরক বহু বছর কাটেইলো, এবং ও  
সময়তেই গিরকে অনেক খ্যাতনামা উচ্চপৰ্যায়র গায়ক এবং  
নৃত্যশিল্পীর সংস্পর্শে আহিল। বালিগাঁওর বিখ্যাত গায়ক  
তথা নৃত্যশিল্পী অজা নীলেশ্বর মুখার্জি গিরকর নিকট সংস্পর্শত  
তা আহেছিলতা-এ মণিপুরী এলা-কীর্তন বারো মৃদঙ্গবিজার  
মাধ্যমে। গিরকে অধিকাংশ সময়েই নীলেশ্বর গিরকর লগে  
এলা বারো ডা'কর চর্চা করিয়া কাটেইলো।

নরোত্তম গিরকর সংস্কৃতিক্ষেত্রর পরিসরগো ক্রমে বৃহত্তর  
অ'না অ'করলো। বিশ্বকবি রবীন্দ্রনাথ ঠাকুরে বালিগাঁওর  
নীলেশ্বর মুখার্জি গিরকরে শান্তিনিকেতনে মণিপুরী নৃত্য

শিক্ষকগণ হিসাবে নিয়োগেছিলগা উবাকা তার লগে নরোত্তম গিরকো মৃদঙ্গবাদক হিসাবে গিয়াছিলগা। শান্তিনিকেতনে নীলেশ্বর গিরকে মণিপুরী নৃত্য শিক্ষা দিলো সময় উহানাত নরোত্তম গিরকে তার লগে মৃদঙ্গসঙ্গত করলো। তদুপরি রবীন্দ্রনাথ গিরকর অনেক এলার গজে নৃত্য হুঙ্করানির সময়ত নীলেশ্বর গিরকরে তা অনেক নৃত্যভঙ্গি বারো তালর সংযোজনালো সাহায্য করেছিল। নীলেশ্বর গিরকে রবীন্দ্রনাথর যে যে এলার গজে নৃত্যরচনা করেছিল, উতা অ'ইলতাই :

১) 'নির্মলকান্ত ! নমোহে নম :', ২) 'জ্বলে দিয়ে দাও প্রদীপখানি', ৩) 'দূরের বন্ধু ! সুরের দূতীরে পাঠালো', ৪) 'তুমার শান্তি সুন্দর কান্তি' ইত্যাদি। এলা এতার নৃত্যরচনার সময়ত পুণ্ডলোল বা মৃদঙ্গর তাল সংযোজন করেছিলতা নরোত্তম গিরকে। ভারতর সময় আহানর প্রধান মন্ত্রী শ্রীমতী ইন্দিরাগান্ধী . চলচ্চিত্র জগতর বিখ্যাত অভিনেত্রী হেমামালিনী বারো সায়রা বানো— এতা শান্তিনিকেতনে ছাত্রাবস্থাত থাইতে তানুরে মণিপুরী নৃত্য শিক্ষা দিলোতা নীলেশ্বর গিরকে , এবং ঐ সময়ত নীলেশ্বর গিরকর সহযোগীগো আছিলতা এ নরোত্তম গিরক। ঐ সময়ত নরোত্তম গিরক বিখ্যাত নৃত্যগুরু উদয়শঙ্করর সংস্পর্শতো আহেছিল এবং তার নৃত্যর লগে কতোখুকম মৃদঙ্গবাদনো করেছিল। কুনো কুনো-গোই মাতলাতা— উদয়শঙ্করর নৃত্যত মণিপুরী নৃত্যর প্রভাব পড়েছেতা কুনো কুনো ক্ষেত্রত এ নরোত্তম গিরকর মাধ্যমে উনি।

নরোত্তম গিরকর শান্তিনিকেতন-বাস এহান কিন্তু মিয়াম দিনরহান নাগই ; গিরক উপেই আছিলতা মাত্র চারি পাচ মাস। উতার পিছে গিরকে জিলক সরোজিনী গিথানকরে লগেনিয়া যানাবকা বুলিয়া ঘরে আকখুকম গিয়াছিলগা। কিন্তু সরোজিনীর মালকে সরোজিনীরে নেনা নাদানিয়ে নরোত্তম গিরকো আর শান্তিনিকেতনে নাগেলগা; তার পরিবর্তে



কামিনী কুমার সিংহ নাগর আরাক ডা'কুলা আগো নীলেশ্বর গিরকরে মৃদঙ্গসঙ্গতলো সাহায্য করানিরকা শান্তিনিকেতনে গেলগা।

সংস্কৃতি-সাধনার শেষ পর্যায়ে নরোত্তম গিরকে রাসলীলা গীতির চর্চা আরম্ভ করলো এবং অতি অল্পদিনে এ বিদ্যা এহান আয়ত্ত করিয়া তা ঐ বিষয়ে শিক্ষা দেনা অ'করলো। রাসলীলাগীতিত বাৎসরিক পানার আগে নরোত্তম গিরকর জীবনে ঘটনা আহান ঘটেছিল। ঘটনা উহান এহানঃ

বালিগাঁও গাঙর পশ্চিম বারাদে টিলা আগোর গাঙে সমতল ফাম আহান আছে ; উহানরে 'গোচারণ-ভূমিহান' বলতাৰা। ফাম উহানাত আগে দৌরে রাখুয়াল করলা বলিয়া জনশ্রুতি আছে। ঐ সমতল ফাম উহান মণ্ডলাকৃতি ; উহানর মধ্যস্থলে কদম অ'কজার আছে। কদম উজ্জ্বল তলে শ্রীকৃষ্ণর পদ চিহ্ন আছে, বারো কাদাত বাধাকুণ্ড-শ্যাম কুণ্ড নাঙে কুণ্ড দুগো আছে। সময় আহানাত বাঘ আগো উপেই দিনকার আহিয়া দৌ কাদিয়া গেলগা বলিয়াউ জনশ্রুতি আছে।

আকদিন নরোত্তম গিরকে কুনো প্রয়োজনে ফাম উহানাত বহিয়া আছে সময় ওহানাত তা তাঁর মৃগহানাত ভনার কবচ আগো পেয়া উগো নিয়া ঘরে গেলগা। ঐ কবচ উগো পেইলো দিনেত্ত পুরি নরোত্তম গিরকে তার গারিগোত অলৌকিক শক্তি আহান অনুভব করানি অ'করলো। উদ্দিনেত্ত তার জীবনর গতিপথে কুনো বাধা আহিলে উতা যেন আপনা-আপনি দুরেই অ'য়া যানি অ'করলো ; ফলে তা যেহান করানি মনার উহান করে পারলো।

এ ভনার কবচ এগো পানার পিছেই নরোত্তম গিরকরতা রাস-লীলাগীতির বারাদে দৃষ্টি পড়িলতা। গিরকে এ রাসবিজ্ঞা এহান অল্পদিনে আয়ত্ত করানির লগে লগে তা রাসদারীগো

হিসাবেই খ্যাতি পান। অ'করলো। রাসর হাবি এলা গিরকর মুখে মুখে ; তা কুনো খাতাপত্রত এলা উতা ইকরিয়া না থছে। দেহত্যাগর আগে তার কথ্য সরোজিনী গিথানকরাঙ গিরকে নিজর মুখে মাতিয়া গেছেগা যে, ভগবানে তারে অলৌকিক শক্তি আহান দিয়াছিল ; ঐ শক্তি উহানলো তা ভগবানর লীলাগীতি শিক্ষা দিলোতা।

রাসধারী হিসাবে খ্যাতি পানার পিছে ভানুগাছ, কমলপুর, কৈলাসহর, প্রতাপগড়, শিংলা ইত্যাদি বিভিন্ন কামে রাসশিক্ষা দেবারকা অজা নরোত্তম গিরকরে ডাহে ডাহে নেনা অ'করলো। ঐ সময়ত ভানুগাছর কোনাগাঁওত আকখুরুম রাস-লীলার বিভিন্ন অঙ্গর প্রতিযোগিতালো সাতদিন ব্যাপী অনুষ্ঠান আহানর আয়োজন করানি অ'ছিল। ঐ অনুষ্ঠানে মহাত্মা গান্ধী, জবহরলাল নেহেরু, মোহাম্মদ আলী জিন্না, সরোজিনী নাইডু, কমলা নেহেরু, ত্রিপুরার মহারাজ বীরবিক্রম, কিরণ সিং (?)— এ সাতোগি গিরিগিথানী উপস্থিত আছিল। বারো সাতোগিয়ে সাতো দিনর প্রতিযোগিতাত প্রথম স্থানাধিকারী উভারকা সাতহান মেডেল ঘোষণা করেছিল। ঐ প্রতিযোগিতাত মেডেল সাতোহানো অজা নরোত্তম গিরকে পাছিল ; উহান এ গিরকর ডাঙর কীর্তি আহান। ঐ অনুষ্ঠানর পিছেদে আহে-ছিল। সাতোগো মহান ব্যক্তিয়ে নরোত্তম গিরকরে শান্তি-নিকেতনে যানার পরামর্শ দিলা ; কিন্তু ব্যক্তিগত নানা অশু-বিধার দরুণ গিরকে ঐ পরামর্শ উহান থমা নুয়ারিয়া তার পরিবর্তে বালিগাঁওর কামিনী কুমার সিংহ গিরকরে পেঠুয়া দিলো।

অজা নরোত্তম গিরকে তার রাসলীলার শিল্পহানরে পরিপুষ্ট করানিরকা সব সময় সাধনা করিয়া গেলগা। অধিকাংশ সময়ই গিরকে রাত্তি রাত্তি নির্জনে নৃত্যগীত সাধনা করিয়া থাকিল। মাধবপুরর সেনাচাউবা চাটাজির ঘরে তার নিঙোল



আগের বাস শিক্ষা দেবার সময়ত নবোত্তম গিরকে প্রায়ই রাতি আধার উহানাত মাওপগোত নৃত্যচর্চা করিয়া থাকিল উহান অনেকই দেখেছি।

অজা নবোত্তম গিরকরতা এলা রচনার সামর্থ্যই যথেষ্ট পরিমাণে আছিল। মাধবপুরে বুলনর সময়ত খুপাইছি সিংনারকা নিঙোলপী দল আতানবে প্রস্তুত করতে গিয়া গিরকে ইকবিয়া সুর দিয়াছিল এ'লা আহান জনিয়া সেনাচাউবা চাটার্জি গিরকে ডাক'য়া তার উবেদে কপকবে চেয়া 'নবোত্তম, তি এগোতে অমাটিক ফো'হতগাতাহে।' বলিয়া উক্তি করেছিল। এ'লা উহানর পাবেও আহানি আমি হালালির বজধন চাটার্জি গিরকরাঙতো পাছিত। এসাদে —“হা হা মরি কি এ শোভা! বিজুরি ডামিয়া অমৃত মথিয়া পডিল গোবাব বদন-চান্দে।”

এসাদে বাসধারী হিসাবে খ্যাতিলাভ করানির পরে ভারত-পাকিস্তান বিভাগর সময়ত অজা নবোত্তম গিরক পিতৃভূমি ত্যাগ করিয়া ভারতবর্ষর ত্রিপুরার কাঞ্চনবাড়ী গাঙে গিয়া বাস করিয়া থাকিলগা। উপেই যানার পিছেই গিরকে অবিরাম তার বাস-প্রশিক্ষণর বিদ্যাহান চালেয়া গেলগা।

অজা নবোত্তম গিরকর বাস-প্রশিক্ষণর ভিতরে অনেক অলৌকিক ঘটনা ঘটিয়া গেছেগা। বাস আহানাত শ্রীকৃষ্ণর ভূমিকাত লামেছিল শৌ উগোই গিরকর নিষম না মানানিয়ে বাস-অনুষ্ঠান উহানর অল্প কয়েকদিন পিছে মৃত্যুমুখে পডিল। কৈলাসহাব বাস আহানাত গিরকর নিষেধ না মানিয়া অশুদ্ধ গারিগোলো বাসে হমাছিলী গোপী আগো বাসর হাদিতেই অচেতন অ'য়া পড়েছিলী এবং উতার পিছে মানসিকভাবে বিকৃত অ'য়া বহুদিন আছিলী। পিছে অজা নবোত্তমরে ডাহিয়া নিঙোল উগোৱেলো বাস আহান করানির পরে নিঙোল উগো সুষ অ'ইলী।

অজা নরোত্তমে দেহত্যাগর পিছেউ নানা অলৌকিক লীলা দেহেয়া গেছেগা। গিরকর দেহত্যাগর আগে সরোজিনী গিথানকে তারাত্ত শিক্ষা খানি পানারকা অনুরোধ করলো উবাকা গিরকে মাতলো যে, তা দেহত্যাগ করিয়া গেলেগাউ তেইবতা শিক্ষালাভ করতে কুনো অসুবিধা না'ইতই ; যেবাকা যেহান প্রয়োজন, উহান তারাত্ত ভক্তিলো জানেইলে তেই ঐ বিষয়ে শিক্ষা পেইতই। সরোজিনী গিথানকে অজা নরোত্তমর এ কথাৰ সত্যতা জীবনে অনেকবার উপলব্ধি করেছে। তেই মাতলো যে, রাস-প্রশিক্ষণর ক্ষেত্রেত যে কুনো অসুবিধাত পড়িয়া পবিত্র-ভাবে ভক্তিলো তারাত্ত অসুবিধা উহান জানেইলে গিরকে স্বপ্নে আয়া ঐ বিষয়ে শিক্ষা দিয়া যারগা উনি, এবং এদাদে স্বপ্নে শিক্ষা পেইরী বিষয় উতা তেই আকথুকম ছনিয়াই সম্পূর্ণ আয়ত্ত করে পারিযী— উতারকা দ্বিতীয়বার অভ্যাস করানি না লাগের উনি। অজা নরোত্তমর দেহত্যাগর অল্পদিন পিছে, সরোজিনী গিথানকরে রাখুরাল আহান শিক্ষা দেনারকা নিমন্ত্ৰণ করানি অ'ছিল। সরোজিনী গিথানকে কিন্তু আগে রাখুরাল শিক্ষা নাকরেছে। উহানে, নিমন্ত্ৰণ উহান পানার পিছে তেই অজা নরোত্তমরে পবিত্রভাবে পূজা দিয়া রাখুরাল শিক্ষা দেনারকা প্রার্থনা করলো। উদিন অজা নরোত্তম হপনে আয়া সমগ্র রাতিহান ধরিয়া তেইরে রাখুরাল শিক্ষা দিয়া গেছেগা উনি, এবং সরোজিনী গিথানকেউ ইমে ঐ রাতি উইনাত রাখুরালহান শিক্ষা করিয়া লমকরেছে উনি। এসাদে করে স্বপ্নে অজা নরোত্তমরাত্তো সরোজিনী গিথানকে বুলন-লীলা বারো অত্যাগত লীলাউ হিকেছে বুলিয়া দাবী করলো।

এতা ছাড়া রাসর ব্যাপারে যে কুনো অসুবিধাত পড়িয়া অজা নরোত্তমরাত্ত প্রার্থনা জানেইলে সরোজিনী গিথানকে বিপদেত্ত রক্ষা পেইরী উনি। গিথানকে শিক্ষা দিলো রাস



আহানাত নানা দলাদলিল বিশৃঙ্খলার সৃষ্টি অ'নিরে রাসর দিনে সরোজিনী গিথানকে ঘরেত সালসা ঝানার সময়ত ভক্তি-সহকায়ে অজা নরোত্তমর প্রতিকৃতিগোত পূজা দিয়া হমাদেছে উপেই অজা নরোত্তম সাক্ষাৎ নিকুলিয়া ইঙ্গিতলো। তেইরে তার লগ ধরানিবন্ধা মাতেছে। গিরকে মাওপ পর্য্যন্ত গিয়া মন্দিরর দৌ বারো বৈষ্ণব হমাদিয়া রাসধারীর আসনহানাত গিয়া বহে-ছেগা। সরোজিনী গিথানকেউ অজা নরোত্তমর লগে লগে অ'য়া দৌ বারো বৈষ্ণব হমাদিয়া আসনহানাত অজা নরোত্তমরে হমাদেছে। উত্তার পিছে অজা নরোত্তম অদৃশ্য অ'ছে। উদিনকার রাস উহান আশাতীতভাবে ভাবকর মনোমুগ্ধকর অ'ছিল বুলিয়া সরোজিনী গিথানকে দাবী কয়লো। যেতাউ অ'ক, রাসর এ অদ্বিতীয় অজা নরোত্তম গিরক বহুদিন রাসশিক্ষা দিয়া ১৯৭১ ইংরাজীত ৭০ বছর বয়সে ইহলোক পরিত্যাগ করিয়া গেলগা। দেহত্যাগ করানির আগে গিরকে মাতিয়া গেছেগাতা— “মোর জীবনর আশা না পুরিল ; উহানে মি বা-রো এ সমাজে জরম অ'নাত পড়লু।” অজা নরোত্তম গিরকরে বা-রো এ সমাজে পানাবন্ধা বাছেয়া থাইলাঙ।







# অজা পেড়ার (ইসালগা)

বিষ্ণুপ্রিয়া মণিপুরীর ভিতরে কালে কালে অনেক অজালোক জরম অ'য়া এ সমাজর কীর্তন গীতিকাৰে উচ্চস্তৰে নিয়া গেছিগা । এসাদে অজালোকর ভিতরে অজা পেড়ার রাজকুমার গিরকর বিশেষ স্থান আহান আছে । ইসালগা হিসাবে যথেষ্ট কৃতিত্ব অর্জন করিয়া গেছিগা অজালোক আমার সমাজে আরতাউ অনেক আছি , যেমন , নরসিংপুরর কালিদাস অজা , প্রতাপগড়র দম্প অজা , বাংলাদেশ ত্রিপুরার নীলো এইগা ( নীলেশ্বর মুখার্জি ) ইত্যাদি । তৎসত্ত্বেউ অজা পেড়ার গিরকরে আমি বিশেষ স্থান আহান দিয়ারতা এ কারণে যে , আমার কীর্তনর এলার পরম্পরাগত স্বীতি বা স্মরণ যথারীতি রক্ষা করিয়া উতारे আধুনিক রুচির লগে মিলেয়া উপস্থাপিত করানির ধারা এহানর প্রবর্তন করেছেগো এ গিরক এগো । আমার কীর্তনর এ'লারে এসাদে নুবা রুচির লগে সঙ্গতি থয়া উপস্থাপিত করতে গিয়া আমার কীর্তনে অতিময় বা নাটকীয় ভঙ্গির ধারা আহানবো প্রবর্তন করেছেতা এ গিরকে । আমি নিংশিং অ'য়ার— দিনর নিতির পথরুদ্ধত শ্রীকৃষ্ণ বারো গোপীর বাক্যলাপ উতাংর গিরকে কিসাদে নাটকীয় ভঙ্গিলো উপস্থাপিত করলো ; নিংশিং অ'য়ার— গিরকে কিসাদে জলকেলিত পানিত বুড়ানি , পাশাখেলাত পাশা উড়াদেনা বারো পাশা তুলানি , বংশীশিক্ষাত বংশীবাদন করানি ইত্যাদির অভিনয়লো দর্শকর চিত্তাবর্ষণ করলো ; নিংশিং অ'য়ার— গিরকে কিসাদে সুমধুর ভঙ্গিলো ' বৃন্দাবনে কিবা শোভা '— এলার স্বাধ্যমে বৃন্দাবন বর্ণনা দিয়া বারো ' অশ্বিনাদি লঘিমা ' ইত্যাদি এ'লালো জাগরণর সময়ত রাধাকৃষ্ণর রূপবর্ণনা দিয়া দর্শক শ্রোতারে অলৌকিক

স্বাভার দিবা আনন্দ দিলো। গিরকর এ নাটকীয় ভঙ্গি এতাই আধুনিক রুচিসম্পন্ন গিরিনিখানীরে কতিহান আনন্দ দিলো, উহান একমাত্র গিরকর এ'লা পরিবেশন উপভোগ করেছি ভাবক বৈকবে জানি। পরবর্তীকালে অজা পেড়ারকর নাটকীয়ভাবে এ'লা পরিবেশনর ধারা এহান অনুসরণ বরলোতা। অজা কালাসেনা রাজকুমার গিরকে। কিন্তু কালাসেনা গিরকে পেড়ারকর গিরকর অনুকরণ করতেন। ইসালপার নিধারিত সীমা উণেগে অতিক্রম করিয়া আমার কীর্তনে রুচিবিরুদ্ধ অঙ্গ খানির অবতারণা করলো, যে অঙ্গহানি আধুনিক কালর বসবোধহীন ইসালপার আ'তে আছা আমার কীর্তনর মাধুর্য্য বাবে। গান্তীর্ঘরে একেবারে সর্বনাশ করে দিলো। অজা পেড়ারকর গিরকে কিন্তু ইসালপার নিধারিত সীমার ভিতরে থায়া অভিনয় বা নাটকীয় ভঙ্গির মাধ্যমে কীর্তন-গীতিকারে বসপুষ্ট করিয়া গেলগা। গিরকর এ মর্যাদা নাটকীয় ধারা এহান প্রবর্তিত আ'নাই খলপাওপা গুট আছানলো চিকারি দিয়া এ'লা দেনার পুরাণা ধারা উহান আমার কীর্তনেও উঠে গেলগা। এমাদে করে গিরকে অভিনয় বা নাটকীয় ভঙ্গিলো। কীর্তন-গীতিকা পরিবেশনর নৈচিত্র্যময় ধারা এহানর প্রবর্তন করানিরে তারে কীর্তনর এ হুবা ধারা এহানর জন্মদাগো বুলিয়া মাতে পারিয়ার।

অজা পেড়ারকর রাজকুমার গিরক এগো জরম আছিলতা বারোমুনি বা নরসিংপুরর বেকির পারে ১৯০৭ ইংরাজীত। তার পিতৃদেব বনগিরি আছিলতা ইসালপাগো, বারো তার পুরতাক আছিলতা ডাকুনাগো। কনাকতোই পেড়ারকর গিরকরতা সঙ্গীতর প্রতি ডাঙর আকর্ষণ আহান আছিল। উহানে ছাত্রাবস্থাতেই গিরকে সময় সুযোগ আহানি পেইলেই সঙ্গীত চর্চা করিয়া কাটেইলো। মাধ্যমিক শিক্ষা খানি পানার পিছে পেড়ারকর গিরক শিংলার আমরখালে গিয়া বসবাস করিয়া পাঠশালা আগোত শিককতা করিয়া থাইলগা। ঐ সময়ত গিরকে নিয়ম-



মতো এ'লা খানি ভাষকরলো ।

কতো বছর পিছে পেড়াক গিরক ত্রিপুরার বাতাহড়ার অন্তর্গত চিংচো গাওঁর গিথানক আগোরে বিবাহ করিয়া উপেই গাওঁর জীবন যাপন করিয়া থাইলগা । কিন্তু অল্প কয়েক বছরে গৃহিনী উগো বাহো গৃহিনী উগোর উরে জরম অ'ছিল। শৌ উতা হাবি মৃত্যু কবলে পড়ানিয়ে গিরকে কৈলাসহর গোলধারপুরে গিরা অ'কুপী নাওর আরাক গৃহিনী আগো গ্রহন করিয়া থাইলগা । ঐ গৃহিনী উগো অকালে মৃত্যু মুখে পড়ানিয়ে গিরকে ইমে ঐ গোলধারপুর গাওঁরেই মাধবী নাওর আরাক গিথানক আগোরে তৃতীয় গৃহিনী হিসাবে গ্রহন করিয়া উপেই স্থায়ীভাবে বসবাস করিয়া থাইল । এমাধবী গিথানকরাও পেড়াক গিরকর নিঙোল ভিনগো বাহো মূনিশৌ দুগো জরম অ'ইলা । গোলধারপুরে একাউ গিরকর মূনি ভিপুত উতা বাস করিয়া আছি । অজা পেড়াক দীর্ঘদিন কীর্তন-গীতিকালো জীবনাতিপাত করিয়া ৬০ বছর বয়সে ১৯৬৪ ইংরাজীত দেহত্যাগ করলো ।

অজা পেড়াকর পইলা নিয়মমতো এ'লা শিক্ষা করলোতা আমরখালর বান্ধাই অজাওতো । উতার পিছে গিরকে ভামকরলাতো লক্ষীমামিলার মুক্তাসিঙ অজাও । এ মুক্তাসিঙ অজা এগোই বস্তুতঃ পেড়াক অজার আনল শুকগো । মুক্তাসিঙ অজাই এ'লা তামকরেছিলতা মনিপুরর অজা আগোরাও আকথুকম মুক্তাসিঙ অজার গৃহিনীগো পূর্ণ গর্ভবতী আছে সময়ত মনিপুরর অজা উগোরাওতো জরুরী ডাক আহান আহানিয়ে গৃহিনীগোর দায়িত্বহান পেড়াক গিরকরাও দিয়া মুক্তাসিঙ অজা মনিপুরে গেলগা । ইতিমধ্যে মুক্তাসিঙ অজার গৃহিনীগোর প্রসূতির দিনহান আহিল কিন্তু পেড়াক গিরকে প্রসূতিত সহায়কারিণী গিথানক আগো নাপানিয়ে গুরুমাতার সেবা-শুশ্রূষা হাবি তা নিজে করলো এবং নিজর আ'তে গুরুমাতার প্রসূতির

পুতিফালি উতা হাবি ধয়া পৰিস্কার করলো । অজা মুক্তাসিঙে গিরকেউ হিসাব করিয়া গৃহিণীগোর প্রসূতির দিনহান হাব নাছিল; উহানে ইমে প্রসূতি দিন উহানাতেই তা ঘরে আয়া ফোঅ' ইলগা, ঘরে ফোঅ'য়া পেঙারু অজার সেবাসুশ্রমা উহান দেহিয়া পরম আনন্দ বার তৃপ্তি পেয়া অজা মুক্তাসিঙে পেঙারু গিরকরে, ইসালপার ভিতরে হাবির গজে অ'ইছকো ' বুলিয়া বর দিলো । গুরুমাতা গিথানকেউ পেঙারু গিরকর অনুরূপভাবে বর দিলো ! এ বিষয়ে পেঙারু অজার গৃহিণী মাধবী গিথানবরাঙতো ছমলাঙ বিবরণহান এসাদে : গুরুমাতার প্রসূতির পিছে প্রসূতির পুতিফালি উতা ঘাটহানাত ধয়া পেঙারু গিরক ফিরিয়া আহের সময় উহানাত অজা মুক্তাসিঙো আয়া ঘরে হমেইঙ বুলতে গৃহিণীর প্রসূতি এবং প্রসূতির সময় পেঙারু গিরকর সেবাসুশ্রমার যাবিহান হাবি ছনলো । উবাকা ইমে ঘরে হমানির আগেই অজাগিরকে পেঙারু গিরকরে কাদাত ডাহিয়া থতাহান 'আ' করুরেয়া থতা উহানাত ছেপ ফুটা আগো দিয়া “এরে মোর বিজাহান হাবি আজি তোরাঙ দিলু; তি ইসালপার ভিতরে হাবির গজর স্থানহান পেইছ বুলিয়া বর দিলো । যেতাউ অ'ক, এ ঘটনার পিছেই পেঙারু গিরকর খ্যাতির সূচনা ।

অজা পেঙারুরতা কাব্য প্রতিভাউ আছিল । গিরকে দিলো এলা উতার ভিতরে অনেক এ'লাই তার নিজর রচিত । 'বুন্দাবনে কিবা শোভা' — এ বিখ্যাত এলা এহানো তার রচিতহান । পদাবলীকার হিসাবে তার নাঙহান আছিলতা 'নটকিঙ্কর' । মহাত্মা গান্ধীর মৃত্যুর পিছে ত্রিপুরার ইশবপুরে তার উপলক্ষ্যে শ্রাদ্ধ কীর্তন আহানর আয়োজন করানি অ'ছিল । উহানাত কীর্তন-গানির আগে ভূমিকা হিসাবে অজা পেঙারুরে তার নিজর রচিত এ এলা এহান দিয়াছিল :

দ্বারিকাতে ছিল এক মোহনচান নাম ।

তঁহার গৃহিণী ছিল কপ্তরী বাই নাম ।



সেইনারী ধর্মকর্ম/ একাদশী বহু করেছিল ।

তার ফলে করমচান নামে পুত্র যে পাইল ।।

সেইজন বৃক্ষভক্ত আজানুলম্বিত ।

গান্ধী মহাত্মন্ বলি জগতে বিদিত ॥

যাব উপলক্ষ্যে আজি কীর্তন আরম্ভিল ।

বদন ভরিয়া সবে হরি হরি বল ॥

অজা পেড়ার হত্যা সম্বন্ধে মাধবী গিথানবরাডতো  
হুল্লাসে যাবিহান এসাদে : রাতাছড়ার কীর্তন আহানাত এলা  
দিতেগা কীর্তন উহানাত দোষ আহানি আছে বুলিয়া অজা  
পেড়ার দোষ উহানি কাপানিরকা কাম আহানি করলো । কাম  
উহানি করানি সমযত তারে কুনোগোই না ছকোকা বুলিয়া তা  
নির্দেশ দিয়াছিল । গিথানক আগোই অজ্ঞাতভাবে পিঠি-  
য়েদেত্ত পুতি আহানলো তারে ছকো বেলাছিলী । ও দোষে  
কীর্তন উহানাত ঘরে ফিরিয়াই অজা পেড়ার অশুশ্রু অ'য়া  
পড়িল এবং উতার অল্পদিন পিছেই গিরক দেহতাগ করলো ।

অজা পেড়ার বহু শিষ্য প্রশিষ্য বিষ্ণুপ্রিয়া মণিপুরী  
সমাজর কামে কামে আহি । উ'তার ভিতরে উল্লেখযোগ্য  
অ'ইলাতাই এত।— বাধবাড়ীর সেনা, উদয়বাবু, বারো বাশী,  
ইশকপুরর গোকুল, গোলধারপুরর গোপাল, বাবুলোক, কাউলী  
কুড়ার সিদ্ধু, পাথার কান্দির কাতিক, মস্তীগাঁওর বাবুলাল,  
শিলচর-মেহেরপুরর ব্রজলাল বাবো আতোনসেনা ।







# গুরু সেনারিক রাজকুমার (নৃত্যশিল্পী)

মণিপুরৰ বাহিৰে বিষ্ণুপ্ৰিয়া মণিপুরীৰ ভিতৰে মণিপুরী নৃত্যৰ ক্ষেত্ৰত ডাঙৰ দিকপাল আগো গুরু সেনারিক রাজকুমার গিরক । মণিপুরী নৃত্যৰ যথার্থ রূপ উহান মণি-  
পুরৰ অজ্ঞালোকৰাঙতো শিকা কৰিয়া বিষ্ণুপ্ৰিয়া সমাজে পইলা  
প্ৰচাৰ কৰলোতা এ গিরকে । গিরক এগোৰ আগে মণিপুরী  
নৃত্য সম্বন্ধে বৈজ্ঞানিক ধাৰণা এ সমাজে নৈৰ'ছিল বুললেউ  
যাকৰেব ।

সেনারিক গিরক জন্ম অ'ছিলতা কাছাড় জিলাৰ শিলচৰ  
শহৰৰ দুই মাইল পশ্চিমে কালিজৰ গাঙে— ১৮৯৬ ইংৰাজীৰ  
অক্টোবৰ মাহত । গিরকৰ পিতৃদেবৰ নাঙ আছিলতা শ্ৰীললিত  
মোহন রাজকুমার , বাৰো মাতৃদেবীৰ নাঙ আছিলতা শ্ৰীমতী  
কলালেইমা দেবী । যৌবনে সেনারিক গিরকে পইলা লুহোঙ  
কৰেছিলতা চেংকুড়ি গাঙৰ ৰূপবতী নাঙৰ মিঙোল আগোৱে ।  
কিন্তু গিথানক উগো অকালে মৃত্যু কৰলে পড়ানিয়ে সেনারিক  
গিরকে দ্বিতীয় গৃহিনী হিসাবে গ্ৰহণ কৰলোতা ফেতিপাতৰ  
সেনাতম্বী গিথানকৰে । পৰবৰ্তী কালে কাছাড়ৰ ৰাখালটিলার  
পান্ধই গিথানকৰেউ গিরকে পত্নীৰূপে গ্ৰহণ কৰেছিল । পান্ধই  
গিথানকৰ কষ্টগো মিস্তাম মধুৰ আছিল । সেনাতম্বী বাৰো  
পান্ধই— এ গিথানক দিয়োগিয়েউ সেনারিক গিরকে তাৰ  
নৃত্য-চৰ্চাত এ'লা-নাছা'লা বহু সাহায্য কৰলা ।

গুরু সেনারিকৰতা কলাকতৌ মণিপুরী নৃত্যৰ প্ৰতি  
আকৰ্ষন আহান আছিল । গিরকৰ পিতৃদেব শ্ৰীললিত মোহন  
রাজকুমার নিজেউ ইসালপাগো আছিল , বাৰো গিরকৰ পিহনক  
আগো ৰাসধাৰীগো আছিলী । তানুৰাঙতো সেনারিক গিরকে

নৃত্যগীতর যথেষ্ট শিক্ষা বাবো প্রেরণা পাইল। গিরকে যুবাকালে পইলা ডা'ক তামকবেছিলতা কালিঞ্জরর শুকগিরি, খুলাগিরি বাবো চন্দ্রহাসা— এ তিনোগো অজ্ঞারাঙতো। এতার ভিতরে খুলাগিরি বাবো চন্দ্রহাসা— এ গিরক দ্বিয়োগো মণিপুৰে গিয়া ডা'কর বিদ্যা এহান হিকেছিলতা।

সেনারিক গিরকে বাস বাবো নৃত্য শিক্ষা করেছিলতা অনেকগো গুরুরাঙতো। উতার মাজে উল্লেখযোগ্য আইলাতাই— (১) রাজকুমার প্রসাদসেনা অজা, (২) পদ্ম অজা, (৩) কুলচন্দ্র অজা, (৪) পাচের খোন্সা অজা, (৫) গৌরচন্দ্র অজা বাবো (৬) আতোন্সা অজা। এতা হাবি মণিপুৰর অজালোক; তানুর অনেকগোই সেনারিক গিরকরে নৃত্যশিক্ষা দেহিতা কালিঞ্জরে আয়া। এ অজালোক এতার ভিতরে সেনারিক গিরকর প্রধান গুরুগো আইলতাই প্রসাদসেনা রাজকুমার গিরক। এ গিরক এগো দীৰ্ঘদিন কালিঞ্জরে থায়া সেনারিক গিরকরে বাস বাবো নৃত্য শিক্ষা দেহিল।

সেনারিক গিরকে নৃত্যশিক্ষা করলোতা প্রধানভাবে বাসনৃত্যরে পরিপুষ্ট করানিরকা। গিরকে পইলা মণিপুৰে গিয়া নৃত্যশিক্ষা করলোগাতা ১৭ বছর বয়সে— ১৯১৩ ইংরাজীত। উতার পিছে ১৯৩৭-৩৮ ইংরাজীত বাবো মণিপুৰে গিয়া উপেইর আতোন্সা অজ্ঞারাঙতো গোষ্ঠভঙ্গি বাবো বাসর ভঙ্গি হাবিহানি নিখুতভাবে পূৰ্বাপর ঠিক কৰিয়া শিক্ষা করলোগা। ঐ সময়ত সেনারিক গিরক মণিপুৰর বিখ্যাত অজা আমুদোন শৰ্মার সংস্পর্শে আহেছিল। ঐ শৰ্মা গিরক বাবো তৎকালীন মণিপুৰর চুড়াচান মহারাজরাঙতো সেনারিক গিরকে বহু সমাদর পেইলো।

এসাদে শিক্ষা পানার পিছে সেনারিক গিরকে বাস বাখুৰাল শিক্ষা দেনা অ'করলো এবং অবিভক্ত ভারতর কাছাড়-ত্রিহট্ট অঞ্চলর বিভিন্ন কামে গিয়া বাস-বাখুৰাল শিক্ষা দিলোগা।



উভয় পিছে সেনারিক গিরক কবিগুরু রবীন্দ্রনাথর সংস্পর্শে আয়া  
মনিপুরী নৃত্যর শিক্ষকর পদে নিযুক্তি পেয়া বহুদিন শান্তিনিকে-  
তনে গিয়া আছিলগা। তা কবিগুরুর সংস্পর্শে কিসাদে আহে  
ছিল উহানর বিবরণ হান এহান —

কবিগুরু রবীন্দ্রনাথ গিরকে মনিপুরী নৃত্যর সংস্পর্শত আহে-  
ছেতা ১৯১৮ ইংরাজীত। মনিপুরী নৃত্যর মাধুর্যর প্রতি আকৃষ্ট  
অ'য়া গিরকে ঐ সময়ত অর্থাৎ ১৯১৮ ইংরাজীত শান্তি নিকেতনে  
মনিপুরী নৃত্য শিক্ষা দেনারকা ত্রিপুরার বুদ্ধিমন্ত রাজকুমাররে  
নিযুক্ত করেছিল; তার পিছে নিযুক্ত করেছিলতা ত্রিপুরায়েই নব  
কুমার বুলিয়া আরাক নৃত্যগুরু আগোরে। কিন্তু খুব সম্ভবতঃ উবাকা  
পেয়া কবিগুরুরে পরিপূর্ণ তৃপ্তিলো মনিপুরী নৃত্য আবাদন করে  
চরায়েছে। উহানে গিরকে ত্রিপুরার রাজারাও ইবা শিক্ষক  
আগোরেলো শিক্ষা দিবেয়া রাস আহান তাহে দেহবানিবকা  
অনুরোধ করলো। ত্রিপুরার রাজাই মাছিমপুরে তনুবাবু  
গিরকরাও এ বিষয়ে চিঠি লিখলো আরো তানুবাবু  
গিরকে শিলচরর কৃষ্ণকুমার গিরকরাও সেনারিক গিরকরে ব'রা  
করে মাছিমপুরে পাঠুরাদেনারকা খবর দিলো। তদনুযায়ী  
সেনারিক গিরকে মাছিমপুরে গিয়া রাস আহান শিক্ষা দিলো।  
ঐ রাসর অনুষ্ঠানর দিনে তনুবাবু গিরকে কবিগুরুরে নিমন্ত্রণ  
করলো। রাসানুষ্ঠানর সময়ত কবিগুরুরে আরাম চেয়ার  
আহানাত গদি দিয়া বহাদেনা অ'ইল। ঐ চেয়ারে নিষ্পন্দ  
ভাবে ব'য়া কবিগুরুরে সারারাতি নিবিষ্টচিত্তে পরম তৃপ্তিলো  
রাসলীলা উহান উপভোগ করলো। বিয়ানে রাস লনইল  
আরো কবিগুরুরে মাতের — “মি সারারাতি কিসাদে দিব্য-  
লোক আহানাত অবগাহন করিয়া আছিলু মাতে চুবাকরি;  
মি কামহানাত উঠে ছুৰাবলু; মোরে খানি উঠাদেই।”  
উভয় পিছে কবিগুরুরে ব'সধারী সেনারিক গিরকরে ডাহিয়া  
তার লগে মনিপুরী নৃত্য শিক্ষার পদ্ধতি সম্পর্কে খানি আলো-

চনা করলো এবং লগে লগে শান্তিনিকেতনে গিয়া মণিপুরী নৃত্য শিক্ষা দেনারকা তাঁকে নিমন্ত্ৰণ করলো। ঐ নিমন্ত্ৰণ অনুসারে তনুবাবু গিরক বারো কৃষ্ণকুমার গিরকর পরামর্শে সেনাৱিক গিরকে ১৯৩১ ইংৰাজীত শান্তিনিকেতনে মণিপুরী নৃত্যৰ শিক্ষক হিসাবে যোগ দিলোণা। সেনাৱিক গিরকে এৰাকা গুরুপদে উন্নীত অ'ইল। তাৰ লগে ডাকুলাগো হিসাবে গেছিলগাতা মাছুঘাটৰ মহিম সিংহ গিরক।

গুরু সেনাৱিকৰ আগে শান্তিনিকেতনে মণিপুরী নৃত্যৰ শিক্ষক হিসাবে নিযুক্তি পাইছিলতা বুদ্ধিমন্ত ৰাজকুমার বারো মৰুম্ৰাৰ। গুরু সেনাৱিকৰ পিছেই মণিপুরৰ আতোঞা সিংহ, ভানুগাহৰ নীলেশ্বৰ মুখাৰ্জি, মণিপুরৰ পাকা-সেনা ইত্যাদি অনেক অজালোক কবি গুরুৰ নিমন্ত্ৰণে শান্তিনিকেতনে সময়ে সময়ে গিয়া মণিপুরী নৃত্য শিক্ষা দিলোণা। কিন্তু এ অজালোক এতৰ কোনোগো দীৰ্ঘদিন শান্তিনিকেতনে নাথাই; শান্তিনিকেতনে দীৰ্ঘদিন স্থায়ী ভাবে আছিলতা ৰাজকুমার সেনাৱিক গিরক অ'কথুলাগো।

যেতাউ অ'ক, কবিগুরুৰ নিমন্ত্ৰণে গুরু সেনাৱিক গিরক শান্তিনিকেতনে মণিপুরী-নৃত্যৰ শিক্ষক হিসাবে যোগ দিলো-গাতা ১৯৩১ ইংৰাজীত। শান্তিনিকেতনে যানার পিছে গুরু সেনাৱিক কবিগুরুৰ নিকট সম্পৰ্কত আহিল এবং তাৰ প্ৰিয় পাত্ৰ আগোত পৰিণত অ'ইল। শান্তিনিকেতনে নৃত্য শিক্ষা দিতে গিয়া গুরু সেনাৱিক গিরকে শান্তিনিকেতনৰ আগেকাৰ মণিপুরী-নৃত্যৰ পাঠ্যক্ৰম উহানৰে আৰতাউ বৈজ্ঞানিক দৃষ্টিলো সংশোধন কৰিয়া চাৰিবছৰৰ পাঠ্যক্ৰম আহান হওকবলো।

গুরু সেনাৱিক গিরকে শান্তিনিকেতনে যোগ দেনাৰ সময়ত তাৰ লগে ডাকুলা হিসাবে নেছিলগাতা মাছুঘাটৰ মুহিসিংহ গিরকয়ে। কিন্তু মুহিগিরক উপেইত মিয়াম দিন না থাইল; কেতা নাহা থায়া তা ঘৰে ফিৰিয়া গেলগা।



ঐ সময়ত কবিগুরুৰে মণিপুৰী মৃদঙ্গবাদন, এ'লা বাৰো অন্যান্য মণিপুৰী কৃষ্টি-সম্বন্ধে শাস্ত্ৰীয় পদ্ধতি হাৰপানিবৰকা যোগ্য মানুহ আগো বিছাৰলো আৰো গুরু সেনাৱিকৈ বাজি-গাওঁৰ শ্ৰীমীলেশ্বৰ মুখাৰ্জি গিৰকৰ নাঙহান প্ৰস্তাব কৰলো। তদনুযায়ী কবিগুরুৰে নীলেশ্বৰ গিৰকৰে শান্তিনিকেতনে নিয়া গেলগা। নীলেশ্বৰ গিৰকৰে শান্তিনিকেতনে নিয়া যানার প্ৰসঙ্গত কোনো কোনো গিৰিগিথানীৰাওতো ছনলাঙ যাবিহান এসাদে : আকথুকম ছিলেটৰ কোৰাপাড়া নাঙৰ মেইতেই-গাওঁ আহানাত নীলেশ্বৰ গিৰকে শিক্ষা দেছে বাস আহান মঞ্চ হ কৰানিব সময়ত কবিগুরু ববীন্দ্ৰনাথ উপস্থিত আছিল। বাস উহান দেহিয়া পৰম তৃপ্তি পেয়া কবিগুরুৰে ঐ বাসৰ শিক্ষক নীলেশ্বৰ গিৰকৰে শান্তিনিকেতনে গিয়া নৃত্যশিক্ষা দেৱাৰকা নিমন্ত্ৰণ জানাছিলতা উনি। যেতাউ অ'ক, নীলেশ্বৰ গিৰক শান্তিনিকেতনে যানার পিছে কবিগুরুৰে তাৰাওতো মণিপুৰী নৃত্যকলা সম্বন্ধে অনেক তথ্য সংগ্ৰহ কৰলো। কিন্তু নীলেশ্বৰ মুখাৰ্জি গিৰক শান্তিনিকেতনে নিয়াম দিন নাথাছিল; দেড় বছৰৰ চুৰা থায়া গিৰকে গুরু সেনাৱিকৰাও নৃত্যশিক্ষণৰ ভাৰ হান দিয়া ঘৰে ফিৰিল। নীলেশ্বৰ মুখাৰ্জি শান্তিনিকেতনে আছিলতা ১৯৩৯-৪০ ইংৰেজীৰ কাপাকাপি সময়ত।

গুরু সেনাৱিকৈ শান্তিনিকেতনে থাইতে মণিপুৰী বাস-জব অনেক নৃত্য শিক্ষা দিলো। গিৰকে শিক্ষা দিলো নৃত্যৰ ভিতৰে উল্লেখযোগ্যহানি অ'ইলতাই — ১) 'জয় বৃন্দাবন, দৰশন পৰশন ....' ২) 'বৃন্দাবন-মায়ে ধীৰে চলে ....', ৩) 'কুঞ্জৰ-গামিনী মোতিম-দামিনী ....' ৪) 'বিপিন পথে যায়ৰেগো ধনী ....' ৫) 'শ্যাম বসময় বাসমণ্ডল ....' ৬) 'নৃত্যতি বিপিনে বনমালী ....' — এ এ'লা এহানিব গজে হঙকয়া নৃত্য উহানি। এতাৰ বাহিৰে অন্যান্য নৃত্য শিক্ষা দিলো উতাৰ ভিতৰে উল্লেখযোগ্য নৃত্যহানি অ'ইলতাই থান্ধা-

খোইবী নৃত্যবায়ো শিব পার্বতী নৃত্য ।

কবিগুরু এলার গঞ্জে মণিপুরী নৃত্যৰ চঙে পইলা নৃত্য  
রচনা করেছেতা গুরু সেনাৱিক গিৱকে । কবিগুরুৰ যে যে  
এ'লার গঞ্জে গুরু সেনাৱিকে নৃত্য রচনা করেছে, উতাৰ মাজে  
উল্লেখযোগ্যহানি এহানি : ১) 'রোদন ভয়া এবসন্ত',  
২) 'বসন্ত জাগ্রত দ্বারে', ৩) 'ওরে গৃহবাসী',  
৪) 'আড়ালে আড়ালে শূনি', ৫) 'দূৱেৰ বন্ধু সুৱেৰ  
দূতীৰে' ইত্যাদি ।

কবিগুরু স্ববীন্দ্রনাথৰ কাব্যৰ গঞ্জে মণিপুরী নৃত্যৰ চঙে  
পইলা নৃত্যনাট্য রচনা কৰেছিলতাউ গুরু সেনাৱিক গিৱকে ।  
কবিগুরুৰ যে যে কাব্যৰ গঞ্জে গুরু সেনাৱিকে নৃত্য রচনা কৰে-  
ছিল, উতা অ'ইলতাই 'নটীৰ পূজা', 'শাপমোচন',  
'চিত্রাঙ্গদা', 'চণ্ডালিকা', 'শ্যামা', 'ভানুসিংহেৰ  
পদাবলী' ইত্যাদি । এতাৰ ভিতৰে বিশেষ কবিতা 'চিত্রাঙ্গদা',  
'চণ্ডালিকা', বাৰো 'শ্যামা'— এ তিনোহানি নৃত্যনাট্যলোই  
গুরু সেনাৱিকে খ্যাতি অৰ্জন করেছে । 'চিত্রাঙ্গদা' নৃত্যনাট্য  
পইলা মঞ্চস্থ কৰানি অ'ছিলতা কলিকাতাৰ ছায়া-ছিন্নমা  
হলে । উদিন নৃত্যনাট্য উহান মঞ্চস্থ কৰানিৰ সময়ত কবিগুরুৰ  
প্ৰতি ঈৰ্ষাসম্পন্ন গোষ্ঠী আহানে অনেক ক্ষণ ধৰিয়া বাহিৰত  
মঞ্চগোত হিল উড়াছিল। বুলিয়া যাৱি হুনলাও 'ভানুসিংহেৰ  
পদাবলী'ৰ গঞ্জে গুরু সেনাৱিকে নৃত্য রচনা কৰেছিলতা  
তাৰ শান্তিনিকেতন-জীবনৰ শেষভাগে ।

গুরু সেনাৱিক গিৱক শান্তিনিকেতনে আছিল । উযাকা  
দ্বিতীয় বিশ্বযুদ্ধ দেখা দেছিল । ঐ যুদ্ধৰ সময়ত বৃহত্তৰ ভাৰতৰ  
সৈন্যৰ মনোৰঞ্জনৰকা হও'ছিল নৃত্যদল উহানৰ নিৰ্দেশকগো  
আছিলতা গুরু সেনাৱিক গিৱক । ঐ নিৰ্দেশকৰ পদে গিৱক  
আছিলতা প্ৰায় ছয় বছৰ । নৃত্যদল উহানে গুরু সেনাৱিকৰ  
নিৰ্দেশনাত নৃত্য-পৰিবেশন কৰলাতা ব্ৰহ্মদেশ, সিংহল বাৰো



ভারতবর্ষের বিভিন্ন স্থানে। এ নৃত্যদলে নৃত্যগীতের নির্দেশনা বারো পরিবেশনে গিরকর প্রধান সহায়িকাগো আছিলোতা পাণ্ডুই গিথানক। শেষর দিকে দ্বিবছর আহান সেনাতথী গিথা নকেউ গিরকর নৃত্যগীত পরিবেশনে সাহায্য করেছিল।

গুরু সেনারিকে ১৯৩১ ইংরাজী ১৯৫৫ ইংরাজী পেয়া শান্তিনিকেতনে শিক্ষকতা করলো। যদিও এ সময় এহানাত গিরকে হাদিহাদিত তার পরিবর্তে শ্রীবেহারী সিংহ বারো শ্রীবসন্ত সিংহের শান্তিনিকেতনে পাঠুবাছিল, তথাপি শান্তিনিকেতনের স্থায়ী শিক্ষকগো হিসাবে তা নিজেরই আছিল।

গুরু সেনারিকর অসংখ্য শিষ্যশিষ্যা ভাংতে এবং ভারতর বাহিরে আছিল। এবং বর্তমানেউ আছি কলিকাতার বিখ্যাত অভিনেত্রী সাধনা বসু গুরু সেনারিকর ছাত্রীগো আছিল। এ সাধনা বসু গিথানকে গুরু সেনারিকর নির্দেশনালো 'গানছায়া' বারো 'রাজনর্তকী' — এ দ্বিযোহানি ছায়াছবিত নৃত্য পরিবেশন করেছিল। উতা ছাড়া আরতাউ অনেক শিষ্য-শিষ্যা গুরু সেনারিকর নির্দেশনালো ছায়াছবিত নৃত্য পরিবেশন করল। ভারতর প্রাক্তন প্রধানমন্ত্রী শ্রীমতী ইন্দিরা গান্ধীয়ো তেরো-চৌদ্দ বছর বয়সে শান্তিনিকেতনে ছাত্রীগো অ'য়া আছিল। সময়ত গুরু সেনারিকরাঙতো নৃত্য শিক্ষা করেছিল।

গুরু সেনারিকর শিষ্য-শিষ্যার ভিতরে অনেকগো এবাকাউ বিভিন্ন দেশে নৃত্যশিক্ষা দিয়া আছি। উতার ভিতরে উল্লেখ যোগ্য অ'ইলাতাই— জাপানর সাকা কিবারা গিথানক, সিংহলর জয়ন্তী গিথানক বারো হংকঙর লাইলী গিথানক। গুরু সেনারিকর বুলবুল চৌধুরী নাঙর শিষ্য আগোই বাংলাদেশর ঢাকাত 'বুলবুল একাডেমী' নাঙর সঙ্গীতকেন্দ্র আগো স্থাপন করিয়া উপেই নৃত্যশিক্ষা দিয়া আছে। বারো মনিপুরর খেদাজিং সিংহ নাঙর আরাক শিষ্য আগোই বোম্বাইত

নৃত্যশিক্ষা দিয়া আছে। এতার বাহিৰে গুরু সেনাৱিকৰ উল্লেখযোগ্য শিষ্যশিষ্যা অ'ইলাতাই — আশা ভৰা, সৰিতা বান মেনকা, অনাদিশঙ্কৰ বাৰো বিখ্যাত যাত্ৰুৰ পি ছি, সৰকাৰ।

বিষ্ণুপ্ৰিয়া মণিপুৰীৰ ভিতৰে গুরু সেনাৱিকৰ উল্লেখ যোগ্য শিষ্য অ'ইলাতাই সৰ্বশ্ৰী বাপন সিংহ, বসন্ত সিংহ, সুৰেন্দ্ৰ সিংহ, চন্দ্ৰকান্ত সিংহ, কৃষ্ণপ্ৰসাদ ৰাজকুমাৰ, উপেন্দ্ৰ শৰ্মা, বনমালী সিংহ, বহ্মিম সিংহ, সুধীৰ সিংহ, দেবেন্দ্ৰ সিংহ, খেলেন্দ্ৰ মুখাৰ্জি, হৰিচৰণ সিংহ, বিজয় মুখাৰ্জি, মহেন্দ্ৰ সিংহ, ধনঞ্জয় সিংহ, বেহাৰী সিংহ, বাটিয়া সিংহ, গোলাপ সিংহ, কৃষ্ণদাস সিংহ, বিদ্যা সিংহ, মিনু দেবী, গোপীসেনা ৰাজকুমাৰ বাৰো মণিকুন্তলা। শিলচৰৰ বিখ্যাত মণিপুৰী নৃত্যশিল্পী শ্ৰী মুকুন্দদাস ভট্টাচাৰ্য্য, বেবা নাথ, মীৰা ভৱদ্বাজ, সন্ধ্যা সিন্‌হা — এ গিৰিগিথানী এতাউ গুরু সেনাৱিকৰ শিষ্য-শিষ্যা।

শান্তিনিকেতনে থানাসময়ত গুরু সেনাৱিকক কবিত্ৱ-স্বাভাৱে প্ৰচুৰ সমাদৰ বাৰো সন্মান পাছিল। ঐ সময়ত মণিপুৰৰ চুড়াচান মহাৰাজাই কলিকাতাৰ ৰাজা দীনেন্দ্ৰ ষ্ট্ৰীটে ছিলেটৰ তলুবাৰ গিৰকৰ মুণ্ডে মণিপুৰৰ শ্ৰেষ্ঠ সন্মান সূচক 'হাজৰা' উপাধি দিয়াছিল। কলিকাতাৰ বিভিন্ন সংস্থাৰো গুরু সেনাৱিকৰে অভিনন্দন জানানি অ'ছিল। আকথুৰম কালিঙৰে বাৰো সিদ্ধাৰীত গুরু সেনাৱিক বাৰো পাহুইবীৰ পৰিবেশিত শিবপাৰ্বতী-নৃত্য দেহিয়া বিশ্ববিখ্যাত নৃত্যশিল্পী উদয়শঙ্কৰ গিৰকে ঐ নৃত্যৰ ভূয়সী প্ৰশংসা কৰেছিল।

বহুদিন নৃত্যচৰ্চা কৰিয়া বাৰো নৃত্যশিক্ষা দিয়া গুরু সেনাৱিক ৰাজকুমাৰ ১৯৮৩ ইংৰাজীৰ মে মাহৰ ৬ তাৰিখে ইহলোক পৰিত্যাগ কৰিয়া গেলগা। বৰ্তমানে গুরু সেনাৱিক গিৰকৰ স্নপুত্ৰ শ্ৰীগোপীসেনা ৰাজকুমাৰ (ৰাজা) গিৰক বাৰো স্নবন্যা শ্ৰীমতী মণিকুন্তলা গিথানকে গিৰকৰ নৃত্যধাৰা উহানৰ চৰ্চা বাৰো প্ৰচাৰ কৰিয়া আছে।



## পাঙ্কালপা গোলাপ গিরি

বিষ্ণুপ্রিয়া মণিপুরীর ভিতরে পাঙ্কালপার মাঝে হাবিভ নাঙপালপাগো অ'ইলতাই গোলাপ গিরি । তা জরম অ'ছিলতা কাছাড় জিলার কাটাখাল হৈশমর কাদার কটাখাল গাঙে । এ শতকর দ্বিতীয় কি তৃতীয় দশকে তা দেহত্যাগ করেছে । কনাকতো পুরি বলীপাঙ্কালপার কাম উতা ইমে গোলাপ গিরিরকা । তার গারিগো আছিলতা গোলগাল ; বাবো তার বুকগোর বেড়হান আছিলতা ৪৫ ইঞ্চি । তার পাঙ্কালপা কামর অসংখ্য যারি আছে, যেতা মানুৰে নিজর আহিলো দেহেহিতা' এবাকা ঔ যারি দিলে অনেক হযতো কাল্লনিক যারি বুলিয়া মাততাই । আজি ঔ গিরক উগোর পাঙ্কালর যারি থানি দিক । তার যারির ভিতরে মারামারির যারিষে মিয়াম ; উতার পিছে তার অগাণ্ড যারি ।

গোলাপ গিরির যারি অ'করানির আগে কথা তুহান-  
আহান মনে থনা লাগতই: (১) তা অগ্ণায় কামে কুনোদিন মারা-মারি করাতে নাগেছেগা ; তা মারামারি করেছেতা বিশেষ করে অগ্ণায় বাবো অপমানর বিরুদ্ধে । (২) তার অনেক যারির লগে তার দাদা আনন্দর নাঙহান জড়িত আছে । অনেক মাততায়াতামূলে গোলাপ গিরিবাঙতো বলীগো আছিলগো তার দাদা আনন্দ; খুলা বেষক গোলাপে পাঙ্কালপা নাঙ পাছেতা বিশেষতঃ কলাকৌশললো । (৩) গোলাপ গিরি অত্যন্ত মাতৃভক্ত আছিল যে কুনো কামে বা মাইরে তা মালকর অনুমতি ছাড়া নাগেলগা; মাইরে যানার আগে মালকর চরণধূলি লয়া মালকর আশীর্বাদলো যানা উহান তার স্বীতিহান আছিল ।

এবারে গোলাপগিরির যারি অকরিক । তার যারি এতা কিন্তু তার বয়সর ক্রমানুসারে দেনা মুরারলাঙ কারণ কুন সময়ত কুন

ঘটনাহান ঘটেছে, উহানে বর্তমানে কুনোগায়ে মাতে নুরার -  
তারা । উহানে প্রত্যেকহান যারি ইমে বিচ্ছিন্নভাবে ছনে ষিকগা

১। কাটাখাল নদীহানাত আকখুরুম ঘুক্তি-নো আগো  
বুড়েছেতা । নো উগোত আছেতাতে চৌল, ধান, কলা, ইত্যাদি  
বস্তু । নোগো বুড়ানিয়ে নোউলি উতাই মাছু ৫০-৬০ গোর  
চুবা পুলকরিয়া নোগো কাকরানির চেণ্টা করলা কিন্তু কুনো  
মতেই নোগো কা'করে নুরারলা । গোলাপ গিরিয়ে উবেদে  
যিতেগাতে অবস্থা উহান দেখিয়া মাতের, “বারো, মোরে রুপা  
ভিনকুড়িহান তাকতাহে দেইনে ; আচুল আহানাত নোগো  
কা'করে দিতৌ ।” নোউলি উতাই বিশ্বাস নাকরানি সত্ত্বেও বিপদে  
পড়েছি হানতে ‘আকখুরুম চেইকতাহে’ বলিয়া য়াকরলা । পিছে দীঘল  
দড়ি ছগাছ আনুরেয়া গোলাপ গিরিয়ে দড়ি দগাছ নোগোর গলি  
দ্যগোদে বাধলো, বারো দড়ি গাছির বাকী মুড় উগি ভার-  
কাকালিহানাত বাধলো । উতার পিছে তা নিংশাহান বন্ধ  
করিয়া দিলো আচুল এহান ! ইমে আচুল আকহানাত নোউগো  
‘গুড়গুড়’ করিয়া আয়া পারগোত লাগিলহা ।

২। আকখুরুম পানির সময়ত বাহার ডাঙর চালি আহান  
ছুটিয়া কাটাখালহানাদে ভাহিয়া আহের হানতে গিরি উতাই  
উহান আটকানি নুরারিয়া ইমে পারগোদে ধাবদে ধাবদে লগ  
ধরেছি । উহান দেখিয়া গোলাপ গিরিয়ে মাতের, “মোরে ইমে  
দীঘল দড়ি আগাছহে দেইনে ; মি তুমার চালি উহান আটকা  
দিতৌ ।” চালির গিরি উতাই দড়ি আগাছ আনেদিলো আরো  
গোলাপ গিরিয়ে হাহুরিয়া গিয়া চালিহানর মুড় আগোত দড়ি  
উগাছ বাধলো, বারো দড়ি গাছর বাকী মুড় উগোলো পারগোত  
আহিল । আয়া দড়ি উগাছ কাকালিহানাত বাধিয়া মাটি-  
হানাত জাঙহান গাড়িয়া উবা অইলতাই চালি উহান ‘পেরেক  
পেরেক’ করিয়া খানইল ।

৩। গোলাপ গিরিয়ে মেশুরি কামো করলো এবং মেশুরি



কামরকা তা প্রায়ই শিলচর শহরে যাতায়াত করলো। আকদিন মেস্তুরি কামেত্ত যিতেগা দেহের যে জীপগাড়ী আহান পথগোর বারাদে পড়েছে হানতে গাড়ীহানর গিরি উতাই আবাক গাড়ী-আহানলো তুলানিরকা বাছেয়া আছি। উহান দেহিয়া গোলাপ গিরিয়ে 'বাছেই ; মি কাকরেদিও' বুলিয়া দড়ি আগাহলো গাড়ী উহান কাকালিহানাত বাধিয়া দিলো আচুল এহান। গাড়ী উহান ইমে আচুল আবহানাত 'গুরুও' করে পথগোত কাইলগা। আচুল-হানর চুটে জীপহানর চাকা আহানো ছুটিয়া পড়েছিল বুলিয়া হুনলাঙ।

৪। গোলাপ গিরিয়ে ডাঙর গুড়গুড়ি আগোত হজক পিলো। সভা সমিতিত যিতেগা ও গুড়গুড়ি উগো মানু আগোই নিষাদেনা লাগিল। গুড়গুড়ি উগো আগোরেলো লোবেয়া, বারো মুরগোত কৈয়ং আহান বাধিয়া গিরকে নিখিল বিফুপ্রিয়া মহাসভাত প্রায়ই গেলগা এবং উপেই তার পাঞ্চালর খেলা দেহুরে-ইলোগা। আকথুরুম চৌধুরী মাষ্টার বুলিয়া তার জাওাক আগো বারো চানবাবু বুলিয়া তার ভাতিজা আগোরে তার কাকালিত বকুরেয়া চারিয়-বেদে ফেরফের বুলেয়া তা খেলা দেহুরাছিল।

৫। গোলাপ গিরির আত্মসম্মান জ্ঞান নিয়াম জবর অ'ছিল। নাঙহানর লগে লাগাছি 'গিরি' শব্দ উগো ইমে তা নিজে লাগাছেগো। তা শৌরে ক্ষীর-এইপাত খৌবেইলোকো পুরি 'মোরে গিরি বুলিয়া' বুলিয়া হিকেইলো। তার নাঙহানর লগে 'গিরি' শব্দ নামাতলে তা মিয়াম অপমানিত বোধ করলো। মহাসভার সম্মেলন আহানাত কুনো গিরক আগোই প্রসঙ্গক্রমে গোলাপ গিরকর নাঙহান উল্লেখ করতে 'গিরি-শব্দযুক্ত নাকরলো বুলিয়া গোলাপগিরকে শৌঅ'নিহানে আকয়া कहनि দিয়ো গিলো মাওপগোর হুকানা মাটী উহানাত উবুরি অ'যাপড়িল উবাকা कहनि দিয়োগি কাপ আহানর চুবা মাটীত গাড়েছিল।

৬। বৌবরণে আকখুরুম তানুর ঘর উগো কাতিরা করে  
নেৰুগা উহান দেহিয়া গোলাপ গিরকে পপ করে ধৰিয়া ঘর উগো  
আটকেয়া থইলো। পিছেদে মানুৰে আয়া খুটা বৰেয়া ঘর  
উগো ডাৰা করিয়া থইলো।

৭। আকখুরুম নবীন বলিয়া গিরক আগোর মইষ সাপী  
আগো মরানিয়ে উগো আচুলিয়া নিয়া ঘাটর পারে বেলানিরকা  
মানু বিছারাত লাগেছি উবাকা গোলাপ গিরিয়ে আয়া মইষ  
উগোর গারগো আহাতুলিত চিপেয়া আচুলিয়া নিয়া ঘাটর  
পারে বেলা দেছিলগা।

৮। শালচাপরার বাজারে গোলাপ গিরিয়ে বাজার কর-  
তেগা কিতাপারা ব্যাপার আহানলো মুসলমান কতোগোর  
লগে গোলাপ গিরিরতা তর্কাতর্কি অ'ইতে অ'ইতে মারামারি  
অ'নার উপক্রম অ'ইল। উপেই গোলাপ গিরিয়ে থককো  
কাদার বাহা আকজারিত বাহা আগো আচুল আকহানাত  
উছলিয়া উগোলো অককহানি অ'করলোতাই মুসলমান উতা  
হাবি ধাবদিয়া গেলাগা।

৯। শিলচরর বাজারে গোলাপগিরি আকখুরুম গুরু লনাত  
গেছেগা উবাকা মুসলমান আগোতুগোই দালালিত হমাছিহান  
দেহিয়া উগিরে তা কিলো বেললো। উপেই মুসলমান উতা  
হাবিয়ে তাৰে কিলাত আহিলা হানতে তা কাদার নাগার  
ঘর আগোর খুটি আগো থক-করে উছলে বেলেয়া উগোলো  
মুসলমান উতা হাবিরে বাবেয়া তালকলো। লগে লগে নাগা  
পটিউয়েদে গিয়া তা সিঙ্গারীত লুকেয়া থাইলগা।

১০। আরাক আকখুরুম বাজারে মণিপুরী আগোই গুরু  
আগো বেছতে দালাল আগোই চালাকি করিয়া রুপা উতা  
নিজর আ'তে থয়া গুরুর গিরি উগোরে বসিদহান দেনারকা  
মাতের। দালাল উগোর চালাকি উহান দেহিয়া গোলাপ  
গিরিয়ে ফালদিয়া গিয়া তার আতহাত ধরলোগা, উবাকা



মুসলমান উতা হাবিয়ে তাৰে কিলানিরকা আহিতে তা তার লাঠি উগো পাখারি করিয়া হাবিয়ে তালকরানি অ'করলো। মুসলমান উতা হাবি ধাবদিলো। পিছে পুলিৰ আয়া তাৰে ধরিয়া নিলাগা, কিন্তু তা লাল না'ছে বলিয়া লগে লগে তাৰে এৰাদিলো।

১১। আকদিন ক্ষেতিৰ পৰে গোলাপগিরি লপুকেত আহিতে দেহেৰতা— সাহেব আগোৰ জীপ-গাড়ী আহান সড়কগোৰ তলে পড়েছে। সাহেব উগোৱাও আ'ঙকরিয়া গোলাপগিরিয়ে হাবপেইলো যে, জীপ উহান কা'করানিরকা শিলচৰে আবাক গাড়ী আহান পৌ দিয়া তা বাছেয়া আছেতা। গোলাপ গিরিয়ে মাতেৰ, “সাহেব গিরকে যাখাঙ দিলেতে মি জীপ এহান তুলেদে পাৰোৱিনেই আকখুকম চেইঙনে।” সাহেব উগোই গোলাপ গিরিৰে পাগালাগো শাত বলিয়া উত্তৰো নাদেৰ। গোলাপ গিরিয়ে কতোখুকম মাতলো উপেইতে ‘চেইকতা, মান্ন এগোই মাতেৰ এহান’ বলিয়া সাহেব উগোই গোলাপ গিরিৰে গাড়ীহান তুলানিৰ অনুমতি দিলো। উপেই গোলাপ গিরিয়ে জীপ উহানৰ পিঠিবাৰাদে আ'ত আহানলো ধরিয়া আচুল আকহানাত গাড়ী উহান পখগোত কাকৰে দিলো। সাহেব উগো ঙাক'ইল। ঔ সাহেব উগো অ'ছেতাতে শিলচৰৰ জেলা-জজগো। তা নিজৰ পৰিচয়হান দিয়া পিছেকাৰ দিনে তার কোটে' যানারকা গোলাপ গিরিৰে মাতলো। পিছেকাৰ দিনে গোলাপ গিৰি কোটে' গেলগা আৰো জজ উগোই তাৰে বকসিস আহান দিলো, লগে প্রমাণ-পত্ৰ আহানো দিলো।

১২। আকবছৰ ভানুগাছে (৭) বথৰ সময়ত মুসলমানে মনিপুৰী এতাৰে বথ আচুলানি নাদতাই, বাৰো আচুললে ভানু মাইৰে উবা অ'ইতাই বলিয়া বটেইলা। মনিপুৰী উতাই গতি নাপেয়া কাটাখালে গিয়া গোলাপ গিৰি বাঙ খবৰহান দিলাগা। গোলাপ গিৰি বাৰো তার দাদা আনন্দই মালকৰাঙ য়াৰি এহান দিয়া মাইৰে যানার অনুমতি লইলা। বথৰ আপেকাৰ বাতি

বিরান ফুইতে দিয়ো বেইবুনি মালকৰে হমাদিয়া ঘোড়া দুগোত চড়িয়া সালইলা । তানু ভানুগাছে ( ৭ ) গিয়া বারোবাজির উবা'কা কো'অয়া ঘর আগোত খানি ওয়া ভিৰেইলা । গোলাপ গিরির আতে কিতাউ নেই । তা শুক আগো আনুৰেয়া উগো থো গছিয়া থইলো । পিছেদে বেষকৰে 'দাদা, তি নাউ আহি আপ্পানে অ'ৰেতে মি আছুনাই' বুলিয়া দ'লা ফেইচম আহান লাকাটি-ফেইচম কৰে পিখিয়া, বারো মূৰগোত কৈয়ত আহান বাখিয়া সাল'ইল । তা লপুকগোত অ'ৰৰ লেট আগো আছে উবেদে দিশা করিয়া রথহান আচুলানিরকা মাতলো । মণি পুৰীয়ে এসাদে রথ আচুলতাৰা উহান দেহিয়া মুসলমান উতাই লাঠিলো তাল করিয়া আহিলো । মুসলমান উতা অ'ৰৰ লেট উগো পানা বিতা অ'ইলাগা উপেই গোলাপ গিরিয়ে পেইরাক কৰে ছুটিয়া গিয়া লেট উগোত পড়িয়া গারিগো হাবিগোত অ'ৰ গছে বেললো এবং লগে লগে ছুটিয়া গিয়া মুসলমান উতার হাদিত হমেয়া শুক উগো ভন ভন কৰে 'বুলানি অ'ক-বলো । মুসলমান উতা দশ-বারোগো ফামে মরলাতাই বাকী উতা হাবি ধাবদিয়া গেলগা । গোলাপ গিরিয়ে থককো গিয়া হিনেয়া ওকখি অ'য়া বেষকৰ লগে কাটাখালে ফিৰিয়া গেলগা ।

মুসলমান উতাই হিন্দুৰ বিরুদ্ধে শিলচৰৰ কোটে' মোক-দমা দিলাগা — স্থানীয় মানু কতগোৱে আসামীৰ নাঙ দিয়া । মোকদমাৰ দিনে গোলাপ গিরিয়ে কোটে' গিয়া জজ উগো-ৰাঙ মাতলো, "জজুৰ, মোকদমা এহান মিছাহান; কাৰণ যেতাৰ নাঙ দেছি, এতাই মুসলমান উতাৰে মাৰেছিতা নাগই; মুসলমান উতাৰে মাৰেছুগোতে মি ।" মোকদমাৰ জজ্ উগোতে গোলাপ গিরিয়ে যে সাহেবগোৱ জীপহান পথগোৱ ভলেত্ত তলেদেছিল, উগো অ'পড়ে'ছগা । তা গোলাপ গিরিয়ে চিনিয়া, বারো তাৰাঙতো ঘটনাহান আদ্যোপান্ত হুনিয়া জজ্ উগোই মোকদমাৰ আসামী উতা হাবিৰে নিৰ্দোষ বুলিয়া মুক্তি দিলো,



বারো গোলাপ গিরির বিরুদ্ধেই কিতাউ নাকরলো ।

১৩। আকখুরুম পানির সময়ত কালানিত গিয়া কাটা-  
খালর বিক্ষুণ্ণিয়া কতোগোই গুরু রাহিয়া আছিগা; সময় উহা-  
নাত ভূষণ বুলিয়া জমিদার আগোর বি'ত পড়েছি মণিপুৰী  
কতোগোরে উচ্ছেদ বরানিয়কা মুসলমান কতোগোই ফিলা  
বেললা; বুজন আগোরে অ'রেউ ছানে বেললা । উহান দেহিয়া  
গোলাপ গিরিকে ধাবদে গিয়া মুসলমান উতার লাঠি উতা  
কারোলয়া উড়াদে উড়াদে বেলা দিলো । মুসলমান আগোই  
তারে হুজাহানলো দেনাবকা করতে তা উন্টা হুজা উহানলো  
গিঠিয়া মুসলমান উগোরে খুন বরলো ; বাকী উতারে লাঠিলো  
বাড়েয়া তালকরলো ।

১৪। আকখুরুম মুসলমান গুট আহানর লগে আকখু-  
লাগোই মাইরে হমাছেতা । ও সময়ত মুসলমান আগোই বল্লম  
আগো তারাঙ উড়াদিলো; বল্লম উগো গোলাপ গিরির উরত-  
গোত খেপাত আহান মিকালেয়া মাজিত পড়িল । লগে লগে  
গোলাপ গিরিয়ে বল্লম উগোলো তালকরিয়া গিয়া মুসলমান  
উগোরে গিঠিয়া খুন করলো; বাকী উতারেউ বাড়েয়া তালকরলো ।

এতাহাড়া গোলাপগিরির ছোটখাটো অনেক য়ারি  
আছে; যেমন—

১। আকখুরুম তা আড়াইমণ ধানর বস্তা আগো পিঠিত  
করিয়া পানির সময়ত কাটাখাল হান হাতুরিয়া লাল'ছিল ।

২। আকখুরুম তা বনেদে জিতেগা বাঘিনী আগোরা-  
ঙতো নো আগো না হুগো কারোলয়া আনেছিল; উতা তা  
সাহেব আগোরাঙ দিয়াদেছিল ।

৩। আকখুরুম তা কাটাখাল নদীর পুলহান হঙ করেছে  
ইঞ্জিনিয়ার আগোরাঙ পুলহানর লুৰা উতা নরম অ'ছে বুলিয়া  
মাততে ইঞ্জিনিয়ার উগোই তারে গ্রাহ না করিয়া ততারাছে  
হানতে তা জিদ ধরিয়া পুলহানর রেলিঙর খুটা উতা আগো

মুজুরা আহানাত বেকা করে দিয়াদেছে।

৪। শেকা দিয়া আটকাকুরা ধাইলে তা আকখুলাগোই  
ঘর আগো তুলে পারলো উনি।

পাঙ্কাল পা অ'ইতারো এতা খানাপিনাতো বনী অ'ইতারো।  
গোলাপ গিরিতাউ খানাপিনার যারি মাহেই আছে : ১) তা  
দ্বি-তিন কাঠি চৌলর ভাত স্বচ্ছন্দে খেইলো উনি।

২) আকখুরুম তা বুঝাল আগো পুড়িয়া নুনলো চৌল  
পাচকাঠির ভাত খাছিল। ৩) আকখুরুম পশ্চিমর মাল  
আগো আয়া লাকাটি সিংরা দেনাবকা মানু বিছাঝলো উবাকা  
গোলাপ গিরিয়ে তার লগে লাগানিবকা উবা অ'ইল; কিন্তু  
গোলাপ গিরিয়ে চৌল পাচ-কাঠি বাধিয়া ভাত খেইলো নবুনা  
উহান দেহিয়া মাল উগো তার লগে লাগানি না' করিয়া  
গেলগা।





# পাক্কালপা শহীদ গিরীন্দ্র

পাণ্ডকালে, সাহসে বারো লাঠি চালনার দক্ষতায় বাংলাদেশের গিরীন্দ্র সিংহ গিরক বিষ্ণুপ্রিয়া মণিপুরী সমাজের স্মরণীয় পুরুষ আগো। বাংলাদেশের স্বাধীনতা সংগ্রামে এ গিরক এগো পাকিস্তানী সৈন্যের আঁতে নিষ্ঠুরভাবে নিহত অ'য়া শহীদ গো অ'ছে।

গিরীন্দ্র গিরক জন্ম অ'ছিলতা ভানুগাছের আ'উ লেইকিত ১৯৩০ ইংরাজীত। গিরকর পিতৃদেব শ্রীগোলাপ সিংহ ও সময়র নাঙকরা মেইপাগো, বারো মাতৃদেবী শ্রীমতী মাইসেনা দেবী স্মৃতি স্মরণার্থী গো। গিরীন্দ্র গিরকর বপাক শ্রীকুঞ্জমণি সিংহ গিরক তৎকালীন পাক্কালপার ভিতরে অগ্র গণাগো। এ গিরকে চৌল আকপুরার ভাত খানা পারুলো বুলিয়া মানুর খতাত প্রচলিত আছে। ও বপাক গিরকর পাক্কাল উহান গিরীন্দ্র গিরকে বংশগত অধিকারসূত্রে পাছিল। উতার গজে গিরীন্দ্র গিরকর পিতৃদেবেউ তারে কনাকতো কবিরাজি হজক বারো হেইনো, কাঠল ইত্যাদি বিভিন্ন ফল খোঁরা খোঁরা তার দৈহিক শক্তিবৃদ্ধি সাহায্য করেছিল। তা গিরীন্দ্র গিরকরে বিড়ি, ছিগারেট বারো পান সেবনো নিষিদ্ধ করিয়া তারে সংযম অভ্যাস কররাছিল। উহানে গিরীন্দ্র গিরক এগো কনাকতো ভানুগাছের বলী - পাক্কালপার ভিতরে প্রথম স্থান অধিকার করেছিল।

গিরীন্দ্র গিরকে তার জন্মলক পাক্কাল উহানরে অভ্যাস শিক্ষা বারো সাধনালো আরতাউ আগ বাড়ুরাছিল। কনাকতো পুরি তা বিভিন্ন খেলা-ধূলা বারো ব্যায়ামাদি শরীর চালনার লগে লগে লাকাটি, লাটিচালনা, অস্ত্রচালনা ইত্যাদি নানা শারীরিক বিদ্যাদে দক্ষতা অর্জনর বারাদেউ প্রচণ্ড মনোযোগ দিয়াছিল। কনাকে তার পিতৃদেবে তারে স্থানীয় নিয় মাধ্যমিক

বিদ্যালয় আগোত ভর্তি করুবা দিলো । কিন্তু অধ্যয়নেত তারতা শরীরচালনা বারো অঙ্গশিক্ষার বারাদেই দৃষ্টি জবর ; উহানে তার পড়াশুনা যথারীতি না'ইল । উহান দেহিয়া তার পিতৃদেবে তাৰে কৈলাসহরর আ'উরে আত্মীয় আগোর তাদারকিত থয়া তাৰে উপেইর স্বাধাকিশোর স্থলে ভর্তি করুবা দিলো । কিন্তু তথাপি গিরীন্দ্র গিরকর অধ্যয়ন না'ইল ; মেট্রিকুলেশন পরীক্ষাত তা কৃতকার্য অ'মা চুৱারলো । তার পিতৃদেবে তাৰে ফিরেয়া নিয়া বারো স্থানীয় কমলগঞ্জ হাইস্কুলে ভর্তি করুবাদিলো । কিন্তু তথাপি পড়াশুনাদে গিরীন্দ্রর মন না বহিল ; তার দৃষ্টি দৈহিক শক্তিবৃদ্ধি বারো অঙ্গশিক্ষাদে ।

ঐ সময়ত ভানুগাছর যুবকর ভিতরে লাকাটি , উকেই বুলানি , লাঠিচালনা , তরুরালচালনা ইত্যাদি বিষয়ে দক্ষতা অর্জন করিয়া প্রতিযোগিতাত লামানির রীতি আহান প্রচলিত আছিল । বেলী হমানির সময়ত বারো সেকাত লাইট লাগেয়া জাপর সাপালগো বুলতার লপুক উগোত যুবক হাবি পুল'য়া লাকাটির বিভিন্ন নমুনা এবং লাঠি বারো তরুরাল চালনার কৌশল শিক্ষা বারো অভ্যাস করলা । গিরীন্দ্র গিরকে খেলা উতা তামকরানির বারাদে সম্পূর্ণভাবে নিজরে নিয়োগ করলো । ঐ সময়ত যুবক হাবিয়ে তিল'য়া মণিপুৰেত গুজানন্দ সিংহ বুলিয়া অজ্ঞা আগো আনলাগা । অজা উগোৱাঙতো অন্যান্য যুবকর লগে গিরীন্দ্র গিরকেউ লাকাটি বারো তালে তালে ফালদে ফালদে উকেই বুলানি , লাঠি বুলানি , তরুরাল বুলানি এতা বিদ্যা হিকলো । গোপীসাধুৱাঙতো ( এ গিরক এগো পরবর্তীকালে দেবীছড়াত আশ্রম আগো প্রতিষ্ঠা করিয়া আছিল ) গিরীন্দ্র গিরকে এ জাতীয় অন্যান্য বিদ্যা হিকলো । বিদ্যা উতালো তৃপ্তি নাপেয়া গিরীন্দ্র গিরকে বাবুধন নাওর আরাক অজা আগোৱাঙ গুরুবরণ করিয়া যুদ্ধবিদ্যা শিক্ষা করলো । বাবুধন অজার পুতক হনা নাওর গিরক উগো দক্ষ তরুরাল খেলো-



বারগো আছিল; তা ডা'কর পুংললর লগে লগে জাঙর কাঁকেই বেলানি বারো আ'তর তরুৱাল বুলানিত দক্ষতা অর্জন করেছিল। ঐ গিরক উগোৱাঙতো গিরীন্দ্র গিরকে তরুৱাল বুলানি হিকলো। এসাদে শিক্ষার ফলে গিরীন্দ্র গিরক লাঠি চালনা, লাকাটি, উকেই বুলানি বারো তরুৱাল বুলানিত ঐ অঞ্চলে অদ্বিতীয় পুরুষগো অ'ইল।

এ শরীর চালনা বারো যুদ্ধবিদ্যা শিক্ষা এতাই গিরীন্দ্র গিরকর দৈহিক শক্তি বৃদ্ধিত আরতাউ সাহায্য করেছিল। তার এ দৈহিক শক্তির অনুপাতে তার আহাৱর মাত্রাউ সাধারণ মানুৱ আহাৱেত্ত যথেষ্ট পরিমাণে অধিক আছিল। তা আকখুলাগোই তিন-চারিগো কাঠল মাপাঙ-সহ খানা পারলো। বান্দাৱাত আস্তা ৰোঁৱ মূরিগো খানা উহান তারহান। তার খানা উহান চানা মনেয়া মানুৱে তাৱে যে কুনো বান্দাৱাত নিমন্ত্ৰণ করানি না পাহরলা। এসাদে হাবি দিক দিয়া গিরীন্দ্র ক্রমে শক্তিমান পুরুষ আগোত পরিণত অ'ইল। তার আ'তর পাম্পল বারো জাঙর থকরা বলিল-বলিলগো অ'ছিল; বারো বুকগো আছিল প্রশস্ত বারো উচ। গিরীন্দ্র গিরকর পাকালর য়াৱি বাংলাদেশর ঘরে ঘরে। তা আঙুলি আকগোলো ছাইকেল আহাৱ সহজে তুলে পারলো, বারো চুলে মাথু ছুগো লটকেয়া ফেরফেৱেই বুলুৱা পারলো। কাবাডি খেলাত তার প্রতিপক্ষী উতা হাবিয়ে তাৱে ধরিয়া লামলাম অ'ইলেউ তানু হাবিৱে তুলিয়া বা আচুলিয়া তা নিজর ফামে ফিরিয়া আহে পারলো। ফুটবল খেলাতো তা অগ্রগণ্যগো। উহানে ফুটবল কাবাডি বা লাকাটি খেলতে গিরীন্দ্র অংশগ্রহণ করলোহান হুনলে শৌ-বুজন, যুবক-নিঙোল হাবি চাৱাপহান অ'য়া পুল-ইলা। জুড়া মাঙপর লপুকে রাখুৱাল লমনির পিছে গিরীন্দ্র গিরকে বিভিন্ন ধরণর দেহচালনা বা খেলা দেহুৱেইলো। উতার মাজে আছিলতা দীঘল ফাল, উবা ফাল ইত্যাদি। তা

ফাল দিয়া শূন্যে তিনবুলা দিয়া মাটিহানাত সোজা অ'য়া উবা অ'না পারলো। দা'পে বারো ফালে তা স্কুলৰ ছাত্ৰৰ ভিতৰে প্ৰথম। কাবাডি খেলাত তা ক্ৰীকট জিলাত প্ৰথম পুৰস্কাৰ পাইছিল, বারো ফুটবল খেলাত তা ছিলেট ডিষ্ট্ৰিক্ট টিমে বলিষ্ঠ খেলোৱাৰ অ'গো হিসাবে গণ্য অ'ছিল।

এসাদে দৈহিক শক্তিৰ অধিকাৰী এবং দৈহিক চালনা বারো যুদ্ধবিদ্যাত পাৰদৰ্শী অ'নাই গিরীন্দ্র গিৰক ভাণুগাহৰ হাবি জাতৰাঙ বীৰপুৰুষ আগো হিসাবে পৰিচিত অ'ছিল। তা মাইৰে গেলগা জিঙিয়া আহানি উহান ইমে তাৱহান। মাইৰে তা আকখুলাগোই হাজাৰগো মানুৰে বাৰেয়া জখম কৰিয়া নিজে অক্ষত অবস্থাত ফিৰিয়া আহিল। উহানে কোনো মাইৰ আতানাত গিরীন্দ্র আহেৰ বুলেই শত্ৰুপক্ষ হাবি নিজে নিজে ফিৰিয়া গেলগা।

এসাদে পাঞ্চালপাগো অ'ইলেউ গিরীন্দ্র গিৰক কিন্তু কোনোদিন অযথা মানুৰ লগে মাইৰ নাকৰেছে এবং কোনোদিন অনায়াসৰ পক্ষ অবলম্বন নাকৰেছে। গিৰকে মাইৰ কৰাত লামেছেতা অনায়াস বিৰুদ্ধে এবং ন্যায় ৰক্ষাৰ কাজে; কাৰণ তা অনায়াস-অবিচাৰ সহ্য কৰে নুৱাৰলো, বারো ন্যায়-ৰক্ষাৰকা তা সৰ্বদাই সচেতন থাইল। তা কোনোদিন অনায়াস আহান কৰে বেললে গুৰুজনে তাৰে অজস্ৰ শান্তি দিলে বা অপমান কৰলেউ তা হাসিমুখে সহ্য কৰলো। অন্যগোদে তাৰ গজে বা কোনো আগোৰ গজে আৰাক আগোই অনায়াস আচৰণ কৰলে তা অগ্নিশৰ্মা অ'য়া উঠিল। ঐ কাৰণে তা বৰাবৰ অনায়াস বিৰুদ্ধে তাৰ দৈহিক শক্তি প্ৰয়োগ কৰলো। কিন্তু এসাদে দৈহিক শক্তি প্ৰয়োগ কৰানিৰ ক্ষেত্ৰতো তাৰতা সংঘম আহান আছিল। বস্তুতঃ গিরীন্দ্র গিৰক কঠোৰ প্ৰকৃতিৰ মানুগো নাগই; মানুৰ প্ৰতি তাৰ মায়া মমতা যথেষ্ট আছিল। উহানে মাইৰে গেলগাউ তা আগ বাড়িয়া প্ৰতিপক্ষৰ গজে আঘাত



নাকরলো; যেবাকা প্রত্যাঘাত করানিহান অবশ্যস্তাবী অ'য়া পড়িল, উবাকাই তা তার লাঠির আঘাতহান বেললোতা। গিরীন্দ্র গিরকর এ— নীতিবোধ, মায়ামমতা ইত্যাদির লগে তার সরলতা বিশেষ করে উল্লেখ করানিহ যোগ্য। তার মনে কোনো ধরণর কুটিলতার স্থান নেয়'ছিল; হবাহান অ'ইলে হবা বুলানি, সাকতিহান অ'ইলে সাকতি বুলানি— উছানেই তার নীতিহান। এ সরলতার দরুণ গিরীন্দ্র গিরকে অনেক সময়ত হৃদয়ের পর্যন্ত বিশ্বাস করিয়া বিপদে পড়েছিল।

গিরীন্দ্র গিরকর পাঞ্চালর পরিচায়ক অনেক ঘটনা আছে :

গিরকর বিয়া'র সময়র ঘটনাহান : নগরর ব্রজবাণী বুলিয়া নিঙোল আগোর লগে তার বিয়া লেপ'ছে। তা বিয়াত যানার আগে নগরর মানুরে মাতলা যে, বরগো অ'য়া যিতেগা তা আঙি উরানি না'ইতই, বারো বিয়াত বম গাদানি না'ইতই। গিরীন্দ্র গিরকে আঙেই উরিয়া বম গাদিয়া বিয়াত সাল'ইল। উছানে বিয়াহান আরম্ভ অ'নিহ আগে নগরর মানুরে দরবার আহান অ'করলা। চেইতে চেইতে না'ইল উপেই বরগো অ'য়া গেছেগা গিরীন্দ্র গিরকে থককো বাহার খুটা আগো কারেবেলেয়া উগোলো নগরর গাবুরাপুরেই উতারে বায়া বারা তালকরানি অ'করলো; কাদাত পেইলো উগোরে জাতেরা মাজিত বেলা দিলো।

তৎকালীন পূর্বপাকিস্থানে যেতার আ'তে রাষ্ট্রশক্তি আছিল, ঐ মুসলমান উতাই ঐ দেশর মুষ্টিমেয় বিক্ষুপ্রিয়া মনি-পুরী এগিরে নিঃশেষ করানি বা দেশেদ বিতারণ করানির বিভিন্ন কৌশল - চাতুরী অবলম্বন করলা। ঐ কৌশল উতার ভিতরে আহান আছিলতাই বিক্ষুপ্রিয়ার বি'উতা দখল করিয়া বারো তানুর গজে উৎপীড়ন করিয়া তানুরে শক্তিহীন করানি। এইকর বারো কলাকগোর কাদাত ৬০-৬৫ কিয়ারর ভাঙর আঘা

( জঙ্গলী বা খাস জাগা ) আগো আছে । বিষ্ণুপ্রিয়াই মনি-  
 পুরেত্ত গিয়া পইলা তানুগাহৰ বনজঙ্গল শেঙকৰিয়া উপেই  
 পড়েছি দিনেত্ত পুৰি আনুৰা উগো হাবিবকা-বুলিয়া খাস অ'রা  
 আছেগো । আনুৰা উগোত তানু তানুৰ গুরুমইষ এয়া দিতারা  
 উগোৰ ঘাসলো তানুৰ গুরুমইষ জিংতা অ'ইতারা । আকদিন  
 হঠাৎ কৰে প্রায় ছুইহাজাৰ মনিপুৰী মুসলমান জাঠি লাঠি-  
 কাৰলো আয়া আনুৰা উগো দখলে হমেইলাহা । উহান দেহিয়া  
 গিৰীন্দ্র গিৰকে সঙ্গী কতোগোলো গিয়া ধলাই নদীহানৰ যে  
 কামহানাত মুসলমান উতা ফিৰতে লাল'য়া যিতাইগা, উপেই  
 বাছেয়া থাইলগা । মুসলমান উতা ফিৰতে কাম উহান কোঅ'-  
 ইলাগাতাই লগৰ মানু উগিরেলো গিৰীন্দ্র গিৰকে তানুৰে আক্র-  
 মন কৰিয়া বারানি অ'করলো । ঐ আক্রমণে অনেকগো মুসল-  
 মান জখম অ'ইলা; বাকী উতা হাবি ধাবদিল। মুসলমান  
 উতাই আনেছিল। জাঠা উতা আগো কাৰোলয়া গিৰীন্দ্র গিৰকে  
 ঐ জাঠা উগোলো গিঠিয়া মেনে বুলিয়া মৌলভী আগোৰে জাগাত  
 খুন করলো । এ মাইৰ এহানৰ কাৰণে গিৰীন্দ্র গিৰকসহ অনে-  
 কগো বিষ্ণুপ্রিয়া গ্ৰেপ্তাৰ অ'ছিল। আগোৰতা যাবজ্জীবন  
 কাৰাদণ্ডে অ'ছিল । কিন্তু শেষে হাবি মুক্তি পেইলা ! আনু-  
 বার্গো বিষ্ণুপ্রিয়াৰ দখলে আহিল । এ ঘটনাৰ পিছে বিষ্ণু-  
 প্রিয়াৰতা আত্মবিশ্বাস আৰতাই দূৰ অ'ইল ।

উতাৰ পিছে বা-ৰো মুসলমানে ঘোৰামাৰাৰ আনুৰা  
 আগো দখলে হমেইলাগা । ঘোৰামাৰাৰ মানুৰ ভিতৰে উবাৰ  
 সাহসী বাৰো লাঠি তৰোৱালৰ খেলোৱাৰ মেয়'ছিল। তাৰ  
 গিৰীন্দ্র গিৰকৰাঙ আয়া সাহায্য চেইলা । গিৰীন্দ্র গিৰকে  
 এলাকাগোৰ গাবুৰাপুৰেই হাবি পুলকৰিয়া তানুৰে সাহস  
 বাৰো উৎসাহ দিয়া তানুৰেলো আনুৰা উগোৰ পুনৰ্দখলে গেলগা  
 বিষ্ণুপ্রিয়াৰ লাঠি বাৰো তৰোৱালৰ যুঙে টিকে ছুৰাৰিয়া এ  
 কনো মুসলমান উতা হাবি বণে ভঙ্গ দিল। ঘোৰামাৰাৰ আনুৰা



উগো বা-রো বিষ্ণুপ্রিয়া দখলে আহিল ।

আপগাওর মুক্তাসিং বুলিয়া গিরক আগোই আলফু মিয়া বুলিয়া মুসলমান আগোরাওতো রূপা লয়া তাৰে দশ কিয়াৰৰ চুৰা জমি দিয়াছিলতা এ শর্তে যে, মিয়াৰ রূপা উতার পৰিবৰ্তে তাৰে বছৰ চুক্তি ধান গুলি দিয়া দেনা । মুসলমানৰ প্রভাববৃদ্ধিৰ ফলে আলফু মিয়াই বি'উতা পুৰাপুৰি দখল করানি মনেইলো, কিন্তু বাস্তবপক্ষে বি'উতা দখল বৰে ছুৰাবানিয়ে তা সৰফুম আলী বুলিয়া মাঠাৰ আগোৱাও উতা বেছলো । সৰফুম আলীয়ে প্রচুৰ রূপা খৰচ কৰিয়া ভাড়াটিয়া লাঠিয়াল-জাঠিয়াল আনিয়া বি'উতা দখলে হমেইলগা । মুক্তা সিঙৰ পক্ষৰ তৰোৱাল খেলোৱাৰ হুনা গিরকৰেউ লাঠিয়াল উতাই দ্বিদিন আহান সৰফুম আলীৰ ঘৰে আটক কৰিয়া থইলা । বিষ্ণুপ্রিয়া পুনৰায় নিজৰ শক্তি পরীক্ষাত অবতীৰ্ণ অ'ইলা । গিরীন্দ্র গিরকৰ নেতৃত্বে তানু সৰফুম আলীৰ ঘৰে গিয়া শক্তি প্রয়োগলো হুনা গিরকৰে মুক্ত করলা ; উতার পিছে মুক্তাসিঙৰ জমিহানো পুনর্দখল করলা ।

আকথুরুম বিষ্ণুপ্রিয়াই গুট গুট নিকুলিয়া কাঙ আচুলাত লাগেছি সময়ত কস্তম বুলিয়া ডাক্তাৰ আগোই বিষ্ণুপ্রিয়া এতাবে উছিত নাকৰিয়া তার গাড়ী উহান ইমে স্থপ উবা নাকৰিয়া মানু উতার হাদিয়েদে চালেয়া মেনাত লাগেছে । তার এ গ্রাহ্য নাকরানি উহান দেহিয়া কান্দিহানে গিরীন্দ্র গিরকে আৰাক ছুগো- আগোৱে লগে কৰিয়া ডাক্তাৰ উগোৱে গাড়ীহানাত আচুলিয়া সাকতি করে কিলে বেললো । ঐ ব্যাপাৰে তাৰে এবেষ্ট করানি অ'ইল এবং বিচাৰে তাৰে জেল দেনা অ'ইল ।

গিরীন্দ্র গিরক আকথুরুম কৈলাসহৰেত্ত বাংলাদেশে যিভেগা পথে মুসলমান ডাকাতি ৫-৬ গো আহানে লাঠি আ'তে আয়া তাৰে বেড়ি দিয়া বেললা । গিরীন্দ্র গিরকৰ আ'তেউ লাঠি আগো আহিল ; তা তার লাঠি খেলালে ডাকাতি উগি

হাবিরে জিভিয়া বাবা বেললো । উপেই ডাকাতি উতাই  
 চালাকি করিয়া মাতলা, “না, আমি তোরে ছুবারলাঙ ;  
 আমি আর তোরে কিতাউ না করত'ঙাই ; এরে চা, আমি  
 লাঠিগি বেললাঙ ; তিও লাঠিগো বেলা ।” গিরীন্দ্র গিরকে  
 সরল বিশ্বাসে লাঠিগো বেললো । পিছে ডাকাতি উতাই হবাতা  
 সায়া ‘তোর বকচা উহানাত কিতা আছেতা চেইকতা’ বলিয়া  
 কাদাত আয়া অতর্কিতে বা-রো তায়ে আক্রমণ করে বেললা,  
 এবং তার মুরগো ফাটা দিয়া তারবস্ত্র উতালো-দাবদিয়া গেলগা ।  
 গিরীন্দ্র গিরক ঘরে গিয়া দ্বি-আকদিন পিছে ডাকাতি উতার  
 গাঙ উহানাত গেলগা ; গিয়া ‘মোর বস্ত্র উতা তুরা করে ফিরেয়া  
 মোর ঘরে দেইগা ; নাইলে তুমারতা হবা না’ইতই’ বলিয়া  
 হুমকি দিয়া গেলগা । পিছে ডাকাতি উতাই তার বস্ত্র উতা-  
 তার ঘরে নিয়া ফিরেয়া দিলাগা ।

আকথুরুম গিরীন্দ্র গিরক আগরতলাত দেবকুমার  
 সিংহ গিরকর ঘরে অতিথিগো অ’য়া আছিল । ঐ সময়ত  
 আকদিন বাবোবাজিত দেবকুমার গিরক ভায়া আছে  
 উপেই গিরীন্দ্র গিরকে গিয়া তার জাঙ উহান মুজুন্দিয়া ধরিয়া  
 থাইল । দেবকুমার গিরকে অনেক চিংকার দিলোতা পেয়া  
 গিরীন্দ্র গিরকে তা’রে ছুপ না এরাবের । দেবকুমার গিরকো  
 ঐ সময়ত বাককা বলী অ’ছিল মানুগো ; গিরীন্দ্র গিরকে আ’ত-  
 হান্ন খানি টিলা করলো স্বেযোগ উহানাত তা নিজরে কুনোমতে  
 মুক্ত করে বেললো । নিজরে উসাদে মুক্ত করিয়া উঠিয়া দেব-  
 কুমার গিরকে কান্দিলালাক যোঅ’য়া গিরীন্দ্র গিরকরে বুকুর বাবো  
 ঘুষি দিয়া কিলানি অ’করলো, বাবো আ’ত দিয়োহানি শক্ত  
 করিয়া তার গা’র উগোত নখলো (বিধেয়া টিপেয়া ধরলো ।  
 দেবকুমার গিরকর নখর বিধায়) গিরীন্দ্র গিরকর গা’র-  
 গোত বকতো পড়িল, কিন্তু গিরীন্দ্র গিরকে ছুপ গারিতো না  
 লাগার ; ইমে নাউ লড়িয়া বহিয়া আছে । দেবকুমার গিরকে



ভাৱে কিলেইতে কিলেইতে ঠুকিয়া উবা অ'ইল। উবা অ'য়া আ'ঙকৰেৰ, “ তিতে আপ্পানে উসাদেতে কিয়া মোৰ জাঙহান চাঙওহান জবৰ কৰে মুজুৱে দিলেতা ? ” গিৰীন্দ্র গিৰকে মাতেৰ, নোঙশাঙ অ'ইল গাৰি এগোত কিল-বাকুৰি নাপড়ানিয়ে গাৰিগো নুঙেই নাপেয়া আছুতা ; উহানে তি শৌঅ'য়া মোৰে ধানি কিলেইবেতা বুলিয়া উসাদে কৰলুতা। চাতা, তি দিলে কিল-বাকুৰি এহানিয়ে গাৰি এগো কতি নুঙেই অ'ইলতা ! ” পাঙ্কালপা আশুটা মানুৰ জীৱনে এসাদে যাবিও থাব।

স্বাধীনচেতা, নীতিবোধসম্পন্ন, আত্মসম্মানে সচেতন মানুৰে কোনো দিন পরাধীনতাৰ শৃঙ্খল সহ্য কৰে নুবায়তাৰা। গিৰীন্দ্র গিৰকো এসাদে গুণসম্পন্ন অ'নাই তা স্বাভাবিক-ভাবেই স্বাধীনতা সংগ্রামৰ অংশীদাৰ আগো অ'ছিল। ভাৰতৰ স্বাধীনতা সংগ্রামৰ সময়তেই তা ভাৰতৰ জাতীয় কংগ্ৰেচৰ পক্ষে থাৱা ইংৰাজৰ বিৰুদ্ধে সংগ্রাম কৰলো। কিন্তু ঐ সময়ত ১৫ — ১৬ বছৰৰ অপরিণত শৌ আগো অ'নাই তা নিজৰে পরি-পূৰ্ণভাবে স্বাধীনতা সংগ্রামে আত্মদান কৰে নুবায়েছিল। তাৰ পিছে পাকিস্থান ৰাষ্ট্ৰ সৃষ্টি অ'নাৰ পিছে মৌলবাদী মুসলমানে যেবাকো উপেইৰ অমুসলমানৰ অধিকাৰ হাবি খৰ্ব কৰানি তথা বিষ্ণুপ্ৰিয়া মণিপুরীৰে নিমূল কৰানিব চক্ৰান্ত কৰলা, উবা-কাউ তাৰ স্বাধীনতাকামী বাৰো সংগ্রামী চেতনাই তাৰে বাৰে বাৰে মানুৰ অধিকাৰ তথা এ জাতৰ অস্তিত্ব ৰক্ষাৰকা সংগ্রামৰ পথে আগ বাড়া দেছিল। এহানৰে তাৰ পাকিস্থান-বিৰোধী বা ৰাষ্ট্ৰবিৰোধী মনোভাবহান বুলিয়া নিঙকরলে তুল অ'ইতই ; তৎকালীন পাকিস্থান সরকারে মানুৰ জন্মগত অধিকাৰ বা বিষ্ণুপ্ৰিয়াৰ অস্তিত্বত আঘাত নাকরলে গিৰীন্দ্র গিৰকে এসাদে ভূমিকাত না নামিল অ'ইছ।

কিন্তু পাকিস্থান সরকার তথা পাকিস্থানৰ মুসলমানে বৰাবরই গিৰীন্দ্র গিৰকে ৰাষ্ট্ৰবিৰোধী মানু আগো বাৰো ভাৰতৰ

গুপ্তচরগো বুলিয়া নিউকম্বলা । উহানে ভারত বারো  
পাকিস্থানৰ ভিতৰে কোনো গোলমাল আহানি বাধলেই, বা যুদ্ধ  
আহান আৰম্ভ অ'ইলেই পাকিস্থান সরকারে গিরীন্দ্র গিরকৰ গজে  
কড়া নজৰ থইলো এবং তাৰে গ্ৰেপ্তাৰ কৰানিৰ চেষ্টা কৰলো ।  
পাকিস্থান সরকারে তাৰে অনেকবাৰ গ্ৰেপ্তাৰ কৰেছিল, কিন্তু  
অনেক সময়তেই তাৰে ধৰে নুৰাবলো ; তাৰে গ্ৰেপ্তাৰ কৰতাই  
বুলিয়া আভাস আহান পেইলেই তা ভারতৰ কমলপুৰ, কৈলাসহৰ  
ইত্যাদি ফামৰ বিষ্ণুপ্ৰিয়া মণিপুৰী গাঙে, বা আগৰতলা,  
শিলং, গোহাটী ইত্যাদি বিভিন্ন ফামে আত্মগোপন কৰিয়া  
থাইলগা । পাকিস্থানৰ সীমা লাল'নি উহান ভাৰাঙ অতি সহজ  
বাপাৰহান—বন ছেদিয়া বা স্বাতিৰ আধাৰ বা'গিয়া বা দৰকাৰ  
পড়লে সীমাবন্ধীৰ গজে শক্তি প্ৰয়োগ কৰিয়া তা সীমা অতিক্ৰম  
কৰলো । ১৯৬৯ ইংৰাজীত আকথুকম তা কৈলাসহৰেদে পাকি-  
স্থানৰ সীমা অতিক্ৰম কৰতে পাকিস্থানৰ সীমাবন্ধীৰ আ'তে ধৰা  
পড়িল ; উবাকা তা হঠাৎ আক্ৰমণ কৰিয়া সীমাবন্ধী আগোৱে  
মাৰিয়া বারো দুগোৱে জখম কৰিয়া ভাৰতে লাল'য়া আহেছিল ।

১৯৬৫ ইংৰাজীত কাশ্মীৰ নিয়া ভাৰত পাকিস্থানৰ  
ভিতৰে যুদ্ধ চলিল সময় উহানাত আ' দিন হঠাৎ কৰে পাকিস্থান  
সৈন্য আয়া শিববাজাৰ বুলভাৰা ফামউহানাত গিরীন্দ্র গিরকৰে  
ঘেৰাও কৰলো । নিজৰ অবস্থাহান হাৰপেয়া গিরীন্দ্র গিরকে  
কাদাদে যাবগা বিচিত্ৰ নাঙৰ শৌ আগোৱে আ'তৰ ছানিলো  
ডাহিয়া হাতেকৰে মাতলো—তাৰ (গিরীন্দ্রৰ) ঘৰে গিয়া শাকেই  
হানৰ গজে আছে মচা উতা উপেইতো সেচেয়া নেনাৰকা ।  
বিচিত্ৰই তুৱা কৰে গিয়া গিরীন্দ্র গিরকে মাতলো ফাম উহানাত  
চেইতে তৰোৱাল আহানে বারো কাগজ কতোহানে পেইলো ।  
তা লগে লগে উতা জানালাহানাদে উড়া দিয়া বাহিৰে বেলা  
দিলো । মুহূৰ্ত্তৰ ভিতৰে পাকিস্থান সৈন্য গিরীন্দ্রৰে নিয়া তাৰ  
ঘৰে ফো' অ'ইলাগা, কিন্তু ঘৰে তল্লাসি কৰিয়া তাত আপত্তি



অনেক কুনো কাগজ বা বস্তু নাপেইলা । তথাপি পাকিস্থান সৈন্যই তার মুক্তিরকা রূপা তিন হাজার দাবী করলা । কিন্তু গরীব গিরীন্দ্রর পক্ষে রূপা উতা হাবি দেনা সম্ভব না'নিয়ে পাকিস্থান সৈন্যই তা'রে ধরিয়৷ সমসের নগরে নিলাগা । পিছেকার দিনে সৈন্যই বা-রো তা'রে গ্রেপ্তারি অবস্থালো ঘরে নিয়া আহিলা । উবাকা বিচিত্র নাঙর শৌউগোর অনুরোধে গাঙর সনাতন নাঙর মাঠার আগোই রূপা দুইশ আহান ধার দেনা'ত স্বাজী অ'ইল । ঐ মাঠার উগো বা'রো গাঙর বামন শুরেঙ্গ গিরকে গিয়া পাকিস্থান সৈন্য উতা'রে রূপা উহানি খুশদিয়া গিরীন্দ্র গিরকে মুক্ত করলা ।

১৯৭০ ইংরাজীত পূর্বপাকিস্থান বা বর্তমান বাংলা-দেশর জনগনে যেবাকা পশ্চিম পাকিস্থানর শৈবতন্ত্রর বিরুদ্ধে গর্জিয়া উঠলা এবং পাকিস্থানর কবলেত বাংলাদেশরে মুক্ত করিয়া স্বতন্ত্র রাষ্ট্র আহান করানিরকা মুক্তি যুদ্ধ অ'করলা । উবাকা স্বাধীনচেতা গিরীন্দ্র গিরক বাংলাদেশর বৃহত্তর জনগোষ্ঠীর লগে আ'ত মিলেয়া মুক্তিযুদ্ধত যোগ দিলো এবং মুক্তিযোদ্ধারে নানাভাবে সাহায্য করলো । তার পরামর্শ বা'রো উৎসাহে অসংখ্য বিকুশ্রিয়া যুবক রাইফেল - আ'তে মুক্তিযুদ্ধত যোগ দিলা । ঐ সময়ত বাংলাদেশর অনেক গিরিগিথানী ভারতে আয়া আশ্রয় নিলাগা, কিন্তু গিরীন্দ্র গিরক গাঙে থায়া মুক্তি যুদ্ধর তদারকি করলো । ঐ সময়ত আকদিন তা আধারেদে ব জঙ্গল ফারি দিয়া নিঙোল কতোগোরে ভারতে আনিয়া লালকরে দেছিল ।

বাংলাদেশর ঐ মুক্তি যুদ্ধর সময়ত আকখুরুম গিরীন্দ্র গিরকে ভারতে আয়া আগরতলা বা'রো কমলপুরে আশ্র-গোপন করিয়া আছিলহা । ঐ সময়ত তার দ্বিতীয় পুত্রবীয়ে তা'রে বা'রে বা'রে পৌ'দেনাই তা গোপনে ঘরে ফিরিয়া গেলগা । ঘরে ফিরিয়া গিরীন্দ্র গিরকে দেহের যে, উপেইর বিকুশ্রিয়া উতা

হাবি দিশাহায়া অ'য়া দেশ বেলেয়া ভারতে আহানিরকা প্রস্তুত  
 অ'ছি । গিরীন্দ্র গিরকে উবাকা গাঙে গাঙে বুলিয়া তানুরে  
 ঘর নাবেলানিরকা বায়ো দরকার অ'ইলে সংগ্রামে লামিয়া  
 মরানি অ'ইলেউ হাবিয়ে আকসাটে মরানি লাগতই বুলিয়া পরা-  
 মর্শ দিলো । তার পরামর্শে হাবিয়ে সাহস পেয়া ঘর না এয়া-  
 দিয়া থাইলা । এবেদে পাঞ্জাবী সৈন্য বারো বাংলাদেশর পাকি-  
 স্থান পত্নী রাজাকারে গিরীন্দ্র গিরকে বহুদিন আগেত্ত বিহার-  
 তারাগো । তা ঘরে ফিরেছেহান খবর পেয়া তা'রে ধরানিরকা  
 তানু সচেষ্ঠে অ'ইলা । ১৯৭১ ইংরাজীর ২৭ শে ছেপ্টেম্বর দুর্গা-  
 পূজার ঘটর দিনে গিরীন্দ্র গিরক ঢাকানেত্ত ফিরেব সময় উহানাত  
 ঘরে হমানির আগে পাঞ্জাবী সৈন্যই গাড়ী আহানলো আয়া  
 হঠাৎ তা'রে ঘেরাও করল। এবং তা'রে গ্রেপ্তার করিয়া আদিয়ার  
 মিলিটারী কেমপ উগোত নিয়া গেলাগা । উপেই পাকিস্থানর  
 সৈন্য উতাই তা'রে নির্মমভাবে হত্যা করিয়া তার মৃতদেহগো  
 ধলাই নদীত বেলাদেছি বুলিয়া কথাহান বটিল । দ্বি তিন দিন  
 পিছে ধলাই নদীত মৃতদেহ আগো ভাহিয়া আহেছিল , কিন্তু  
 উগো গিরীন্দ্র গিরকর মৃতদেহগো , না কারগো , উহান তার  
 পুতোক বতীন গিরকে চেয়াউ ধরে তুরারলো ।

গিরীন্দ্র গিরকর এ জীবন কাহিনীত দেহিয়ার - তা  
 কিসাদে পাক্কালপা বায়ো সাহসী মানুগো আছিল । কিন্তু গিরীন্দ্র  
 গিরকর মহত্ত্বহান তার পাক্কাল বা সাহসর গজে নির্ভর মাকয়ের  
 পাক্কাল বায়ো সাহসর বাহিরে যে গুণহানিয়ে গিরীন্দ্র গিরককে  
 মহান করেছে উহানি অ'ইলতাই তার (১) নীতিবোধ , (২) সমাজ-  
 প্রীতি বারো (৩) দেশপ্রীতি । বিষ্ণুপ্রিয়া মণিপুরী জাত  
 এহানরে স্বীয় ঐতিহ্য , দৈহিক শক্তি বারো রাজনৈতিক  
 শক্তিত প্রতিষ্ঠিত করানি এহান তার আছিল জীবনর স্বপ্নহান ।  
 উহানে তা পাকিস্থান আমলে ছাৰে ট্রেইনিঙ পাছ করিয়া  
 চাকরী আহান পানা সহেও চাকরীত যোগ নাদেছিল, তার শক্তি



বারো অর্জিত বিদ্যা উহানলো ঘরে থায়া স্থানীয় মানুস  
সেবা খানি করানিরকা । তার হপনর ভিতরে হাবিত ডাঙর  
হপনহান আছিলতা বিষ্ণুপ্রিয়া জাত এহানরে পাকালপা  
জাত আহাম রূপে প্রতিষ্ঠিত করানি । উহানে তা পাকি-  
স্থান আমলেই ১৯৬৬—৬৭ ইংরাজীত ভাষতর হালাহালি  
দেবীছড়া অঞ্চলে আহিয়া বিষ্ণুপ্রিয়া যুবকরে লাকাটি, লাঠি-  
খেলা, উকেই বুলানি, তরোবাল বুলানি ইত্যাদি শিক্ষা  
দেনার চেষ্টা করলো এবং বিষ্ণুপ্রিয়া যুবকরে এসাদে যুদ্ধবিদ্যা  
বারো অস্ত্রবিদ্যার মাধ্যমে নিজর শক্তি-বৃদ্ধি করিয়া অন্যান্য  
জাতর মুণ্ডে মূর তুলিয়া উবা অ'নিরকা পরামর্শ বারো উৎসাহ  
দিলো । তার মারামারির ভিতরে অধিকাংশ মারামারিয়েই তা  
করেছেতা বিষ্ণুপ্রিয়া মণিপুরী জাতর অস্তিহ, ঐতিহ্য বারো  
সম্মান রক্ষা করানিরকা । তা যৌবনে নগরর ব্রজরানীয়ে বিবাহ  
করানি সত্ত্বেউ পরবর্তীকালে আ'উরর তারালেইরে বিবাহ করে-  
ছিলতাউ তার এ সমাজপ্রীতির কারণে । স্বামীরাঙতো বিচ্ছিন্ন বা  
খেইনাগী তারালেইর প্রতি মুসলমান যুবক কতোগো আকৃষ্ট  
অ'নাই ঐ মুসলমান যুবক উপিরাঙতো তেইরে বক্ষা করানিরকা ।  
তার গভীর এবং যথার্থ সমাজপ্রীতির দরুণেই গিরীন্দ্র গিরকে  
বাংলাদেশর বিষ্ণুপ্রিয়া মণিপুরী হাবিরে একত্রিত করে পারেছিল  
এবং হাবির শ্রদ্ধা বারো ভালোবানার পাত্রগো অ'ছিল ।



# বিপ্লবী বৈকুণ্ঠনাথ শর্মা বারো বিপ্লবিনী লীলাবতী শর্মা

বাংলাদেশর ভানুবিলর বৈকুণ্ঠনাথ শর্মা। জন্ম তার ১৮৭৬-৭৭ ইংরাজীত। নিষ্ঠীক, স্বাধীনচেতা, সত্যনিষ্ঠ, স্পষ্ট-  
বক্তা বারো সংগ্রামী মানুগো। সারাজীবন অন্যায়র বিরুদ্ধে  
বারো ন্যায়র পক্ষে সংগ্রাম করে করে গেলগা গিরকগো তা।  
ভানুগাছর বিখ্যাত কৃষকবিদ্রোহত তা আছিলতা অগ্রগণ্য  
নেতাগো। ইংরাজর বিরুদ্ধে ভারতর স্বাধীনতা সংগ্রামেউ গিরকে  
সক্রিয়ভাবে যোগ দিয়া বহুদিন স্থানীয় কংগ্রেসর নেতৃত্ব  
দিলো। ঐ সময়ত এ গিরকে ছিলেটর অন্যান্য নেতাও লগে  
সভা আহানর আয়োজন করিয়া রক্তস্বাক্ষর করেছিল। ঐ স্বাক্ষর  
অনুষ্ঠানে জওহরলাল নেহেরু বারো U. N. Deb—  
এ সর্বভারতীয় নেতা দিয়োগিও অংশগ্রহণ করেছিল। বিদেশী  
বস্ত্র-বর্জনে বারো চরকা-আন্দোলনেও তা পুরোধা আগো  
আছিল। এলাদে বস্ত্রাধর আন্দোলনর লগে যুক্ত থানাই  
বৈকুণ্ঠনাথ শর্মা গিরকে অনেকবার কারাবাস করানিত বাধা  
অ'ছিল। অনেক সময়ত ইংরাজ সরকারর প্রেপ্তারির শিকার  
না'নিরকা মাধবপুরর টেঙারাত আত্মগোপন করিয়া থাইলগা;  
অনেক সময়ত টেঙারায় টেঙারায় গিয়া শিলঙেদে আত্মগোপন  
করিয়া থাইলা। কারাবাস করানির সময়ত বৈকুণ্ঠনাথ গিরক  
আসামর স্বাধীনতা-সংগ্রামী কুলধর চালিহা, মহেন্দ্র মোহন  
শর্মা ইত্যাদি নেতৃবর্গর সংস্পর্শত আছিল।

বৈকুণ্ঠ শর্মা অত্যন্ত নিষ্ঠীক বারো বিরাট ব্যক্তিত্ব সম্পন্ন  
গিরকগো আছিল। তার ঘরে দারোগা পুলিশ আহিলে তার  
অনুমতি নানিয়া হুমা ছুরারলা। তার ঘরে ২৫-২৬ হাত  
দীঘল বৈঠকখানা আগো আছিল; স্বাধীনতা সংগ্রামীর গোপন



বৈঠক অ'ইল ফামহান উহান। বৈকুঠ শর্মা ব্রাহ্মণ কুলে জন্ম  
 অ'য়াউ তা কুনোদিন যজমান নাখাছে; তবে তা উপনয়ন-দীক্ষা  
 রীতিমতো দেছে। গিরকে সারা জীবন ঘরে বুনা ফেইচম  
 বারো ঘরে বুনা পুত্তির আঙেই উরলো। অত্যন্ত দৃঢ় বারো  
 স্পষ্টবাদী অ'নাই বৈকুঠ গিরকে কথা আহান আকথুকম মাত-  
 লেই লম'ইল; উহানাত প্রশ্ন করানির কারো ক্ষমতা নেয়'ছিল।  
 উহানে পারিবারিক জীবনে তা উগ্রমেজাজীগো বুলিয়া পরি-  
 চিত অ'ছিল এবং হাবির ভয়র পাত্রনো অ'ছিল।

বৈকুঠ শর্মার জিলক লীলাবতী। তেইর জন্ম ১৯১৫—১৬  
 ইংরাজীত। পিতৃদেব বৈকুঠ শর্মার সাদেই স্বাধীনতাকামী,  
 স্বাধীনচেতা হুঃসাহসী নিঙোলগো তেই। শিক্ষাগত যোগ্যতার  
 দিকে তেই মাত্র ষষ্ঠ শ্রেণী উত্তীর্ণগো। বৃটিশ শাসনতন্ত্রও  
 ভারতরে মুক্ত করানিরকা য়েবাকা ভারতর চাবিয়ো  
 বারাদে স্বাধীনতা-সংগ্রামর দাবানল জলিয়া উঠেছিল, উবাকা এ  
 অল্পশিক্ষিত নিঙোল এগোই মাত্র ১৫-১৬ বছর বয়সে ভারতর  
 তথা বিষ্ণুপ্রিয়া জাতর মুক্তিরকা য়ে হুঃসাহস দেহেয়া গেছেগা,  
 উহান হাবি সংগ্রামী মানুর মুণ্ডে আদর্শ আহান।

লীলাবতীর সংগ্রামর আবৃত্ত অ'ছিলতা ভানুবিলা কৃষক  
 বিদ্রোহর সময়েত্ত। ভানুবিলা তালুকর জমিদার আলী আম-  
 জদ খাঁই ব্রিটিশ সরকারর নির্দেশে প্রতি বছর জোর-জবর-  
 দত্তিলো খাজানা আদায় করিয়া নেবগা। আমজদ খাঁর অধী  
 নস্থ ভানুবিলা বিষ্ণুপ্রিয়া মণিপুরী এতাই খাজানা দিয়া  
 যিতায়াগা। আমজদ খাঁর নায়েব রাসবিহারী দাসে  
 তানুর খাজানা নেবগা, কিন্তু তানুরে উতার রসিদ নাদেব;  
 বিষ্ণুপ্রিয়া এতারো মরল বিশ্বাসে রসিদ দাবী নাকরতারা।  
 ১৯৩০ ইংরাজীত হঠাৎ করে ঐ রাসবিহারী দাসে ভানুবিলা  
 মানু এতাই খাজানা নাদতারা বুলিয়া খাজানারকা জুলুম  
 করানি অ'করলো, এবং কতোগোর বিরুদ্ধে খাজানা নাদেতি

বুলিয়া মোকদ্দমা লাগাদিলো। এহানৰ প্ৰতিবাদে ভানুবিলৰ বিষ্ণুপ্ৰিয়া হাবিয়ে “আৰ খাজানা নাদতাঙাই” বুলিয়া ঘোষণা কৰলা। পইলা আলী আমজদ খাঁই বৈকুণ্ঠ শৰ্মা, পঞ্চানন ঠাকুৰ ইত্যাদি মণিপুৰী সমাজৰ নেতা কাতোগো ডাহিয়া চালাকিলো আপোষ কৰানিৰ চেষ্টা কৰলো, কিন্তু তাৰ চাতুৰি ওতা হাবপেয়া বিষ্ণুপ্ৰিয়াই আৰ আপোষে নাগেলাগা। উবাকা আমজদ খাঁৰ নিৰ্দেশে তাৰ অনুগত উতাই বিষ্ণুপ্ৰিয়া নেতা ওতাৰে সমস্ত দিনহান আটক কৰিয়া থয়া তানুৰ গজে কাৰ্যিক অত্যাচাৰ কৰলা, কিন্তু কোনো ফল না’ইল। উতাৰ পিছে ব্ৰিটিশ সরকারৰ নিৰ্দেশ বাৰো সহায়তালো জমিদাৰৰ সিপাহীয়ে আন্তিলো ভানুবিলৰ ঘৰ বা’গানি অ’কৰলা। ভানুবিলৰ বিষ্ণুপ্ৰিয়াউ ভুজালি, খন্তি ইত্যাদিলো সংগ্ৰামে উবা অ’ইলা। তানু অনেক আন্তি জখম কৰলা বাৰো বাস বিহাৰীয়ে টুকুৰা টুকুৰা কৰে কাপিয়া মাৰলা। আপাততঃ সংগ্ৰামহান এপেই থামিল।

আলী আমজদ খাঁৰ পিছে তাৰ পুতাক আলী হায়দৰ খাঁ জমিদাৰগো অ’ইল; তাৰ নায়েবগো অ’ইলতা প্ৰমোদ ধৰ। প্ৰমোদ ধৰে চালাকিলো মিয়াম খাজানা আদায় কৰানি অ’ক-  
ৰলো; খাজানাউ কিয়াৰ প্ৰতি দেড়টাকৰ ফামে আড়াই টাকা  
কৰেদিলো। উতাৰ গজে তা বিষ্ণুপ্ৰিয়াৰ দৈনন্দিন জীবনেউ  
নানা বাধা নিষেধ আৰোপ কৰেদিলো। উতাৰ প্ৰতিবাদে  
বাৰো ১৯৩২ ইংৰাজীত ভানুবিলৰ বিদ্ৰোহ আৰম্ভ অ’ইল।  
ঐ সময়ত মৌলবী বাজাৰ শহৰে শ্ৰীহট্ট শ্বৰমা ভেলি যুৱ  
সম্মেলন আহানাত কংগ্ৰেস বাৰো কমিউনিষ্টৰ বিশেষ বিশেষ  
নেতাই ভাষণ দিতাৰা সময় উহানাত ভানুবিলৰ বিদ্ৰোহী  
দল আহানে আন্দোলনৰ স্লোগান দিয়া সভাত হমেইলাগা।  
ঐ বিদ্ৰোহী-দলৰ হাবিৰ মুঙে অছিতা বৈকুণ্ঠ শৰ্মা বাৰো  
গিৰীন্দ্র সিংহ; নিঙোল পীৰ ভিতৰে অগ্ৰণীগো চতুৰ্দশ বৰীয়া



শর্মা । ঐ যুব সম্মেলনে ভানুবিলর বিদ্রোহীকে সাহায্য করানির প্রস্তাব মেনা অ'ইল । ভানুবিলর বিদ্রোহীয়েউ মহাত্মা গান্ধীর অনুসরণে অহিংসানীতিলো সংগ্রাম করানির সংকল্প নিলাগা । মৌলবী বাজারর জিলা কংগ্রেসেউ আন্দোলন এহানরে সমর্থন জানেইলা । ভানুবিলর আন্দোলন জাতীয় কংগ্রেসর আন্দোলনর লগে মিলিয়া এক অ'ইল । ঐ স্বাধীনতা সংগ্রামে অগ্নিকন্যা লীলাবতীর অগ্নিবারা ভাষণ ঐ অঞ্চলর মানুহ— বিশেষ ককিয়া বিষ্ণুপ্রিয়া মণিপুরীর মনে উৎসাহ বারো শক্তি যুগেইলো বারো জাগরণর মতুন সাড়া আহান আনেদিলো; তেইর সাহস বারো দেশপ্ৰীতির বাণীয়ে বিষ্ণুপ্রিয়া সামাজর স্ত্রী পুরুষ হাবিবে দেশর স্বাধীনতা আন্দোলনে ঝাপিয়া পড়ানিরকা উদ্দীপ্ত করলো ।

লীলাবতীর পিতৃদেব বৈকুণ্ঠ শর্মা জাতীয় কংগ্রেসর বিশিষ্ট নেতা আগোরূপে পরিচিত অ'ইল এবং স্থানীয় ভানুবিল কংগ্রেস কমিটির সভাপতি-রূপে নির্বাচিত অ'ইল । গিরকে শ্রীহট্ট জিলা কংগ্রেসর নেতৃত্বদর সহায়তালো ভানুবিল বারো নিকটবর্তী মণিপুরী অধুষিত এলাকাত শক্তিশালী সংগঠন আহান হঙকরলো এবং কংগ্রেসর আইন-অমান্য ( Civil Disobedience ) আন্দোলনে যোগ দিলো । তার এ আইন অমান্য আন্দোলনে প্রধান সঙ্গিনীগো লীলাবতী ।

১৯৩১ ইংরাজীর শেষনাগে বৈকুণ্ঠ শর্মা গিরকে ভানুবিলর মাগুপে ব্রিটিশ সরকার বিরোধী সভা আহানর আয়োজন করলো । ঐ সভাত জেলা কংগ্রেসর শ্রীপূর্ণেন্দু কিশোর সেনগুপ্ত, শ্রীআশুতোষ ভট্টাচার্য, শ্রীমতী সরলা বাল্য দে ইত্যাদি নেতৃবৃন্দ যোগ দেছিলো । এ গিরিগিথানীয়ে অমান্য ভাষালো দিলা ভাষণ উতা বিষ্ণুপ্রিয়া মণিপুরী ভাষালো অনুবাদ করলোতা লীলাবতীয়ে । ব্রিটিশ সরকার সভা এহান সম্বন্ধে অবগত আছিল । সভা উহান চলানির সময়ত মৌলবী বাজারর

মহকুমা শাসক সশস্ত্র বাহিনী সহ উপেই উপস্থিত অ'য়া সভা উদ্বাহনরে বে-আইনী ঘোষণা করিয়া উপস্থিত জনতারে উপেই-তো সেচিয়া যানারকা আদেশ দিলো । নেতৃবৃন্দই উদ্বাহনর প্রতিবাদ করলে পুলিশ বাহিনীয়ে জনতার গজে নৃশংসভাবে আক্রমণ চালেইলা । ঐ আক্রমণে নেতৃস্থানীয় গিরিগিথানী উতা প্রায় হাবি আহত অ'ইলা; ফলে জনতা হাবি বিক্ষিপ্ত অ'য়া ইতস্ততঃ ছুটানি অ'করলা । সভাহান সম্পূর্ণ বার্থ অ'নার উপক্রম অ'ইল । ঐ সময়ত বৈকুণ্ঠ শর্মার চতুর্দশ-পঞ্চদশ বয়স্কা কন্যা লীলাবতী শর্মা গিথানকে দ্বিযো আ'তে কংগ্রেস পতাকাহান ধরিয়া নির্ভয়ে দীপ্ত কণ্ঠে চিৎকার করলো— 'বন্দে মাতরম্' । লগে লগে হাজার হাজার মানুর কণ্ঠে ধ্বনিত অ'ইল— 'বন্দে মাতরম্' । পুলিশ বাহিনী ক্ষণকালব্যকা হতবশ্ব অ'ইলা, কিন্তু পরমুহুতে বারো জনতার গজে আক্রমণ চালেই-লা । ভানুবিলর সভামণ্ডপ অসহায় নরনারীর বকতলো বস্তাক্ত অ'ইল । মন্দিরে আশ্রয় নিলাগা নারী বারো শিশু উতাউ রক্ষা নাপেইলা; পুলিশে তানুর গজে, এমন কি, দেবমূর্তির গজেউ অত্যাচার চালেইলা ।

ব্রিটিশ সরকারে বৈকুণ্ঠ শর্মা, লীলাবতী বারো অন্যান্য নেতৃবৃন্দ হাবিরে বন্দীর আদেশ দিলো । অন্য়ান্য নেতার লগে কৈকুণ্ঠ শর্মা বারো লীলাবতীও বন্দী অ'ইলা । লীলাবতী গিথানকর আগরতলা বাসী জিপুতর মুখে ছললাঙতা । লীলাবতী গিথানক বন্দী অ'নার আগে পিতৃদেব বৈকুণ্ঠ শর্মা গিরকর লগে কতোদিন বনে বনে লুকেয়া আহিলী । যেতাউ অ'ক , নেতৃবৃন্দ হাবি বন্দী অ'নার পিছে রোলবী বাজারর জেলে অ'ইল বিচারে অন্যান্য নেতৃবৃন্দর লগে বৈকুণ্ঠ শর্মা বারো লীলাবতীর তাউ বিচার অ'ইল এবং বিচারে দোষী সাব্যস্ত অ'নাই হাবিরতা কারাবাসর আদেশ দেনা অ'ইল । উতার পিছে লীলাবতী বয়সে কনাক অ'নার দরুণ সরকারর



তরফেও তেইরে জানানি অ'ইল যে, জাতীয় আন্দোলনেও তেই বিরত থাইতই বুলিয়া লিখিতভাবে জানেইলে তেইরে মুক্তি দেনা অ'ইতই। কিন্তু লীলাবতীয়ে ঐ প্রস্তাব উহান দৃঢ়ভাবে প্রত্যাখ্যান করলো। তেইরে মৌলবী বাজারর জেলে থনা অ'ইল বারো বৈকুণ্ঠ শর্মা এবং অন্যান্য নেতारे ছিলেটর কেন্দ্রীয় কারাগারে থনা অ'ইল। কতোমাস পিছে লীলাবতীবেউ ছিলেটর কেন্দ্রীয় কারাগারে স্থানান্তরিত করানি অ'ইল। কলে লীলাবতী গিথানকে ঐ কারাগারে পিতৃদেব বৈকুণ্ঠ শর্মা, শ্রীপূর্ণেন্দু কিশোর সেনগুপ্ত, শ্রীমতী সরলাবালা দে, শ্রীমতী চাকুবালা দে ইত্যাদি নেতৃবৃন্দর লগে থাইলী। জেলে থানার সময়ত লীলাবতী মেলেরিয়া নুরারালে! প্রচণ্ডভাবে আক্রান্ত অ'ছিলী এবং ভগ্নবাস্থ্যলো এগারো মাস কারাগার খায়া মুক্ত অ'ইলী। এ বিষয়ে লীলাবতী গিথানকে নিজে ইকবেছেতা :

That my father Late Raikuntha Nath Sharma who was the President of Bhanubil Congress Committee, Sylhet, row in Bangladesh, took part at the national movement of 1931 when I was minor. A meeting was held at Bhanubil in 1931 which was attended by important Congress Leaders like Sri Purnendu Kishore Sengupta, Srimati Sarala Bala Dey, Sri Nanda Kishore Das, Sri Ashu Bhattacharjee and Sabitri Singha. .... I translated their speeches in Manipuri in that meeting. Subsequently, warrant of arrest was issued and I was arrested along with my father and others. I was tried at Maulvi Bazar Jail and sentenced eleven months.

imprisonment by the trying magistrate . After sometime, I was sent to Sylhet Central Jail .

That Sri Sarala Bala Dey, Sri Charu Bala Dey.....prominent Congress leaders of Sylhet were also with me in Sylhet Central Jail . My father Baikuntha Nath Sharma, Sri Purnendu Kishore Sengupta and other leaders were in the same jail at that period .”

ছিলেট ডিফ্ট্ট কংগ্রেস কমিটির ছেক্রেটারী শ্রী পূর্নেন্দু কিশোর সেনগুপ্তই লীলাবতী গিথানক সম্পর্কে ইকরেছেতা :

“She was an inspiration to many civil resisters due to her bold stand and her sufferings While she was thirteen years, she was arrested along with her father during Civil Disobedience Movement. Considering her age, she was allowed to be free after executing a bond which she flatly refused and was jailed for a long period.”

ত্রিপুরা টেরিটোরিয়েল কাউন্সিলর চেয়ারমেন শ্রীশচীন্দ্র লাল সিং গিরকেউ ইকরেছেতা :

“She suffered much as she was arrested along with her father during Civil Disobedience Movement. Considering her tender age, she was allowed to be free on execution of a bond which she flatly refused and was jailed for a long period ”

এবেদে জমিদার আলী হাইদর খাঁই জোর করিয়া ভানু-বিলর মানুরাঙতো কিয়ার প্রতি আড়াই টাকা খাজনা নেনার চেষ্টা করলো, কিন্তু ভানুবিলর কুনোখোই খাজানা নাদল।



ঐ কারণে এবং ভারতর জাতীয় আন্দোলনে কংগ্রেসর লগে সহযোগিতা করানির দায়ে ভানুবিলর অধিবাসীরা গজে সরকারে জুলুম করানি অ'করলো । ঘর কতোগো উচ্ছেদ করানিও অ'ইল । তৎ সত্ত্বেউ ভানুবিলর অধিবাসীয়ে সরকারহাঙ নতি স্বীকার নাকরানিয়ে সরকারর আদেশে প্রায় আড়াই হাজার সিপাহীয়ে দশগো আ'ন্তিলো আয়া ভানুবিলর ঘর বা'গানি অ'করলা । এ ঘর বা'গানির দায়িত্বহান পড়েছিলতা দারোগা চৌধুরী সিঙর গজে । চৌধুরী সিঙ গিরকে আয়া বৈকুণ্ঠ শর্মার ঘরগো বা'গানিরকা বৈকুণ্ঠ শর্মার গৃহিনী ইমা ঠাকুরাণীয়ে ঘরগো এরাদিয়া যানারকা মাতলো । ইমা ঠাকুরাণীয়ে কথা উহান মা'করিয়া মাতলো “আমিতে ঘর এরাদিয়া কুরাঙ যিতা ডাইগাতা ? আমি মরলেউ ঘরে মরতাডাই ।” উপেই চৌধুরী সিঙ গিরকে জুর করিয়া তেইরে ঘরেল নিকাল দিয়া ঘর উগো বা'গে দিলো ; মাওপগো বা'গে দিলো । চৌধুরী গিরকে মন্দিরগো বা'গিয়া দৌরো পছরীত বেলাদেছে বুলিয়া কুনো কুনোগোই মাতলা ; তবে বৈকুণ্ঠ শর্মার জেঠী জিলক সাবিত্রী চাটার্জি গিথানকর মন্তে , ঐ সময়ত মন্দির বারো দৌর গজে সিপাহীয়ে আ'ত নাদেছি ; ‘মন্দির বারো দৌ বা'গানিরকা করতে ভারপ্রাপ্ত সাহেব উগোই বাধা দেনাই তানু ঐ কাম উহান নাকরলা ’ বুলিয়া গিথানকে মাতলো ।

এতার পিছে , খুব সম্ভবতঃ ১৯৩৪ ইংরাজীত বৈকুণ্ঠ শর্মার কারাগার বাসর পরে ব্রিটিশ কমনন্স সভার সদস্য মিস্ উইলকিনসন গিথানক বারো ভারতর লেবার পার্টির সদস্য ঐকুম্মেনন গিরকরেলো তদন্ত কমিটি আহান গঠিত অ'ইল ক্রীপেইন নাঙর সাহেব আগোর লগে ঐ তদন্ত কমিটি উহান ছিলটে আয়া ভানুবিলসম্পর্কে তদন্ত করিয়া রিপোর্ট দিলা । গিরক আগোরাঙতো ছনলাঙতা, মিস উইলকিনসন গিথানকে ছিলেটে আয়া বৈকুণ্ঠ শর্মা গিরকরে তেইর লগে দেখা করানিরকা

খবর দিতে তা নাগেছেগা আরো উইকিন সন গিথানক নিজে তার ঘরে গেছেগা উনি । তার ঘরে গিয়া গিথানকে আ'ঙ করেছেগা-তেই খবর দিতে তা কিয়া নাগেলগাতা বুলিয়া । উত্তরে বৈকুণ্ঠ শর্মা গিরকে মাতেছেতা-“ তি হাজার হাজার মাইল দূরেইত্ত ছিলেট পেয়া আহেছতগোই ছিলেটেত্ত এতুপি আহে নুরারিয়া মোরে যানারকা পৌ দিলেতাতে কিতায়া” ?

যেতাউ অ'ক , ভানুবিলা মাণ্ডপর ঘটনার পিছে বৈকুণ্ঠ শর্মা বারো অন্যান্য যে যে নেতা কারাবাসে আছিলগা, তানু মুক্তি পানার পিছে সম্ভবতঃ ১৯৩৪ ইংরাজীত মৌলবী বাজার শহরে সভা আহানাত বা-রো হাবিহান তিল'ইলা । তানু ভানুবিলর কৃষকর অধিকার প্রতিষ্ঠা না'নি পেয়া আন্দোলন চালেয়া যানার সংকল্প নিলাগা । সহকারে লগে লগে তানুবে বা-রো বন্দী করলো । বিচারে বৈকুণ্ঠ শর্মাৱে চারি বছর বারো নিকুঞ্জ গোস্বামীৱে চারি বছর কারাবাসর নির্দেশ দেনা অ'ইল । তবে ১৯৩৭ ইংরাজীত ভানুবিলর প্রজার লগে হবা সম্বন্ধ আহান স্থাপনর উদ্দেশ্য 'ভানুবিল কৃষক প্রজাসত্ত্ব আইন' নামর আইন আহান বরিয়া ভানুবিলর জমি ওতার মালিকানা স্থানীয় কৃষকরাও দেনা অ'ইল বারো ' রাজনৈতিক বন্দী মুক্তি আইন' নামর আইন আহান করিয়া বন্দী হাবিৱে মুক্তিদেনা অ'ইল । এ দ্বিতীয় আইনর বলে বৈকুণ্ঠ শর্মাউ মুক্তি পেইলো ।

কারাগারেত্ত মুক্তি পানার পিছে লীলাবতী গিথানকে আরতাউ নিষ্ঠা সহকারে স্বাধীনতা আন্দোলনে যোগ দিলো । তেই মহাত্মাগান্ধীর অনুসরণে বৈকুণ্ঠ শর্মাৱ নির্দেশনার চরকা সংঘ আগোর প্রতিষ্ঠা করলো । মণিপুরী রমণী স্বভাবতঃই চরকা-চালানিত অভিজ্ঞ ; লীলাবতীর নেতৃত্বত তানুর ঐ চরকা-চালনা উহান বিরাট সাফল্য অর্জন করলো । লীলাবতীৱে চারি পাচ বছর ঐ চরকা সংঘ উগোর পরিচালনা করলো । তেইৱ এ চরকা সংঘর পরিচালনাত ঐহট্ট জিলা কংগ্রেসর অনেকই আয়া তেইৱে উৎসাহ দিলা ।



১৯৩৭ ইংরাজীত কংগ্রেস সভাপতি পণ্ডিত জরহরলাল নেহেরুরে শ্রীহট্ট ভ্রমণকালে ভানুবিলর সংগ্রামী মানুষের চানারকা বারো তানুর আন্দোলন-সম্পর্কে অবহিত অ'নারকা ভানুবিল-পরিদর্শনে গেছিলগা । ঐ সময়ত লীলাবতীয়ে বৈকুণ্ঠ শর্মার নির্দেশনালো চরকা-প্রদর্শনীৰ আয়োজন আহান করেছিলী ; ঐ প্রদর্শনীত শতাধিক বিষ্ণুপ্রিয়া মণিপুরী নিঙোলপীয়ে অংশগ্রহণ করেছিল। ঐদিনকার নেহেরুজীর ভাষন উহান লীলাবতীয়ে বিষ্ণুপ্রিয়া মণিপুরী ভাষালো অনুবাদ করিয়া ছনাছিলী বুলিয়া গিথানকর জিপুতর মুখেত্ত ছনলাঙ । গিথানকর সাংগঠনিক কামে বিশেষ প্রীতি লাভ করিয়া নেহেরুজীয়ে তেইরে সরোজিনী নাইডুর লগে কাম করানিরকা এলাহাবাদে নেনার প্রস্তাব দিলো, লীলাবতী গিথানকেউ যানা মনেইলো ; কিন্তু তেইর মাতৃদেবীয়ে অনুমতি নাদানিয়ে তেইরতা এলাহাবাদে যানা না'ইল ।

১৯৩৮-৩৯ ইংরাজীত লীলাবতীর ২৪-২৫ বছর বয়সে আগরতলার শরৎকুমার ভট্টাচার্য্য গিরকর লগে তেইর বিবাহ-বন্ধন স্থাপিত অ'ইল । উতার পিছে রাজনীতির লগে প্রত্যক্ষ ভাবে জড়িত নাইলেউ তেই আজীবন গান্ধীর অহিংসনীতি অনুসরণ করিয়া গেলীগা ।

বৈকুণ্ঠ শর্মা ভারতর স্বাধীনতা আন্দোলনে নিজরে সম্পূর্ণ ভাবে সমর্পণ করেছিল । ভারত বিভাগর পিছে নিজর পিতৃভূমি এরাদিয়া ভারতে আহানির ফলে তার জীবন দুঃখদারিদ্র্যময় অ'য়া উঠিল । গিরকে ১৯৫৩ ইংরাজীত ভারতে আয়া পইলা ইশকপুরে কতোদিন থাইল । উতার পিছে আগরতলাত লীলাবতীর ঘরে দ্বিবছরর চুরা থায়াউ উপেই স্থায়ী বসবাসর কুনো সুবিধা করে নুরারিয়া তা মণিপুরে যানার ইচ্ছালো সাল'ইল । যিতেগা প্রতাপগড়র হিন্দারীত বিয়া দেছে তার জেঠী মিডোল সাবিত্রী চাটার্জি গিথানকর ঘরে তা হমেইল । ঐ সময়ত তা

(৭৬)

শারীরিকভাবে মিয়াম অন্তস্থ অ'নাই মণিপুরে বানার আশা  
এরাদিয়া ইমে হিঙ্গারীতেই থাইল। উপেই দ্বি বছর চুরা  
থায়া ১৯৫৬ ইংরাজীত তার ৮০-৮১ বছর বয়সে দেহত্যাগ  
করলো।

এবেদে লীলাবতী গিথানকৌ আর্থিক স্বচ্ছলতার অভাবে  
খানি কষ্টভোগ করাত বাধা অ'ইলী। গিথানকর প্রায় ৬০  
বছর বয়সে ১৯৭৪ ইংরাজীত ত্রিপুরা সরকারে অন্যান্য  
বিপ্লবীর সাদে লীলাবতী গিথানকরতাউ মাসিক বৃত্তি আহান  
দিলো। স্বল্প অ'ইলেউ ও বৃত্তিয়ে তেইর বৃদ্ধবয়সে আর্থিক  
কষ্ট দূরেই করানিত খানি সাহায্য করলো।

লীলাবতী গিথানক তিনগো মুনিজিপুত বারো তিন  
গো নিঙোল থয়া ৭৮ বছর বয়সে ১৯৯২ ইংরাজীর ২৭  
ছেপ্টেম্বরে দেহত্যাগ করিয়া গেলীগা। বৈকুণ্ঠনাথ শর্মা  
বারো লীলাবতী গিথানকর দেশপ্রীতি, সাহস বারো  
নিভীকতা আমার সমাজর যুবক নিঙোলরে যথেষ্ট উৎসাহ  
উদ্দীপনা দিতই বুলিয়া আশা থয়ার।



